

吕衡州文集
附考證







集文州衡呂

證考附

撰溫呂

王雲五主編
叢書集成初編
呂衡州文集
附考證

中華民國二十四年十二月初版

撰者 呂 温

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

牙

本館據粵雅堂叢
書本排印初編各
叢書僅有此本

唐人文集存者。纔二三十種。藏書家每苦不能盡得。卽得矣。又苦其本不能盡善。如呂溫叔集。世所傳皆自常熟馮氏鈔出。予收獲真本。謂爲善矣。頃見元和顧君澗蘋攜借來。吳茂才有堂家藏足本。其末有跋云。右呂衡州集十卷。前五卷係吳方山家藏舊鈔本。後五卷從正嘉時舊鈔本補全。其篇目次第。與馮已蒼照宋鈔本同。所異者。馮已蒼初得宋本前五卷。又得宋本後三卷。其第六第七二卷均之缺如。雖從英華文粹所載照目寫入。未得爲完書。今此本二卷獨全。可稱呂集之善本云。跋不著名氏。驗以字蹟。近何屺瞻一派。或是義門門下士也。驚喜傳錄。手加讎校。復念此僅存之祕笈。幾於舉世莫見。不可不及今流布。乃刊行之。唯吳本不無缺字。則賴馮本相補。顧君又徧取自舊新兩書以下。凡有關涉羣籍。博搜精擇。審定是非。踰時而後告成。爰著緣起之詳於端。有堂名志忠。先世在吳中負藏書望。所謂璜川吳氏者也。聞其家稍落。不能多劖劂。顧君年來與英山金君近園。規樞同撰文粹辨證。鈔校罕觀唐集。尙餘若干種。均有待於好古者。某不敏。敢用衡州爲擁篲清道矣。道光七年歲次丁亥閏月初吉。江都秦恩復字伯敦父序。

呂衡州文集目錄

朝議郎使持節衡州諸軍事守衡州刺史上騎都尉賜緋魚袋呂溫
第一卷

賦詩

由鹿賦并序

黃龍負舟賦

白雲起封中詩

樂理心賦

月中聞磬詩

鑒止水賦

青出藍詩

早朝候傳點書懷

秋日臺中寄懷

望白山作

聞雅琴書事

惜花絕句

聽山鵲

詠鷹

題尋真觀書院

寄李六協律

寄竇三端公

蕃中迴寄親故

吐蕃別館臥病

中和日寄僚舊

及第後答主人

看渾中丞桃花

北橋新亭書懷

酬別江華毛令

酬何處士

酬何處士書情

貞元舊節有感

奉陪看花附

宗禮苦雨戲贈

第二卷

詩

吐蕃別館月夜

關河亭作

題梁宣帝陵二首

道州途中卽事

浴後贈主人

贈友人

題道州知縣廳事

訪荀參軍林園

涼夜書情附

戲贈靈澈上人

答崔三題海陽亭

答段秀才

道州寄裴相公

望思臺

鞏路感懷

岳陽懷古

少陵原望秦中諸川

祭南岳

題河州赤岸村

晉王龍驤墓

劉郎浦口號

送楊七錄事

送文暢上人

送段九秀才

送袁七書記

送何山人

遊郭駙馬亭子

櫻藥未坼賦詩

傷合江亭翦竹

早春遊黃溪

看花招客不至

詠蜀客石琴枕

河源軍漢村作

題陽人城

題石勒城二首

自江華之衡陽

送范司空

送宗禮南行

送李十一兵曹

江陵酒中留別

送戴簡處士

舍弟失囚共飲

衡州登樓望花

遊歐陽家林亭

衡州把火看花

順宗挽歌詞二首

賦得鄉飲酒

賦得失羣鶴

道州北池放鵝

蕃中答退渾詞

聞砧有感

冬日病中卽事

衢中卽事

南樓卽事

衡州早春二首

偶然作二首

風詠

與李六聯句

聽歌有感

冬夜卽事

讀小弟詩有感

道州月歎

道州南樓換柱

迴風有懷

上官昭容書樓歌

早覺有感

病中轉司封

城北樓觀李花

道州觀野火

郡內書懷

古興

道州感興

鏡中歎白髮

早甚見權門移芍藥花

道州郡齋臥疾

讀句踐傳

風歎

第三卷

書序

請學春秋書

代與嚴僕射書

代與張尙書書

代與于相公書

送友人遊蜀序

聯句詩序

律令要錄序

上族叔齊河南書

代與韓司空書

代與劉尙書書

地志圖序

送琴客序

送薛大信序

裴氏海昏集序

第四卷

表

代論伐劍南更發兵表

代進集注春秋表

謝拾遺表

賀順宗登極表

代賀德政表

代賀遷二祖表

謝章服表

代上尊號第三表

代謝宣示元和觀象歷表

代賀放浙西租賦表

代謝許遊宴表

代進農書表

代司徒謝上表

代賀赦表

第五卷

表狀

代賀收西川表

代謝內庫錢充南郊賞表

代賀雨雪表

代賀生擒李錡表

代謝槍旗等表

代謝借飛龍馬表

代起居表

代謝男官表

道州謝上表

賀冊皇太子表

衡州謝上表

代賀上表

代奏吐蕃事宜狀

代奏請女正度狀

代謝賜戟狀

代請刪定六典開元禮狀

崔公行狀

第六卷

碑銘

三受降城碑銘

韋府君神道碑銘

劉公神道碑銘

南嶽大師塔銘記

韋公神道碑銘

第七卷

誌銘

鄭夫人墓誌銘

大長公主墓誌銘

李夫人墓誌銘

柳夫人墓誌銘

陳先生墓表

呂府君權殯記

第八卷

銘文

傅巖銘

望思臺銘

古東周城銘

成皋銘

謁舜廟文

酈王景略文

代祭樊襄陽文

代祭齊相公文

祭陸給事文

祭鄧助費念文

祭候官房叔文

祭溺死百姓文

第九卷

頌讚

凌烟閣勳臣頌

皇帝親庶政頌

立廬陵王傳讚

張荊州畫讚

續羊叔子傳讚

藥師如來繡像讚

第十卷

雜著

功臣恕死議

復漢以粟爲賞罰議

人文化成論

三不欺先後論

虢州三堂記

諸葛武侯廟記

道州刺史廳記附

道州刺史廳後記

湖南都團練廳壁記

呂衡州文集卷第一

由鹿賦并序

貞元己卯歲予南出穰樊之間。遇野人。執鹿而至者。問之。答曰。此爲由鹿。由此鹿以誘至羣鹿也。備言其狀。且曰。此鹿每有所致。輒嗚嗥不飲食者累日。余喟然曰。虞之卽鹿也。必以其類致之。人之卽人也。亦必以其友致之。實繁有徒。古之然矣。嗟乎。鹿無情而猶知痛傷。人與謀而宴安殘酷。彼何人斯。物微感深。遂作賦曰。

鹿之生兮。亦稟毒備齒角而無競。循性情而自牧。姑有味於行止。尙焉知乎倚伏。捨爾崇林。輕遊近麓。偶巧網之生致。蒙主人之全育。飲以溲井。飼于芳庭。寢訛荃柔。騰倚蘭馨。露往霜來。日安月寧。雖矯性而非樂。終感恩而不驚。曾不知養非玩物。用有深意。命之曰由。俾陷其類。凜秋八月。爽景清氣。羈致山阿。糜于蹊隧。設伏以待。翳叢而伺。同氣相求。誘之孔易。將必慕侶。豈云貪餌。呦呦和擊。嗚。麋麇狎至。彼泯慮於猜信。此無情於誠僞。孰是倉卒。禍生所忽。毒鏑以星貫。潛機劃其電發。或洞胸而達腋。或折足而碎骨。望林巒兮非遠。顧町疇兮未滅。風嗥澤而北至。日揜山而西沒。走駭侶於巖烟。叫飢靡於澗月。苟行路之聞者。孰不心摧而思絕。相爾由矣。野心而仁。望純束而驚顧。隨獲車而逡巡。視鼎中之消爛。觀机上之剖分。忽哀鳴以感類。若沈痛之在身。雖復處之密邇。享以豐珍。比檻猿之駭躍。同海鳥之愁辛。敢擇蔭而後

死思走險其何因。痛無知以相陷。含惋毒而莫申。客有感而言曰。物誠有諸人。亦宜乎。撫事或比。原心卽殊。借如淮陰之禍。冤在神理。通說且拒。豨謀寧起。堂堂蕭公。實曰知己。給致鐘室。胡寧忍此。呂祿之難。誰非漢臣。交則不義。賣亦不仁。彼美酈生。旣爲交親。誘襲軍印。豈無他人。於戲。微獸傷類。如不自容。伊人賣友。以享其功。滅交道兮。墜義風。曾麋鹿之不若。何仁信之可宗。已焉哉。諒此世之茫茫。吾未見其始終。

黃龍負舟賦

以克己勤物大川效靈爲韻

夏后氏奠山。疏川拯溺。開泰元珪。錫命旣成。天下之功。黃龍發祥。始曜域中之大。當其駐軫江甸。艤舟洪川。天行健而時有未濟。地設險而瞻之在前。思利涉以撫俗。遂精誠而告虔。於是雲氣鬱起。神光爛然。奮髯於勿用之窟。驤首於或躍之泉。安波澄瀾。奉天意而顛若。拖尾垂鬣。夾王舟而負焉。合靈符於百代。表聖運於千年。徒偉夫出無情。馳不測。如驅風雷。若有羽翼。觀竭誠以效用。似就列而陳力。電目流光。金鱗耀色。天吳奔走。陽侯屏息。巨險訖濟。孰假刻木之能。潛怪莫逢。寧資畫鷁之飾。應變化以昭感。出沈潛而剛克。其慶惟大。賴祉福者兆人。其觀惟榮。執玉帛者萬國。若非平水堙土。泣辜罪己。非飲食以昭儉。卑宮室而思理。德揜乎生成之初。功齊乎開闢之始。安有非常之神物。不召而萃止。濟其不通。而彰其具美也。至于漢橫汾水。秦抵滄溟。實逞心欲。匪崇德馨。生人之盡瘁。靡念方士之空言。是聽姑幸。免乎覆溺。夫何望於炳靈。於戲。動罔軌道。言非善教。則人雖愚弱。或使之而不效。其志惟純。其德孔殷。則龍雖神化。將不役而自勤。信矣哉。國家俾人其蘇。在理無鬱。超乎大禹。不務舟車之勞。蜿彼黃龍。但爲宮沼之物而已。

白雲起封中詩

題中用韻
六十字成

封開白雲起。漢帝坐齋宮。望在泥金上。疑生祕玉中。欖柯初繚繞。布葉漸蒙籠。日觀祥光合。天門瑞氣通。無心已出岫。有勢欲凌風。儻遣成膏澤。從茲遍太空。

吏部試樂理心賦

以易直子諒油
然而生爲韻

道無象。天無聲。聖不有作。曷觀化成。於是鼓吹大塊。鏗鏘元精。因乎心而式是理本。形乎器而強爲樂名。以齊五方之俗。以厚萬物之生。始積中而發外。卒充性而約情。樂與心冥。則所謂固天之縱心。由樂理亦得夫自明而誠。至若樂在朝廷。君臣叶義。一發而陽唱陰和。九變而雲行雨施。上以見爲君之難。下以知爲臣不易。有國者理心以此。必獲儀鳳之呈瑞。若乃樂在閨闈。父子靜專。蓋取諸無荒而樂。有節而宣。和以嚴濟。愛由敬全。有家者理心以此。必反天性於自然。且夫樂之作也。一動一息。心之理也。惟清惟直。然後能在聽而必聰。無入而不得。節有序。觀貫珠而匪珠。聲成文。見五色而非色。其或惟邪是念。惟慝是蒐。則雖琴瑟在御。管磬聿修。立樂之方。旣失。理心之術。何求。亦焉望變澆風之浩浩。致和氣之油油。徒觀其心尙元通。樂資交暢。明贊天地之化育。幽索鬼神之情狀。會節有極。象之則動。而時中。應變無方。擬之則貞而不諒。至矣哉。至樂希夷。俟其禕而聽之。以心固不專於子野。作必在德。亦無俟於后夔。方今敦和統同。反本復始。辨六律以分職。齊八風而同軌。洪鐘虛受。我則開其直言。朱絃遺音。我則戒夫專美。此吾君之以樂理心也。宜乎貴爲天子。

終南精舍月中聞磬詩

題中用韻
六十字成

月中禪室掩幽磬靜昏氛思入空門妙聲從覺路聞泠泠滿虛壑杳杳出寒雲天籟疑難辨霜鐘詎可分
偶來遊法界便欲謝人羣竟夕聽真響塵心自解紛

禮部試鑒止水賦

以澄虛納照遇象分形爲韻任不
依次用限三百五十字已上成

水止矣靜之其徐物鑒矣久而益虛且無情於美惡又奚議夫親疎委質員來所斯乎上善同利忘筌已
悟寧患乎至清無魚若乃迴塘月抱高岸環合泥滓湛然自沈金沙炯其不雜同道德之以虛而受異川
澤之唯汙是納有斐君子此焉明徵氣隨波息心與源澄端形赴影如木從繩其表微也挂金鏡而當畫
其索隱也隔玉壺而見冰爾其色必洞澈光無滉漾不蒸蒼鬱之氣不激潺湲之響百丈在目千仞指掌
惡每自乎中見美實非乎外獎鑒形之始方似以身觀身得意之閒乃同求象忘象徒觀其下倒星漢上
披煙雲守其常而性將道合居其所而物以羣分君鑒之以平心臨下以簡臣鑒之而厲節在邦必聞妍
蚩無形兮惟人所召物我兼遺兮水無私照廉士以之立誠至人以之觀妙豈比夫流若激矢波如建瓴
不捨晝夜爭輸滄溟徒乖躁靜之理莫分真僞之形者哉國家以賢爲止水鑒有餘裕羣形鱗集衆象景
附濫巾竊吹者十手共指研精撫實者千載一遇夫如是姑自攝其威儀亦何憂而何懼

青出藍詩

題中用韻
四十字成

物有無窮好藍青又出青朱研方比德白受始成形袍襲宜從政衿垂可問經當時不採擷佳色幾飄零

奉和李相公早朝於中書候傳點偶書所懷奉呈門下武相公中書鄭相公

禁門留騎吹。內省正衣冠。稍辨旂常色。尙聞鐘漏殘。九天爐氣暖。六月玉聲寒。宿霧開霞觀。晨光泛露盤。致君期反朴。求友得如蘭。政出同歸理。言成共不刊。準繩臨百度。領袖映千官。臥鼓流沙靜。飛航漲海安。盡規酬主意。偕賦代交歡。雅韻人閒滿。多慙竊和難。

奉和武中丞秋日臺中寄懷簡諸僚故

時西蕃使迴奉命追和

聖朝思紀律。憲府得忠賢。指顧風行地。儀形月麗天。不仁恆自遠。爲政復何先。虛室惟生白。閒情卻草元。迎霜紅葉早。過雨碧苔鮮。魚樂翻秋水。鳥聲隔暮煙。舊遊多絕席。感物遂成篇。更許窮荒客。追歌白雪前。吐蕃別館和周十一郎中楊七錄事望白山作

純精結奇狀。皎皎天一涯。玉嶂擁清氣。蓮峯開白花。半巖晦雲雪。高頂澄煙霞。朝昏對賓館。隱映如仙家。夙聞蘊孤尙。終欲窮幽遐。暫因役餘暇。偶得志所嘉。明時無外戶。勝境卽中華。況今舅甥國。誰道隔流沙。奉和張舍人閣中直夜思聞雅琴因書事通簡僚友

迢遞天上直。寂寞邱中琴。憶爾山水韻。起子仁智心。凝情在正始。超想疎煩襟。涼生子夜後。月照禁垣深。遠風蕩蘭氣。微露清桐陰。方襲緇衣慶。永奉南薰吟。

和舍弟恭惜花絕句

時蕃中使河

去年無花看。今年未看花。更聞飄落盡。走馬向誰家。

和恭聽曉籠中山鵲

掩抑沖天意。悽愴觸籠音。驚曉一聞處。傷春千里心。

和舍弟讓籠中鷹

未用且求安。無猜也不殘。九天飛勢在。六月日晴寒。動觸樊籠倦。閑銷肉食難。主人憎惡鳥。試待一呼看。

同恭夏日題尋真觀李寬中秀才書院

閉院開軒笑語闌。江山併入一壺寬。微風但覺杉香滿。烈日方知竹氣寒。披卷最宜生白室。吟詩好就步虛壇。願君此地攻文字。如鍊仙家九轉丹。

同舍弟恭歲暮寄晉州李六協律三十韻

古人猶悲秋。況復歲暮時。急景迫流念。窮陰結長悲。陽烏下西嶺。月鵲驚南枝。攬衣步霜砌。倚杖臨冰池。怳怳若有失。悄悄良不怡。忽聞晨元缺吟。宛是同所思。有美壯感激。無何遠栖遲。摧藏變化用。掩抑扶搖姿。時傑豈虛出。天道信無欺。巨川望汜濟。寒谷待潛吹。劍匣益精利。玉韜寧磷淄。戒哉輕沽諸。行矣自寵之。依我抱微尚。仲氏卽心期。討論自少小。形影相差池。比來胸中氣。欲耀天下奇。雲雨霈蕭艾。煙閣雙萎蕤。幾年困方柄。一旦迷多歧。道因窮理悟。命以盡性知。事去類絕絃。時來如轉規。伊呂偶然得。孔墨徒爾爲。早行多露悔。強進觸藩羸。功名豈身利。仁義非吾私。萬物自生化。一夫何驅馳。不如任行止。委分安所宜。勸爾休感歎。與余陶希夷。明年郊天後。慶澤歲華滋。曲水杏花雪。香街青柳絲。良時且暫歡。樽酒聊共

持。閑過漆園叟。醉看五陵兒。寄言思隱處。不久來相追。

青海西寄寶三端公

時同事弗同。窮節厲陰風。我役流沙外。君朝紫禁中。從容非所羨。辛苦竟何功。但示酬恩路。浮生任轉蓬。

蕃中拘留歲餘迴至隴右先寄城中親故

蓬轉星霜改。蘭陔色養違。窮泉百死別。絕域再生歸。鏡數成絲髮。囊收技血衣。酬恩有何力。祇棄一毛微。

吐蕃別館臥病寄朝中親友

星漢縱橫車馬喧。風搖玉佩燭花繁。豈知羸臥窮荒外。日滿深山猶閉門。

吐蕃別館中和日寄朝中僚舊

清明令節千官會。絕域窮山一病夫。遙想滿堂歡笑處。幾人緣我向西隅。

及第後答潼關主人

本欲雲雨化。卻隨波浪翻。一霑太常第。十過潼關門。志力且虛棄。功名誰復論。主人固相問。慙笑不能言。

河中城南姚家浴後題贈主人

新浴振輕衣。滿堂寒月色。主人有美酒。況是曾相識。

看渾中丞山桃花初有他客不通晚方得入因有戲贈

朝來駐馬香街裏。風度遙聞語笑聲。無事閉門教日晚。山桃落盡不勝情。

贈友人

南山雙喬松。擢本皆千尋。夕流膏露津。朝被青雲陰。負雪出深澗。搖風倚高岑。明堂久不構。雲隸何森森。匠意方雕巧。時情正誇淫。生材會有用。天地豈無心。

道州夏日郡內北橋新亭書懷贈何元之處士

結構池梁上。登臨日幾迴。晴空交密葉。陰岸積蒼苔。爽氣中央滿。清風四面來。振衣生羽翰。高枕出塵埃。齊物魚何樂。忘機鳥不猜。閑銷炎晝盡。靜勝火雲開。僻遠宜孱性。優游賴廢材。願爲長泛梗。莫作重然灰。守道窮非過。先時動是災。寄言徐孺子。賓榻且徘徊。

道州宏道縣主簿知縣三年頗著廉慎秩滿縣闕申使請留將赴衡州題其廳事

爲理賴同力。陟明非所任。廢田方墾草。新柘未成陰。術淺功難就。人疲感易深。煩君駐歸棹。與慰不欺心。

道州將赴衡州酬別江華毛令

布帛精麤任土宜。疲人識信每先期。明朝別後無他囑。雖是蒲鞭也莫施。

道州夏日早訪荀參軍林園敬酬見贈

高眠日出始開門。竹徑旁通到後園。陶亮橫琴空有意。任棠置水竟無言。松窗宿翠含風薄。槿援朝花帶露繁。山郡本來車馬少。更容相訪莫辭喧。

道州敬酬何處士懷郡樓月夜之作

清質悠悠素彩融。長川迴陸合爲空。佳人甚近山城閉。一夜相望水鏡中。

所居寺院涼夜書情呈上郎中

峨眉山人何元之

庾公念病宜清暑。遣向僧家占上方。月光似水衣裳溼。松氣如秋枕簟涼。幸以薄才當客次。無因弱羽逐鸞翔。何由一示雲霄路。腸斷星星兩鬢霜。

道州敬酬何處士書情見贈

意氣曾傾四國豪。偶來幽寺息塵勞。嚴陵釣處江初滿。梁甫吟時月正高。新識幾人知杞梓。故園何歲長蓬蒿。期君自致青雲上。不用傷心歎二毛。

戲贈靈澈上人

僧家亦有芳春興。自是心源無滯境。君看池水湛然時。何曾不受花枝影。

三月一日是貞元舊節有感絕句寄黔南寶三洛陽盧七

同事先皇立玉墀。中和舊節又支離。今朝各自看花處。萬里遙知掩淚時。

初發道州答崔三連州題海陽亭見寄絕句

吏中習隱好躋攀。不擾疲人便自閑。聞說殷勤海陽事。令人轉憶舜祠山。

奉陪郎中樓上夜把火看花

鄉貢進士段宏古

城上芳園花滿枝。城頭太守夜看時。爲報林中高舉燭。感人情思欲題詩。

答段秀才

盡日看花君不來。江城半夜爲君開。樓中共指南園火。紅燼隨花落碧苔。

宗禮欲往桂州苦雨因以戲贈

農人辛苦綠苗齊。正愛梅天水滿堤。知汝使車行意速。但令驄馬著障泥。

道州奉寄襄陽裴相公

悠悠世路自浮沈。豈閒仁賢待物心。最憶過時留宴處。豔歌催酒後亭深。

呂衡州文集卷第二

吐蕃別館月夜

三五窮荒月。還應照北堂。迴身向暗臥。不忍見圓光。

望思臺

浸潤成宮壘。蒼黃弄父兵。人情疑始變。天性感還生。宇縣猶能洽。閨門詎不平。空令千載後。悽愴望思名。

孟冬蒲津關河亭作

息駕非窮途。未濟豈迷津。獨立大河上。北風來吹人。霜雪自茲始。草木當更新。嚴冬不肅殺。何以見陽春。

鞏路感懷

馬嘶白日暮。劍鳴秋氣來。我心浩無際。河上空徘徊。

題梁宣帝陵

卽讎終自翦。覆國豈爲雄。假號孤城裏。何殊在甬東。

二

祀夏功何薄。尊周義不成。悽涼庾信賦。千載共傷情。

岳陽懷古

晨颯發荊州。落日到巴邱。方知剡剡利。可接鬼神遊。二湖豁南寢。九派駛東流。襟帶三千里。盡在岳陽樓。憶昔鬪羣雄。此焉爭上游。吳昌屯虎旅。晉盛鶩龍舟。宋齊紛禍難。梁陳成寇讎。鐘鼓長震耀。魚龍不得休。風雲一蕭散。功業忽如浮。今日時無事。空江滿白鷗。

道州途中卽事

零桂佳山水。營陽舊自同。經途看不暇。遇境說難窮。疊嶂青時合。澄湘漫處空。舟移明鏡裏。路人畫屏中。巖壑千家接。松蘿一徑通。漁煙生縹緲。犬吠隔葱蘢。戲鳥留餘翠。幽花悵晚紅。光翻沙瀨日。香散橘園風。信美非吾土。分憂屬賤躬。守愚資地僻。卹隱望年豐。且保心能靜。那求政必工。課終如免戾。歸養洛城東。

登少陵原望秦中諸川太原王至德妙有水術因用感歎

少陵最高處。曠望極秋空。羣山噴清源。脈散秦川中。荷鍤自成雨。由來非鬼功。如何盛明代。委棄傷豳風。涇灞徒駱驛。漆沮虛會同。東流滔滔去。沃野飛秋蓬。大禹平水土。吾人得其中。發機迴地勢。運思與天通。早欲獻奇策。豐財敍西戎。豈知年三十。未識大明宮。卷爾出岫雲。追吾入冥鴻。無爲學驚俗。狂醉哭途窮。

奉勅祭南嶽

皇家禮赤帝。謬獲司封域。致齋紫蓋下。宿設祝融側。鳴澗驚宵寐。清猿遞時刻。澡絜事夙興。簪珮思盡飾。危壇象岳趾。祕殿翹翬翼。登拜不遑顧。酌獻皆累息。贊道儀匪繁。祝史詞甚直。忽覺魂魄悸。如有精靈逼。漠漠雲氣生。森森杉柏黑。風吹虛簫韻。露洗寒玉色。寂寞有至公。馨香在明德。禮成謝邑吏。駕言歸郡職。

憩桑訪蠶事。遵疇課農力。所願風雨時。迴首瞻南極。

經河源軍漢村作

行行忽到舊河源。城外千家作漢村。樵採未侵征虜墓。耕耘猶就破羌屯。金湯天險長全設。伏臘華風亦暗存。豎駐單車空下淚。有心無力復何言。

題河州赤岸橋

元缺一字南橋上見河州。遺老相依赤岸頭。匣塞歌鐘受恩者。誰憐被髮哭東流。

題陽人城

忠驅義感卽風雷。誰道南方乏武才。天下起兵誅董卓。長沙子弟最先來。

晉王龍驤墓

虎旗龍艦順長風。坐引全吳入掌中。孫皓一兒何足取。便令千載笑爭功。

題石勒城

長驅到處積人頭。大旆連營壓上游。建業烏棲何足問。慨然歸去王中州。

二

天生傑異固難馴。應變摧枯若有神。夷甫自能疑倚嘯。忍將虛誕誤時人。

劉郎浦口號

吳蜀成婚此水溥。明珠步障幄黃金。誰將一女輕天下。欲換劉郎鼎峙心。

自江華之衡陽途中作

孤棹遲遲悵有違。沿湘數日逗清暉。人生隨分爲憂喜。迴雁峯南元缺一字北歸。

吐蕃別館送楊七錄事先歸

愁雲重拂地。飛雪亂遙程。莫慮前山暗。歸人眼自明。

奉送范司空赴朔方

得游

築壇登上將。膝席委前籌。虜滅南侵跡。朝分北顧憂。抗旌迴廣莫。撫劍動旄頭。坐見黃雲暮。行看白草秋。山橫舊秦塞。河繞古靈州。善守如無事。唯應獵騎游。

送文暢上人東遊

隨緣聊振錫。高步出東城。水止無恆地。雲行不計程。到時爲彼岸。過處卽前生。今日臨歧別。吾徒自有情。

喜儉北至送宗禮南行

洞庭舟始泊。桂江帆又開。魂從會處斷。愁向笑中來。敵愾看殘景。殷勤祝此杯。衡陽刷羽待。試取一行迴。

送段九秀才歸澧州

湘南孤白芷。幽託在清溥。豈在馨香發。空勞知處深。推賢路已隔。振乏力不任。慙我一言分。負君千里心。寸義薄聯組。片誠敵兼金。方期踐冰雪。無使弱思侵。

衡州送李十一兵曹赴湘東

慷慨視別劍。淒清泛離琴。前程楚塞斷。此恨洞庭深。文字久已廢。循良非所任。期君碧雲上。千里一揚音。

臨洮送袁七書記歸朝

時袁生作僧。善呼爲袁師。

憶年十五在江湄。聞說平涼且半疑。豈料殷勤洮水上。卻將家信託袁師。

江陵酒中留別坐客

尋常縱恣倚青春。不契心期便不親。今日煙波九疑去。相逢盡是眼中人。

道州酬送何山人之容州

匣有青萍箭有書。何門不可曳長裾。應須定取真知者。遣對明君說子虛。

道州送戴簡處士往賀州謁楊侍郎

羸馬孤童鳥道微。三千客散獨南歸。山公念舊偏知我。今日因君淚滿衣。

春日游郭駙馬大安亭子

戚里容閑客。山泉若化成。寄遊芳徑好。借賞彩船輕。春至花常滿。年多水更清。此中如傳舍。但自立功名。

楚州追制後舍弟直長安縣失囚花下共飲

天子收郡印。京兆責獄囚。狂兄與狂弟。不解對花愁。

衡州歲前遊合江亭見櫻藥未坼因賦含彩悵驚春

山櫻先春發。紅蘂滿霜枝。幽處竟誰見。芳心空自知。似奪朝日照。疑畏暖風吹。欲問含彩意。恐驚輕薄兒。

衡州登樓望南館臨水花呈房戴段李諸公

天桃臨方塘。暮色堪愁思。託根豈求潤。照影非自媚。冒挂青柳絲。零落綠錢地。佳期意何許。時有幽禽至。合江亭檻前。多高竹不見。遠岸花客命。翦之感而成詠。

吉凶豈前卜。人事何翻覆。緣看數日花。却翦凌霜竹。常言契君操。今乃妨衆目。自古病當門。誰言出幽獨。道州春遊歐陽家林亭

道州城北歐陽家。去郭一里占煙霞。主人雖朴甚有思。解留滿地紅桃花。桃花成泥不須掃。明朝更訪桃源老。政成興足卽告歸。門前便是家山道。

衡州早春偶遊黃溪口號

偶尋黃溪日欲沒。早梅未盡山櫻發。無事江城閉此身。不得坐待花閒月。

衡州夜後把火看花留客

紅芳暗落碧池頭。把火遙看更少留。半夜忽然風更起。明朝不復上南樓。

夜後把火看花南園招李十一兵曹不至呈座上諸公

天桃紅燭正相鮮。傲吏閑齋固獨眠。應是夢中飛作蝶。悠颺只在此花前。

順宗至德大聖大安孝皇帝挽歌詞

遐視輕神寶。傳歸屬聖猷。堯功終有待。文德本無憂。坐學朝汾水。行看告岱邱。那知鼎成後。龍馭弗淹留。

二

監撫垂三紀。聲徽洽萬方。禮因馳道著。明自墾田彰。滋漸成鴻業。從容守太康。更留園寢詔。恭德有餘芳。

三

早秋同軌至。晨旆露華滋。挽度千夫咽。筵凝六馬遲。劍悲長閉日。衣望出遊時。風起西陵樹。淒涼滿孝思。

詠蜀客石琴枕

可憐他山石。幾歲負貞堅。推遷強爲用。雕斲傷自然。文含巴江浪。色起青城煙。更聞餘玉聲。時入朱絲絃。

河南府試贖帖賦得鄉飲酒

酌言修舊典。刈楚始登堂。百拜賓儀盡。三終樂奏長。想同鶯出谷。看似雁成行。禮罷知何適。隨雲入帝鄉。

賦得失羣鶴

杳杳沖天鶴。風排勢暫違。有心長自負。無伴可相依。萬里寧辭遠。三山詎憶歸。但令毛羽在。何處不翻飛。

道州南樓換柱

鴻災起無朕。有見非前知。蟻入不足卹。柱傾何可追。良工操斤斧。沈吟方在斯。殫材事朽廢。曷若新宏規。

道州北池放鵝

我非好鵝癖。爾乏鳴雁資。安得免沸鼎。澹然游清池。見生不忍食。深情固在斯。能自遠飛去。無念稻粱爲。

迴風有懷

銀宮翠鳥烟霏霏。珠樹玲瓏朝日暉。神仙望見不得到。却逐迴風何處歸。

蕃中答退渾詞

退渾種落盡在而爲吐蕃所鞭。捷有譯者訴情於余。以此答之。

退渾兒。退渾兒。朔風長在氣何衰。萬羣鐵馬從奴虜。強弱由人莫歎時。退渾兒。退渾兒。冰銷青海草如絲。明堂天子朝萬國。神馬龍駒將與誰。

上官昭容書樓歌

貞元十四年友人崔仁亮於東都買得研神記一卷。有昭容列名書縫處。因用感歎而作是歌。

漢家婕妤唐昭容。工詩能賦千載同。自言才藝是天眞。不服丈夫勝婦人。歌闌舞罷閑無事。縱恣優游弄文字。玉樓寶架中天居。絨奇祕異萬卷餘。水精編帙綠鈿軸。雲母抵搗黃金書。風吹花雲清旭時。綺窗高挂紅綃帷。香囊盛烟繡結絡。翠羽拂案青琉璃。吟披嘯卷終無已。皎皎淵機破研理。詞縈綵翰紫鸞迴。思耿寥天碧雲起。碧雲起。心悠哉。境深轉若坐。自催金梯珠履聲。一斷瑤階日夜生。青苔青苔闕九關。曾比羣玉山。神仙杳何許。遺逸滿人間。君不見洛陽南市賣書肆。有人買得研神記。紙上香多蠹不成。昭容題處猶分明。令人惆悵難爲情。

聞砧有感

千門儼雲端。此地富羅紈。秋月三五夜。砧聲滿長安。幽人感中懷。靜思淚汎瀾。所恨搗衣者。不知天下寒。

早覺有感

東方殊未明。閨室蟲正飛。先覺忽先起。衣裳顛倒時。嚴冬寒漏長。此夜如何其。不用思秉燭。扶桑有清暉。冬日病中卽事

牆下長安道。躡塵咫尺閒。久牽身外役。暫得病中閑。背喜朝陽滿。心憐暮鳥還。吾醫在何處。南有白雲山。病中自戶部員外郎轉司封

羸臥承新命。優容獲所安。遣時迎賀客。無力拂塵冠。偃仰晴軒暖。支離曉鏡寒。那堪報恩去。感激對衰蘭。久病初朝衢中卽事

沈疴曠十旬。還過直城闈。老馬猶知路。羸僮欲怕人。又墮三徑計。更強百年身。許國將何力。空生衣上塵。道州城北樓觀李花

夜疑關山月。曉似沙場雪。曾使西域來。幽情坐超越。將念浩無際。欲言忘所說。豈是花感人。自憐抱孤節。道州秋夜南樓卽事

誰令獨坐愁。日暮此南樓。雲去舜池閉。月明瀟水流。猿聲何處曉。楓葉滿山秋。不分匣中鏡。少年看白頭。道州觀野火

南風吹烈火。焰焰燒楚澤。陽景當晝連。陰天半夜赤。過處若箕掃。來時似電激。豈復辨蕭蘭。焉能分玉石。蟲蛇盡燦爛。虎兕亦奔迫。積穢一蕩除。和氣始融液。堯時旣敬授。禹稼斯肇迹。遍生合穎禾。大秀兩歧麥。家有京坻詠。人無溝壑感。乃悟焚如功。來歲終受益。

衡州早春

碧水何逶迤。東風吹沙草。烟波千萬曲。不辨嵩陽道。

二

病肺不飲酒。傷心不看花。唯驚望鄉處。猶自隔長沙。

郡內書懷寄劉連州竇夔州

朱邑何爲者。桐鄉有古祠。我心常所慕。二郡老人知。

偶然作

栖栖復汲汲。忽覺年四十。今朝滿衣淚。不是傷春泣。

二

中夜兀然坐。無言空涕洟。丈夫志氣事。兒女安得知。

古興

越歐百鍊時。楚卞三泣地。二寶無人識。千齡皆棄置。空巖起白虹。古獄生紫氣。安得命世客。直來開奧祕。劍任荆鐘看。玉從投火試。必能絕疑惑。然後論奇異。

風詠

微風生青蘋。習習出金塘。輕搖深林翠。靜獵幽徑芳。掩抑時未來。鴻毛亦無傷。一朝乘嚴氣。萬里號清霜。

北走摧鄧林。東去落扶桑。掃却垂天雲。澄清無私光。悠然反空寂。晏海通舟航。

道州感興

當代知文字。先皇記姓名。七年天下立。萬里海西行。苦節終難辨。勞生竟自輕。今朝流落處。瀟水遶孤城。

春日與李六舍弟聯句

始見花滿枝。又看花滿地。景儉且持增氣酒。莫滴傷心淚。溫深誠長鬱結。芳晨自妍媚。恭嘯歌聊永日。誰知此時意。景儉

鏡中歎白髮

年過潘岳纔三歲。還見星星兩鬢中。縱使他時能早達。定知不作黑頭公。

友人邀聽歌有感

文章拋盡愛功名。三十無成白髮生。孤負壯心羞欲死。勞君貴買斷腸聲。

貞元十四年旱甚見權門移芍藥

綠原青隴漸成塵。汲井開園日日新。四月帶花移芍藥。不知憂國是何人。

冬夜卽事

百憂攢心起復臥。夜長耿耿不可過。風吹雪枝似花落。月照冰文如鏡破。

道州郡齋臥疾寄東館諸賢

東池送客醉年華。聞道風流勝習家。獨臥郡齋寥落意。隔簾微雨溼梨花。

讀小弟詩有感因以口號示之

憶吾未冠賞年華。二十年閒在咄嗟。今來羨汝看花歲。似汝追思昨日花。

讀句踐傳

丈夫可殺不可羞。如何送我海西頭。更生更聚終須報。二十年閒死却休。

道州月歎

別館月。犁牛冰河金山雪。道州月。霜樹子規啼是血。壯心感此孤劍鳴。沈火在灰殊未滅。

風歎

青海風。飛沙射面隨驚蓬。洞庭風。危檣欲折身若空。西馳南走有何事。會須一決百年中。

呂衡州文集卷第三

與族兄皋請學春秋書

儒書不振久矣。溫生於百代之下。不顧昧劣。凜然有志。翹企聖域。莫知所從。如仰高山。臨大川。未獲梯航。而欲濟乎深。而臻乎極也。凡學之道。嚴師爲難。師資道喪。八百年矣。自鳳鳥不至。麒麟遇害。血流戰國。火發暴秦。先王之道。幾隕于地。賴漢氏勃然而拯之。醜糟粕。揚煨燼。披雲霧。揭日月。夫子文章。滅而復耀。與火德俱朗者。四百餘年。當時大教中興。去聖未遠。學士非師說。不敢輒言。鴻儒碩生。樂以善誘宏道。雖爲公卿。教授不輟。其徒大者至千餘人。小者亦數百人。或升乎堂。或入乎室。洋洋濟濟。有古風也。夫學者豈徒受章句而已。蓋必求所以事君。求所以事親。求所以開物。求所以化人。日新又日新。以至乎終身。夫教者。豈徒傳文字而已。蓋必本之以忠孝。申之以禮義。敦之以信讓。激之以廉恥。過則匡之。失則更之。如切如磋。如琢如磨。以至乎無瑕。故兩漢多名臣。諍諫之風。同乎三代。蓋由乎身受師保之教誨。朋友之箴誡。旣知己之損益。不忍觀人之成敗也。魏晉之後。其風大壞。學者皆以不師爲天縱。獨學爲生知。譯疏翻音。執疑護失。率乃私意。攻乎異端。以諷誦章句爲精。以穿鑿文字爲奧。至於聖賢之微旨。教化之大本。人倫之紀律。王道之根源。則蕩然莫知所措矣。其先進者。亦以教授爲鄙。公卿大夫。恥爲人師。至使鄉校之老人。呼以先生。則勃然動色。痛乎風俗之移人也。如是。是以今之君子。事君者不諫諍。與人交者無切磋。蓋

由其身不受師保之教誨。朋友之箴誡。既不知己之損益。惡肯顧人之成敗乎。而今而後。乃知不師不友之人。不可與爲政而論交矣。且不師者。廢學之漸也。恐數百年後。又不及於今日。則我先師之道。其隕于深泉。是用終日不食。終夜不寢。馳古今而慷慨。抱墳籍而太息。吾兄吾兄。亦曾以是爲念乎。小子狂簡。實有微志。蘊童蒙求我之願。立朝聞夕死之誓。所與者不唯鴻碩之老。博洽之士。與我同志者。則爲吾師。請與吾兄略言其志也。溫所貴乎道者六。其詩。書。禮。樂。大易。春秋。歟。人皆知之。鄙尙或異。所曰禮者。非酌獻酬酢之數。周旋褻襲之容也。必可以經乾坤。連陰陽。管人情。措天下者。溫願學焉。所曰樂者。非綴兆屈伸之度。鏗鏘鼓舞之節也。必可以厚風俗。福鬼神。熙元精。茂萬物者。溫願學焉。所曰易者。非探蓍演數之妙。畫卦舉繇之能也。必可以正性命。觀化元。貫衆妙。貞夫一者。溫願學焉。所曰書者。非古今文字之殊。大小章句之異也。必可以辨帝王。稽道德。輔大政。建皇極者。溫願學焉。所曰詩者。非山川風土之狀。草木鳥獸之名也。必可以做暴虐。刺淫昏。全君親。盡忠孝者。溫願學焉。所曰春秋者。非戰爭攻伐之事。聘享盟會之儀也。必可以尊天子。訓諸侯。正華夷。繩賊亂者。溫願學焉。此外非聖人所論。不與於君臣父子之際。雖欲博聞。不敢學矣。吾兄達者也。可不曰然乎。嘗閱雅論。深於春秋。其間所得。實曰淵正。竊不自揣。願以春秋三傳。執摠衣之禮於左右。童蒙求我。兄得辭乎。朝聞夕死。溫可逆乎。無以流俗之所輕。而忽聖賢之所重也。其餘五經。當今孰可爲溫師者。幸詳鄙志。而與擇焉。

大尹叔父閣下。溫聞水官修而龍至。官失其方。物乃坻伏。以文章而言。則先進爲後進之官也。亦宜正褒貶。別雅鄭。宣六義。合三變。以修其官。使後進之徒。靡然向風。皦然知方。能者勸。不能者止。於是乎文章之可見也。如掃除氛昏。澄定波濤。穹天清而日月曜。滄海晏而蓬壺出爾。今夫先進之廢官久矣。文猶龍也。其可見乎。伏惟叔父蘊特達之明。哀雅頌之缺。常欲以三代制度。訓齊斯文。前歲罷鎮南服。入侍東掖。詞林簞仰。如日登觀。莫不結轍連駟。懷編捧軸。差池道路。奔走光塵。人人自以爲齊公之遇矣。及乎昌言金馬。高議承明。懸大雅之衡。以權後進。則乃以小子爲稱首。達句萌而茂以柯葉。翼雖穀而使之頡頏。先達改觀。同類駭聽。譽動朝端。聲馳轂下。循顧反覆。誠非所堪。竊料叔父之意。豈不欲使濫音竊吹者。聞士會而西逃秦境。敦雅守正者。望郭隗而北首燕路。夫如是。則小子敢賀天下文章廢而復興。不敢自當其遇也。然大匠雖哲。不能化擁腫之材。大風雖壯。不能起凝滯之物也。曩充鄉賦。荐辱公議。昨詔賢良。猥塵清舉。疑叔父以唱高寡和。小子以名浮易喪。閒關堙鬱。卒用無成。取笑薄徒。貽羞左右。雖失鵠而知反。終胡顏而敢安。愧懼慙惶。夙夜若厲。叔父蹈中庸之德。遭兼濟之運。荷深知於明主。懸大望於蒼生。一朝秉唐之鈞軸。埏埴萬物。而高名不奪於獨見。鄙分克彰於日新。茫茫前途。未敢自料。豈遽以一第而爲得喪哉。由是思之。敦焉增氣。遂欲攝迹聲利。潛心道藝。窮六義之統紀。盡三變之形容。使學通天人。文正雅俗。然後抗衡當代。爲叔父之榮。雖知其難。志不可奪。謹獻近文七首。徒跂聖人之域。未臻作者之方。姑務自強。式酬與進。伏願特迂看覽。光賜教誨。指以遠蹤。責以大成。惠何加焉。非敢望也。

代李侍郎與山南嚴僕射書

僕射稟天全才。受國重寄。控全蜀咽喉之地。當狂奔侮之衝。處瘠土而有財。克豐訓羸師。而其武可畏。少分麾下。潛運掌中。再開劍閣之扃。繼獻鹽亭之捷。應接制使。先假地征。犄角王師。且爲鄉導。削叛人之跡。釋梓州之圍。勞實倍多。功無與讓。聖上神武睿斷。注意西南。一校之善否必知。一卒之勞逸必察。況閣下效彰朝論。事布人謠。精誠貫於神祇。茂伐懸於日月。豈復聽簿書之巧詆。元缺一字笙簧之濫音。來示所虞。無足介意。某以寡薄。謬膺寵寄。舉關國計。動屬軍期。夙夜憂慙。未知所濟。過蒙稱獎。愧惕良深。唯託方岳至公。共守王度。物估小事。固無二三。許共遵行。亦如受賜。佩荷之至。無喻下情。

代李侍郎與宣武韓司空書

某以非才。謬當重寄。事關國計。動限軍期。撫事知難。夙夜憂積。蓋以連路壅滯。私鹽撓法。力非有司所及。唯託方鎮至公。司空文武全才。勳德茂著。朝廷毗倚。中外具瞻。勤王則知無不爲。憂國則言皆可復。今春過日。獲拜旄旌。眷私之餘。已及此事。蒙許同志。叶力徇公。對敷之初。便具聞奏。所以遣裴郎中往申朝旨。議立規模。悉令諮託。大賢非敢專行。鄙見昨得巡院狀報。伏知司空德量旁通。忠誠感發。急公家之病。同職司之憂。鹽法提防。已行文牒。斗門開塞。許有商量。率先諸侯。首贊王度。義形九牧。忠動三軍。意開而遠。近承風言。發而神明。知感況某奉職之分。承眷之深。受賜懷仁。豈同常等。銘戴所至。無任下情。

代李侍郎與徐州張尙書書

元缺
一字奉別紙示諭。眷待殊異。規略端明。究忠義之苦言。暢通經之雅旨。皆足以感動朝野。光映古今。一字之貴。可懸於千金。終身佩之。何啻於三復。甚善甚善。尙書才膺閒出。識蘊生知。地承勳德。行在詩禮。自家通國。移孝爲忠。受任先朝。克荷崇構。控喉襟之地。成節制之師。動必勤王。言皆憂國。忠實彰於行事。義聲感於旁鄰。布在人謠。溢于時論。鳴鶴有和。鼓鐘必聞。聖上神武聰明。惟新覆燾。勵精戎事。注意藩隅。方欣陋以旁求。況勳賢之自著。何患乎誠不上達。道不大光。宣太阿之利用。窮彝鼎之盛烈者乎。某以寡薄。謬膺寄任。戎賦之重。撫事知慙。徒欲盡愚衷。陳鄙見。策朽磨鈍。庶效涓埃。竭誠捐軀。少酬恩遇。知我者寡。同志實難。頃在江西。過辱厚意。常懷慕仰。頗歷歲時。昨者以私鹽干禁。漸耗公利。汴州滯運。屢稽軍期。忝當職司。每積憂負。輒率誠懇。粗伸條例。網羅盜糴。節宜通渠。實託衆言。敢專獨見。果蒙宏至公之量。推急病之心。率先侯伯。首贊王度。許以別設方略。大爲提防。究絕姦源。通利國漕。神之聽之。言可復於天地。有始有卒。事必立於邦家。佇觀莫大之功。以成不朽之美。諸侯師表。天子腹心。千載一時。誠無與讓。其奉職之分。受賜孔多。拳拳寸誠。夙夜欣企。幸甚幸甚。徐儻事宜。並在使者口述。伏惟昭悉。

代辛將軍與普潤劉尙書書

某性質鄙昧。智能無取。承籍門緒。早蒙驅策。盡瘁軍府。備嘗險艱。徒竭犬馬之勞。詎濟弓裘之美。家構未克。國恩未酬。而謬典禁司。職唯侍衛。良時自晚。宿志莫申。憤血猶剛。憂髮先白。加以稟性寡合。知音實難。甘心此生。長鳴靡託。豈料尙書推宏深之量。啓特達之心。愛念不遺。眷知益重。昨者四牡來覲。萬乘虛襟。

旁求將帥之臣。佇清至公之鑒。然則蕭何之稱。必在韓信。孝文有問。宜薦雲中。而丹墀對敷。首及庸瑱。敷陳本末。獎飾逾涯。達其忠義之誠。許其遠大之致。雖躬論志業。自瀝肺肝。纖悉周詳。豈能及此。遂使鬱堙之志。允達於宸聰。樗朽之材。式孚的帝念。言發九天之上。聲聞四海之中。行得舟航。坐生羽翼。雖管鮑在齊。載深知我之感。王貢仕漢。有切彈冠之善。方諸今日。未足爲喻。不圖知己之至於斯。義激血誠。恩纏骨髓。每一念至。不覺涕流。殞首糜軀。豈能報德。唯當竭誠砥節。服義懷仁。奉以周旋。居之造次。青松得地。方見於歲寒。皦日在天。願聽其心誓。生死幸甚。屬有負薪之疾。未仲拜賜之禮。瞻感之至。荷懼兼深。拳拳下情。未知所措。稍任行李。卽冀趨謁。伏爲昭察。

代竇中丞與襄陽于相公書

某經術無取。邱園自屏。所期全拙。豈敢近名。二十五丈。汎愛博容。不遺孤陋。申以通家之好。遇以國士之禮。分慙入室。契辱忘年。猥賜吹噓。謬假鱗翼。遂得價重江右。名聞天朝。起家拾遺。再命柱史。時丁變故。命偶屯艱。孤鱗方困於蹄涔。窮鳥再歸於仁德。果蒙奏領列郡。擢倅三軍。不汝疵瑕。見容於歲月。同我休戚。每形於話言。身計皆奉良規。家事悉資全力。然後表達宸聰。推致周行。南宮劇曹。踐不終歲。憲府雄秩。拔於常倫。內顧庸虛。敢云自致。魏賢子夏。宣尼之道。彌尊漢用。淮陰相國之言。始重徒以才負。知己名懸。古人致遠之效。莫彰貽羞之責。斯及敢不砥礪微分。激昂前途。以明君今日之恩。資大賢積時之譽。庶乎有立。少蒼所知。豈敢以尸素爲榮。而負平生之論。伏惟鑒察。郡榻諸生。戎旃故吏。推獎恩重。生成感深。瞻望

門闌未獲拜謝。銘戴兢惕。莫知所裁。拳拳下情。紙墨難具。

地志圖序

廣陵李彥博達之士也。學無不通。尤好地理。患其書多門。歷世寢廣。文詞浩蕩。學者疲老。由是以獨見之。明法先聖之制。黜諸子之傳記。述仲尼之職方。會源流。考同異。務該暢。從體要。倬然勒成一家之說。猶懼其奧。未足以昭啓後生。乃裂素爲方儀。據書而畫。隨方面以區別。擬形容之詁解。命之曰地志圖。觀其分散百川。黛凝羣山。元氣剖判。成乎筆端。任土之毛。有生之類。大鈞變化。不出其意。然後列以城郭。羅乎陬落。內自五侯九伯。外洎要荒蠻貊。禹迹之所窮。漢驛之所通。五色相宣。萬邦錯峙。毫釐之差。而下正乎封略。方寸之界。而上當乎分野。乾象坤勢。炳然可觀。與夫聚米擬其端倪。畫地陳乎梗概。固不可同年而語。詳略也。每虛室燕居。薄帷晴褰。普天之下。盡在屋壁。戶納四海。窗籠八極。名山大川。隨顧奔走。殊方絕域。舉意而到。高視華裔。坐橫古今。觀帝王之疆理。見宇宙之寥廓。出遐入幽。曾不崇朝。與夫役形神於歲月。窮轍迹於區外。又不可並軌而論勞逸也。且夫刪百代之弊。綜羣言之首。繁而不亂。疎而不漏。才識以潤之。丹青以炳之。使嗜學之徒。未披文而見義。不由戶而覩奧。斯訓導之明也。窮地而述。舉世而載。事極鴻纖。理通皎昧。混一家之文軌。張大國之襟帶。覈人物之虛實。總山川之要會。表皇威之有截。明王道之無外。斯乃功用之大也。見蒼梧塗山。則思舜禹卹民之艱。觀窮荒大漠。則悟秦漢勞師之弊。覽齊墟晉壤。則想桓文勤王之霸。觀洞庭荆門。則知苗蜀恃險之敗。王者於是明乎得失。諸侯於是鑒乎興替。斯又懲勸

之遠也。然則本之所以廣學流。申之足以贊鴻業。垂之可以示後世。豈徒由近觀遠。以智自樂。爲室中之一物哉。而時無知音。道不虛行。舉地成圖。閉天無路。此志士儒林所以爲之頹息也。溫久從君游。辱命序述。庶明作者之意。俾好學君子。知其所以然。

送友人遊蜀序

始吾挹至源之貌。若隴底積雪。聳寒木於雲溪。次吾覽至源之文。若驪龍相追。弄明月於泉窟。末吾聽至源之論。若泰山欲雨。倒雲氣於滄溟。如其貌可以振肅周行。如其文可以光潤石渠。如其論可以感動宣室。而淪蕩江海。垂二十年。則不知天所以生之之意。貞元甲乙歲。以親故勸勉。來遊京師。時然後言。無辯以動衆。樂然後笑。無歡以接物。義然後取。無食以寧居。慨然悔之。決策長往。因登紫閣峯。而指曰。西南青冥色。連岷峨。吾行何歸。山盡則住。翌日告別于友人。太原王元運。顧謂余曰。高雲出岫。無時雨之會。與風悠揚。轉遠而散。若至源者。其猶雲邪。蓋亦贈之序。予和女。

送琴客搖兼濟東歸便道謁王虢州序

東海搖兼濟。年十三。從淮南大軍。有奇童之稱。歲旣冠。歷泗上劇職。振能吏之聲。而尙氣節。重言諾。臨財廉。見義勇。蘊崇具美。發以雅琴。琅琅然若佩玉之有衡牙也。貞元丁丑歲。觀藝京師。冲宇罕窺。正聲寡聽。道不苟合。浩然東歸。水流無心。遇用則止。宏農守御史中丞王公。得子最深。且東諸侯之望也。儻羽翼吾道。鏗鏘爾音。飛而鳴之。一日千里。則何公門不可曳長裾。大丈夫風波未始有極。生死且不足問。況能離

憂乎。白露降。秋雲起。仰見太華。壯心勃興。若不激徵變商。是孤慷慨。吾季恭也。詩有逸氣。盍韻鍾律。播于絲桐。

聯句詩序

河東柳茂直與余有潘楊之睦。且道義相得也。余兄弟志守拙默。不交當世。晨昏之外。靖專一室。顧我者唯茂直而已。以爲切磋蓋常事。討論有宴息。道志氣徒然起憤。議時事予欲無言。其或晴天曠景。浩蕩多思。或永夜高月。耿耿不寐。或風露初曉。恍若有得。或烟雨如晦。緬懷所思。則何以節宣慘舒。暢達情性。其有易於詩乎。乃因翰墨之餘。琴酒之暇。屬物命篇。聯珠迭唱。審韻諧律。同聲則應。研情比象。造境皆會。亦猶衆壑合注。霈爲大川。羣山出雲。混成一氣。朗宣五色。微闡六義。雖小道必有可觀。其在茲矣。茂直命余序述。存以編簡。俾後之觀者。知吾黨所立之濫觴。

送薛大信歸臨晉序

先師曰。益者三友。吾能得之。豈唯直諒多聞而已。可以旁魄天人。談堯舜之道。則有吾族兄皋。可以根本情性。語顏夷之行。則有太原王師簡。可以發揚古訓。論三代之文。則有河東薛大信。此三君子。或道以樂我。或行以約我。或文以博我。遭時則有光。遯世則無悶。其爲益也。不亦大乎。大信與予最舊。始以孝悌餘力。借學於廣陵之靈巖寺。雲卷其身。討論數歲。常見大信述作。必根乎六經。取禮之簡要。詩之比興。書之典刑。春秋之褒貶。大易之變化。錯落混合。嶢嶢特立。不離聖域。而逸軌絕塵。不易雅制。而瓌姿萬變。有若

雲起日觀。盡成丹霞。峯坼靈掌。無非峻勢。皆天光朗映。秀氣孤拔。豈藻飾而削成者哉。聖上方欲觀人之文。潤色洪業。秉筆者如三光得天。每賀大信有其時矣。無何。予被鄉曲之譽。賦于闕下。以文乖時體。行失俗譽。再爲有司所黜。此時大信亦與計偕。知機全高。匣刃不試。昔趙殺鳴犢。仲尼臨河而逝。予之見黜。子亦逡巡。事雖不同。其所感一也。歲八月以岵岵之戀。告予于歸。予思古人有處有贈。乃語之曰。吾聞賢者志其大者。文爲道之飾。道爲文之本。專其飾則道喪。反其本而文存。且使不存。又何傷矣。彼邦是帝堯之遺俗。唐叔之所理。必有忠信如君者焉。問安之下。可與之處。琢磨仁義。寢潤道德。存皇王理亂之迹。求聖哲行藏之旨。達可以濟乎天下。窮可以據其光明。無爲矻矻筆硯間也。行矣大信。苟非同志。勿失予言。

道州律令要錄序

溫頃累忝官尚書省。御史臺。徧觀諸曹。多書令式格律於其屋壁。苟非以宦遊爲惰而奉其職者。皆得日夕省覽。臥起出入。目存心悟。章章然如貫珠。如循環。吏無以欺。臨事不惑。決繁滯。舉枉直。而叶于大中。中人以上。固可循致。吾不知其誰首之。何前賢處心卹事之周也。若州縣者。卑而近於人。遠而切於得失。動有懸人命關風俗。而惰者委成於一吏。望空而署。勤者檢閱山積。神憤氣沮。卒無所歸。政令之弊。不亦宜乎。此州法吏何洛庭。良士也。與撮其要。講其義。書于廳事之左。溫不深於法。猶慮未盡。後來君子。其究成之。此長人者之所急。元和五年五月二十七日。

裴氏海昏集序

海昏集者。有唐文行之臣。故度支郎中。專判度支事。贈尚書左僕射。正平節公。裴氏諱某。字某。考地毓德。會友輔仁。氣志如神。英華發外之所由作也。初。公遠河洛之難。以其族行。攀大別。浮彭蠡。望洞庭。迴翔于匡廬。流眄于海昏。海昏有甌山之奇。脩江之清。陽溪之邃。陽泉之靈。竹洞花塢。仙壇僧舍。唯犬鐘梵。相聞於青嵐白雲中。數百里不絕。時也。俗以遠未擾。地以偏而寧。開元之遺老盡在。猶歌詠乎升平。公悠然樂之。遂與我外王父故屯田郎中。集賢殿學士。河東柳公諱某。外叔祖故相國宣城伯諱渾。洎故太常卿蘭陵蕭公定。故祕書少監范陽盧公虛舟。故左庶子隴西李公勛。爲塵外之交。極心期之賞。唯故給事中汝南袁公高。故將作監河南元公巨。以後進預焉。江左搢紳諸生。望之如神仙。邈不可及。每賦一泉。題一石。毫墨未乾。傳詠已徧。其爲物情所注慕如此。無何。朝廷命公盈虛東南。漕引吳楚。中原百萬之衆。仰食於公。人不堪其煩。我若無其事。往往佩聯印。擁大蓋。枉道而過。舊山林壑之間。琴詩不廢。心計願指。而軍國飢贍。其大雅之全材者歟。於戲。太尉侍中勤勞王家。惠于生人。至公再世。又以盛德屈於年運。慶如壅川。其決必大。由是焜耀之烈。重集于我郇公。郇公始以大孝聞。中以大用顯。次以大忠升。藩屏三朝。出入二揆。述先職而掌邦賦。修祖德而踐台衡。理荆之政。篆在樂石。定蜀之武。藏。在冊府。漢南之化。洽于人謠。加以優游藝文。悼悅經術。身被華裘。門全素風。不畏強禦。不侮孤賤。久要皆當代長者。推轂必一時雋傑。海內士大夫。如鱗羽之歸龍鸞也。君子曰。憲公忠獻公之勤德。節公之雅道。爲不亡矣。郇公以霜露之感。泣編遺文。思所以垂諸不朽。以爲節公消息出處之道。始于海昏。遂於正集外。別次當時唱和遊覽餞勞之

作凡九十六篇。勒爲海昏集上下卷。不遠三千里。授簡於小生。俾酌歸趣而爲序引。溫常備中臺之屬。實辱至公之遇。聞命以哀。敬不敢文。爲姑陳古義。用贊風訓。昔者三代陳詩以觀民風。信詐淫義。躁靜柔剛。於是乎取之。喜怒哀樂。吉凶存亡。於是乎觀之。兆於此必應於彼。成乎終必見乎始。詩不可以爲僞。魏公子爲南皮之遊。以浮華相高。故其詩傲蕩驕志。勝而專。動而不安。晉名士爲金谷之讌。以邪侈相扇。故其詩濫溺淫志。冶而緩。往而不返。正平公爲海昏之會。以禮義相誨。故其詩恬淡退志。莊直立志。退以獨全其道。立以兼濟於時。立而不矜。退而不悲。適而不放。樂而不荒。親而不比。數而不黷。如切如磋。婉而有直體。曰比曰興。近而有深致。仁者見之。遁世而無憂。智者見之。愛身而有待。曖乎若冬陽之煦。油乎若春澤之浸。其誘人也易。其感人也深。卒不知其所以然也。夫如是。則觀南皮之詩。應劉焉得不天。魏祚焉得不短。觀金谷之詩。潘石焉得不誅。晉室焉得不亂。觀海昏之詩。裴氏焉得不興。我唐焉得不理。詩之時義。其大矣哉。天人國家之際。其至矣哉。爲節公、郇公之子孫者。其無忘哉。元和五年五月七日。朝議郎、使持節、道州諸軍事、守道州刺史、上騎都尉、賜緋魚袋、東平呂溫謹述。

呂衡州文集卷第四

代李侍郎論伐劍南更發兵表

臣某言。臣伏見某月日詔旨。更發太原鳳翔。及神策諸鎮兵赴劍南。東川者。陛下睿算無遺。神武必斷。與人除害。順天行誅。奮如霆之威。乘破竹之勢。期於久逸。無憚一勞。大正國經。永清時祲。百王盛事。千古英聲。天下幸甚。天下幸甚。然或時事之可否。兵家之利病。道塗之險易。將帥之宜稱。不可不深圖遠計。原始要終。狂夫有可擇之言。愚者有一得之慮。管窺所至。願效微忠。臣竊以爲古今用兵。皆在將勇師和。政齊計勝。不必多兵廣衆。然後成功。今高崇文等諸將所統。已約一萬五千餘人。以整擊亂。以順討逆。授之廟算。假以天威。馘醜摧凶。需有餘力。若更多徵。征鎮廣合。師徒臣竊計之。其患有五。一則高崇文素非大將。拔自偏鎮。忠勇雖著。恩威未洽。本兵旣少。兼統則多。將皆權隸。士非素撫。雖是銳師。勢同烏合。居常則猶可脅制。臨敵則何以指揮。非唯崇文才分有限。此亦自古兵家所難。臣不敢廣引載籍。上煩聖聽。請直以近事明之。哥舒翰潼關之守。郭子儀相州之圍。韓全義澗水之役。皆以兵多將雜。而致敗衄。許叔冀之保靈昌。李光弼之全河陽。李晟之收復京邑。皆以兵少將一。而建大功。成敗昭然。布在人口。二則貞元已來。天下無事。四方節將。人各懷安。陛下覆燾惟新。理先清靜。今以西南小醜。久稽天誅。自春徂夏。徵發已廣。見在兵力。破賊有餘。若更務濟師。屢聞動衆。山劍深阻。暑溼爲沴。北人南役。誰不憚行。去土離家。動生愁

怨。往年涇州叛卒。職此之由。事繁安危。不可不察。三則吐蕃盟好未定。窺伺在心。閒謀往來。急於郵傳。又必持兩端之計。與劉闢交通。若聞發兵西南。多取邊卒。秋風卽至。虜馬已肥。冒險乘虛。必有侵軼。事出萬一。悔何可追。四則劉闢窮寇。保險逃死。雖淫禍助順。天道甚明。而兵凶戰危。人事難必。脫或貔武之師。小不如意。蜂蟻猶聚。假息旬時。攻守之間。動須應援。固當潛鋒養銳。以逸待勞。今便悉兵。後將何繼。五則劍川磽瘠。居人食且不充。蜀路險艱。餉運無由多致。今屯兵日費。何啻萬金。數州米粟。糴且將盡。千里飛輓。所濟幾何。若更加兵。實難供贍。一夫脫有菜色。三軍無復鬪心。幸可少以成功。何必多而爲患。今太原及神策等軍。已上道者。其數頗多。足辦戎事。其鳳翔等鎮。未發之兵。伏乞聖恩。且勒權停。續候事宜。以議行止。臣謬膺重任。過蒙恩遇。輒率狂瞽。輕黷宸聰。苟利國家。甘心鼎鑊。無任兢惶懇迫之至。謹奉表陳奏以聞。

代李侍郎賀德政表

臣某言。臣聞上天垂象。當分野者先知。元后用心。奉職司者方見。是以堯稱光被。四岳得於疇咨。舜號文明。九官稟於分命。豈非隨方表志。因事立言。陳力自參於化源。造膝難迷於日用。伏惟皇帝陛下。睿圖濬發。元德廣運。恢纂鴻緒。允升大猷。振十聖之遺休。復百王之墜典。至如崇陵盡瘁。率禮無違。長信歸尊。因心則感。內成則仁。敍九族。外平則義。協萬邦。厚俗則寵及高年。廣孝則榮加錫類。能刑則朝無隱慝。善任則野無遺賢。修文則戎蠻來王。整武則南北繼捷。此皆事光日月。聲洽寰區。黔首之所謳歌。搢紳之所抃

歎其或機參造物。意兆先天。事隔於人謠。功隱於朝聽者。若非奉職之臣。官業所及。諒無得而稱焉。臣以庸劣。謬膺寄任。調益虛而馭輕重。關成敗而繫安危。職思其憂。夕惕若厲。每因罄率。披竭恐忠。頓奉溫顏。累承睿旨。有以知造化之意。有以見天地之心。曠若發蒙。晰如愈疾。管窺所至。可得而言。昨者臣以潮州刺史李璿。橈縱私鹽。耗廢公利。請從免職。以儆慢官。陛下以爲法令改更。且當申諭。道塗悠遠。容或未知。俾爲後圖。用緩前責。宏恕包於廣大。明察貫於精微。此卽羣臣不可望清光者一也。江南西道觀察使楊憑。奏以支郡旱歉。經賦不充。請征居地之羨。且修稅茶之法。陛下以爲天災流行。有時而息。人怨滯結。貽患則深。縱無日新之美。忍復已除之弊。特令寢奏。姑務通商。有司知畫一之方。負販有昭蘇之望。此又羣臣不可望清光者二也。臣當使推官殿中侍御史崔太素。奉使淮南。臣以其名秩甚卑。濬決務重。徵令郡縣。整訓役徒。須示等威。請賜章服。陛下以爲職任伊始。勤效未成。必有可觀。乃申後命。臣再陳所切。方可其奏。雖事從權與。且符濟物之宜。而賞不僭行。已見永圖之旨。此又羣臣不可望清光者三也。臣對敬之日。親奉德音。知臣使司支計闕少。必擬昭明儉德。振起素風。率身爲天下之先。節用自宮中而始。又云臺殿舊制。已當惕慮。經營改作。非所措懷。將不崇三尺之階。豈復費十家之產。發自宸念。形于天顏。意開而河海自清。言出而神祇知感。此又羣臣不可望清光者四也。陛下光臨大寶。星歲將周。貴戚之賜與無聞。恩倖之霑濡殆絕。至於贍軍供國。行賞報功。則必鴻毛府庫。糞土金玉。遂使夏州諸將。恨效淺而恩深。劍外三軍。知生輕而義重。此又羣臣不可望清光者五也。夫唐虞盛烈。文武餘風。莫不傳諸聲詩。布在方冊。

且匹夫匹婦。片善必書。飛羽沈鱗。一祥皆紀。況陛下動關教化。言在政刑。理參至道之精。躬行盛德之事。而冲虛謙讓。鬱而未發。將何以光揚藝祖。昭示後昆。伏請宣付史官。永爲代法。臣幸蒙恩遇。獲奉昌期。言必親聞。事皆目覩。分深骨髓。義激血誠。輕黷宸嚴。魂守飛越。臣無任激切屏營之至。

代國子陸博士進集注春秋表

臣某言。臣聞惟睿作聖。觀乎人文。達則化成。窮則垂訓。先師所以祖述堯舜。志在春秋。懸衡百王。撥亂三季。正大當之本。清至公之源。通羣方以誠。貞天下於一。動無不順。道德之元機。斷無不齊。帝王之利器。而梁木既壞。生知蓋寡。三傳得失。索隱未周。羣儒異同。致遠皆泥。沒微言於滋蔓。亡要旨於多歧。奧室不開。漫逾千祀。天其或者。將有俟焉。伏爲陛下德合乾坤。明並日月。氣和物茂。遠至邇安。欲以人情爲田。講學而耨。鎮定皇極。輝光時雍。道之將行。實在今日。臣不揣蒙陋。斐然有志。思窺聖奧。仰奉文明。以故潤州丹陽縣主簿。臣啖助爲嚴師。以故洋州刺史。臣趙匡爲益友。考左氏之疎密。辨公穀之善否。務去異端。用明本意。助或未盡。敢讓當仁。匡有可行。亦刈其楚。輒集注春秋經文。勒成十卷。上下千載。研覃三紀。元首雖白。濁河已清。微臣何幸。與道相遇。竊以德之匪鄰。骨肉無應。道苟訢合。古今相知。然則堯舜之心。非宜尼不見。宣尼之志。非陛下不行。庶因儀鳳之辰。永洗獲麟之恨。且臣官忝國學。思非出位。道爲家寶。罪實欺天。謹昧死寫前件書。詣東上閣門奉進。伏候聖旨。輕黷宸嚴。魂爽飛越。無任兢懼屏營之至。

代齊賈二相賀遷獻懿二祖表

臣某等言。臣伏見。今月十四日。制命以尊尊親親之義。虔附獻祖。懿祖。於德明興聖廟室。正太祖景皇帝。東向之尊者。十五日奉遷事畢。十六日祫饗禮成。日月貞曜。乾坤定紀。稱情靡忒。合敬有歸。百神得受職之方。萬國知來祭之本。中賀臣聞國有事莫大於嚴祀。祀有經莫崇於尊祖。夏殷得之以繁祉。周漢用之而休明。爰自魏晉迄于隋氏。或以祚短而不及祧正。或以時難而未遑討論。紛綸興謝。綿曠載祀。竟虛盛美。允屬昌期。陛下道冠前王。慶殷累聖。奉無競之烈。克廣鴻休。瞻有赫之靈。思正大典。精誠感念。肝食疇咨。內斷皇明。俯裁羣議。奉祖宗於常尊之地。定昭穆於式序之宜。清廟肅雍。元穹保佑。奔走夷裔。鼓舞生靈。煥乎觀一代之光。盛矣接千年之統。臣等自鍾舛薄。坐嬰衰瘵。不獲躬執籩豆。稱慶闕庭。誠仰聖敬。深孝理。形留神往。倍百恆情。

謝除左拾遺表

臣温言伏奉制命擢授臣左拾遺。又中使毛進朝至臣宅奉宣進止。賜臣本官告身者。澤濡窮鱗。雷起幽墊。塵忝近侍。冠軼常倫。震驚失圖。兢跼罔據。中謝臣嘗學舊史。承訓先臣。皆以奉上自致爲榮。附下苟進爲恥。臣所以旣孤之後。義不依人。賣洛中薄田。歸闕下舊宅。退藏其迹。私誓于心。不邀利於權門。不求名於衆口。星霜苦節。夙夜精誠。唯願投軀盛時。自結明主。愚誠神感。人欲天從。果蒙陛下。自記姓名。猥憐孤直。振零丁於絕望。拔曖昧於無階。獨斷皇明。超寘清列。俯降中貴。內賜官告。特違恆例。光寵賤臣。俾其不出戶庭。坐生羽翼。萬乘知己。一鳴驚人。公朝得盡節之方。私室無謝恩之處。願惟凡瑣。叨此殊尤。纏激血

誠銘鏤膚骨。採拔恩重。泥塗感深。畢性命以爲期。裂肝膽而何述。唯當竭誠陳力。效節明忠。使丹心有孚。白首無點。然後敢望披雲捧日。一識天顏。則闔門之灰粉知歸。百生之志願斯畢。無任感恩榮耀之至。

批答

省表具之。卿元缺一字。修學藝。行稟溫良。用命諫官。列於近署。亦惟朝典。煩有表章。所謝知。

謝章服表

臣溫言。今月二十一日。高品薛益珍。至鳳翔府奉宣進止。賜臣緋衣魚袋笏并袋紫衣一副者。發揚宸念。照灼恩光。瞻奉自天。戰跼無地。中謝臣孤陋無取。過蒙獎錄。聖慈周洽。天造曲成。恩重出疆。俾諧盡飾。九重清祕。不忘絕域之單車。萬乘憂勤。特記微臣之命服。衣分內府。錫及近藩。未申汗馬之勞。遽冒濡鵠之刺。在筥增感。撫躬若驚。殞越兢慙。罔知攸措。

蕃中賀順宗登極表

臣溫言。六月十四日。入蕃告哀使。左金吾衛將軍兼御史中丞。田景度。至吐蕃別館。伏承皇帝陛下。以正月二十六日。明德奉天。纂臨宸極。重光升耀。百化惟新。澤被幽遐。慶覃動植。中賀臣聞和氣旣蒸。句萌必達。時雨將降。柱礎猶知。臣從役單車。閉留絕域。天臨日照。而別處幽陰。雷動風行。而兀爲聾聵。伏賴陛下。義敦柔遠。禮及窮荒。始獲虔奉德音。仰霑聖澤。具寮就列。無階蹈詠之初。庶物效靈。獨在飛沈之後。舛薄鍾命。恥玷自躬。疚心厚顏。罔知攸措。今月七日。自別館迴至河州大夏川。卽以十二日進發。星言夕惕。莫

敢追寧瞻望闕庭。載深感躍。無任喜抃屏營之至。

代文武百官上尊號第三表

臣某等言。臣等自管窺天。以凡揆聖。虔奉徽號。罄陳至誠。而再降謙光。未迴宸睭。慙跼罔據。仿徨失圖。中謝臣聞強名曰道。莫體混元之功。推大于天。豈報生成之德。徒以定物視聽。示人津涯。俾其會歸。有所則象。伏惟皇帝陛下。克廣睿圖。紹休聖緒。順考古訓。茂宣重光。亭毒以佐天和。震曜以除人害。性與道合。身爲化先。神行六幽。威動九服。求珠赤水。觀妙用於無方。檢玉名山。告成功而有日。豈可過損盛德。不昭鴻休。棄臣子瀝血之誠。沮華夷傾首之望。當仁必受。乃曰至公。與物無私。甯嫌在己。安卑者地。山岳之峻。豈慙好謙者天。日月之光。何讓道貴傳繼。禮從宜稱。邦家之舊典。不可以廢。天人之合應。不可以違。臣等謬服官常。親承至化。一披肝膽。三黷宸嚴。隕越爲期。俯伏以俟。實望陛下。隨時立教。以欲從人。游神於不宰之鄉。屈己於有名之域。潤色大寶。發揮皇猷。古今一時。天下幸甚。無任懇迫屏營之至。

代文武百寮謝宣示元和觀象歷表

臣某等言。伏見今月十三日。宰臣奉宣聖旨。以肇建元和。惟新寶歷。極其幽蹟。冠以睿文。恩示百寮。慶昭萬國。中謝臣聞清濁既判。象數相生。一元起於帝圖。三統成於人道。形器之表。推步而得。恍忽之際。錙銖不差。有開必先。聖作物覩。伏惟皇帝陛下。誕膺駿命。敬授人時。爰詔日官。底定歷法。啓閉元氣。節宣羣生。役五運於文字。貫七曜於珠璧。仰觀俯察。允協於神休。東作西成。永貞於農候。感動夷夏。鼓舞飛沈。天子

之大政行焉。聖人之能事畢矣。臣等幸備朝序。親奉昌期。竊見天心。敢迷日用。無任蹈詠。

代文武百寮賀放浙西租賦表

臣某等言。伏見今月十五日制命。以天下經賦。首於東南。浙右諸州。荐罹災歉。全已逋債。大敷湛恩。人謠勃興。朝聽震動。中賀臣聞三五已降。綿曠千祀。爲邦之政。盡在欲理之主。甚衆莫不知傳戒獨豐。語稱與足。至於愛人節用之際。約躬紓國之時。則必情隨事遷。以欲忘道。故曰。人鮮克舉行之。惟艱。伏惟皇帝陛下。濬發睿圖。紹休聖緒。躬行慈儉。子育困窮。皇明燭幽。惠訓不倦。撫臨萬國。曾未再周。深求疾苦之源。屢下蠲除之詔。裁戎祀之經費。減乘輿之服御。雖邦計之有羨入。憂於未憂。雖生人之樂輸。損之又損。風行號令。日貫精誠。明神聽其德音。和氣生於文字。將舟車所及。咸升至理之期。豈江湖下方。獨被曲成之澤。臣等尸素有日。獻納無聞。尙勞聖心。軫恤人隱。甘同凡品。不敢望於清光。竊與疲甿。共謝生於元造。無任喜抃感躍之至。

代文武百寮謝許遊宴表

臣某等言。今月二十三日。宰臣奉宣進止。如聞百寮士庶等親友追游。公私宴集。及盡日出城餞送。每慮奏報。自今已後。各暢所懷者。志存必信。義切同休。令行如春。神應若響。寒木暉潤。嚴風變和。推己感於人心。發生先於天意。中謝臣聞與人同其樂者。不必盡致於韶夏之庭。在夫不奪其歡而已。與物致其誠者。不必日效於丹青之信。在夫不察其細而已。況乎搢紳之樂名教。聚皆以類。臣子之事君父。遊必有方。豈

足輕簞物情。遽塵天聽。伏惟皇帝陛下。光纂十聖。威臨萬國。神武功就。人文化成。窮溟無波。豐歲將晏。樂奏穆清。感深乎共樂之道。駕言遊幸。思所以適人。之方。爰詔輔臣。式將明命。優諭卿士。達于庶人。琴筑追遊。無憚京轂。輜輶送遠。勿限嚴城。禁吏司之苛察。盡朝野之歡泰。始覺飛沈之樂。宇宙之寬。物不自疑。人知得所。在宗載考。夜飲承湛露之恩。求友相鳴。時宴奉需雲之慶。浹休聲於夷夏。蒸喜氣於山川。千載之心。飽思屬厭。醉念溫克。戒竹林之虛誕。去金谷之浮華。君雖不察於泉魚。臣敢有愧於屋漏。承歡且懼。居寵彌驚。稽首知慙。殺身何報。無任感恩兢惕之至。

代文武百寮進農書表

臣某等言。臣等伏准故事。每年二月一日。以農務方興。令百寮具則天大聖皇后所刪定兆人本業記進奉者。中謝臣聞不愛牲玉。祈穀于圓丘。可以致誠。未足以爲勸。躬秉耒耜。藉田于千畝。可以示勸。未可以教人。必也殷天地之和。順陰陽之理。利其器用。精闕法式。變之而不倦。動之而不勞。四海靡而風行。百姓迷其日用。宏我政本。實惟農書。伏惟睿聖文武皇帝陛下。德茂生成。道光慈儉。捐金而寶穀。非食而粒人。考堯典以授時。稽禹貢而任土。絜粢盛而大事在祀。銷劍戟而盡力爲農。豐年屢薦於郊歌。嘉瑞繼光於國史。而不自滿假。惟懷永圖。每至獻歲載陽。仲春初吉。俯察土膏之候。仰觀農正之祥。經始歲功。導揚生德。徵有司之舊典。奉先后之遺文。深居穆清。親覽奧妙。匪崇朝而盡更田畝。不出戶而遍洽人情。見梓草

坏土之艱。知寒耕熱耘之苦。宸心感念。叨畝昭蘇。一歎而時雨先飛。三復而春雷自起。臣等業慙學稼。祿過代耕。親承務本之風。日奉在勤之訓。三時不害。觀玉燭於氤氳。九扈孔修。賀生靈於富庶。謹繕寫前件書凡七十二篇。共成三卷。謹詣東上閣門奉表陳獻以聞。

代杜司徒謝上表

臣某言。伏蒙聖恩。以臣久更重職。謬踐中台。爰詔有司。俾選良日。授節冊命。備禮洩官。當千載之休期。復三公之故事。俯僂恭命。震驚失圖。中謝臣聞。官以昭德。物以表功。賞不僭行。禮無虛設。臣識非經遠。才乏將明。階緣恩遇。叨承寄任。漫踰三紀。祇事四朝。徒竭筋力之勤。曾無塵露之效。陛下矜其衰疾。許釋煩重。而猶委代天之務。正論道之司。拜冊彤庭。奉謁清廟。被之法服。導以羽儀。會府宿設。羣官序送。降德音於中貴。分肴醴於御廚。事出殊恩。動爲榮觀。禮成而退。身驚日月之光。寵極自思。心醉雲天之澤。素髮垂頰。華裘在躬。喜過生悲。感深以泣。雖志同犬馬。願奉主於無疆。而年在桑榆。將報恩而何力。無任感抃屏營之至。

代杜司徒賀赦表

臣某言。伏見今月二日制書。改元元和。大赦天下。新雷雨之澤。重日月之光。仁被幽遐。慶覃動植。三元經始。萬化惟新。中謝臣聞。義軒馭物。堯舜爲君。德莫盛於好生。政莫宏於在宥。然而事資體要。理極精微。百王所難。千載斯遇。伏惟皇帝陛下。纂臨大寶。光啓睿圖。當獻歲之辰。順陽春之氣。朝前殿。御正門。發德音。

布慈旨。明大孝之本。褒至忠之後。省徭損稅。以清疾苦之源。蕩累滌瑕。以厚廉恥之俗。往典所未舉。前代之所未該。莫不悉出宸衷。咸歸聖政。坐開仁壽之域。佇見雍熙之期。凡在生靈。孰不慶幸。況臣陳力歲久。受恩最深。而蒲柳餘年。犬馬多疾。不獲奉觴丹陛。蹈詠康衢。猶蒙天眷。再留聖慈。曲至特降中使。俯加慰勉。衰德增氣。枯朽生枝。施重邱山。感深骨髓。闔門灰粉。豈足上報。無任喜懼屏營之至。

呂衡州文集卷第五

代李侍郎賀收西川表

臣某言。伏見高崇文奏以九月二十一日。官軍入成都府。逆賊劉闢走出。見勒兵追捕者。臣聞夏震秋落。乃觀成物之功。善陣有征。方見勝殘之理。然則殺之所以生之也。動之所以綏之也。氣和則歲功早就。德盛則廟算先期。無遺鏃而巨寇窮奔。不血刃而全蜀底定。奔走夷裔。鼓舞生靈。騰瑞氣而躍祥風。披慶霄而捧白日。中賀伏以陛下纂臨宸極。惟新庶政。拓迹開統之始。作法定制之初。而賊闖敢犯天威。首干大紀。恃險與遠。窮凶極暴。雖禍淫助順。誠天道之必然。而制勝舉全。皆聖謨之自出。一昨諸軍既集。鋒鏑爭先。陛下以爲方暑用兵。觸冒害氣。與勦人而欲速。寧全衆而功遲。遂令緩螻蟻之誅。抑貔貅之銳。休養磨礪。以須秋期。由是感恩而思奮者。萬心如一。又高崇文疾惡太甚。殺傷小過。陛下推弔伐之義。宏覆燾之慈。寇逆是誅。吾人何罪。遂令逐北者生。致爲上脅從者獲。則免之。且諭鴻私。仍加宴慰。由是飲澤而嚮化者。十室而九。加以聖慈曲被。大信有孚。當挾纊之時。賜戰士悉出內府。開食椹之路。賞降者曾不踰辰。遂使昏迷革心。義勇增氣。江山自拔。雷雨長驅。渠魁假息而逃威。士衆順風而捨仗。市不易肆。巷無驚犬。人蒙肉骨。戶解倒懸。旌旗導長養之風。金鼓動發生之氣。然後知至仁能殺。睿略無方。大典用彰。神武可畏。全苞形氣之內。有罪必誅。旁行天地之間。無思不服。臣謬膺重寄。親奉昌期。坐觀氛祲之清。目覩鯨鯢之

戮手舞足蹈倍萬恆情。

代李侍郎謝用內庫錢充南郊賞表

臣某言。臣今月十三日。面進奉止。其南郊賞設錢。恐度支計闕少。以內庫錢物充者。臣聞王者以四海爲家。君道惟百姓與足。象天平施而無別。如地生財而不私。薄奉己而厚奉公。重從人而輕從欲。知則孔易行之惟艱。曠代莫聞。今日斯遇。伏惟皇帝陛下。誕膺駿命。富有萬邦。而能寶元元。慈儉之宗。奉列聖憂勤之緒。臣謬司禹貢。竊見堯心。非戎祀之用無急宣。非軌物之經無別獻。土木之功。遂聞于廢息。恩幸之賜。殆絕於霑濡。固已行路謳吟。措紳抃歎者久矣。伏以郊禋有日。慶澤自天。楚師思挾纊之恩。漢將望解衣之惠。國存舊典。事有恆規。在臣職司。敢不供集。陛下憐江淮甫罹早歉。念庸蜀新罷大兵。雖經費有餘。而聖慮猶軫。昨因伏奏。親奉德音。悉擬發內府金錢。御服繒綵。約躬節用。紓國贍軍。允叶師和。克虔祀事。必知感神之德。未酌獻而幽通。動天之誠。先燎烟而上達。百祥所降。萬福攸宜。信可以光洽寰區。夙掩圖篆。家知自遂。戶識至公。風人寢抒軸之詩。黔首臻富庶之域。微臣何幸。獲覩昇平。至德難名。載深感躍。無任喜抃激切之至。

代李侍郎賀雨雪感應表

臣某言。臣聞周陳洪範。王者之首政惟農。魯作春秋。國家之大事在祀。農憂旱之爲虐。祀戒雨之失容。亦由聖感節宣。孰云冥數前定。臣伏見比者冬陽愆候。宿麥未滋。陛下減饒撤懸。晨興夕惕。加以郊禋日近。

輦路塵飛。竊慮增軫。聖情微昏。羽衛帝誠。神應人欲。天從果得。風雨叶期。陰明若契。每至乘輿。就次御幄。寧居然後。助汎掃於前驅。效霑潤於清道。及夫廟廷金奏。則橫漢昭回。壇墀煙升。則纖羅不動。從容成禮。鼓吹還宮。御正陽之門。施作解之令。懽呼夷夏。踊躍生靈。三代之備物。克終百王之能事。斯畢神休。坐降瑞氣。潛蒸玉鑾。僅輟其行音。素雪已飛於前殿。盈尺表慶。成花效奇。洽萬國之歡心。啓千載之昌運。若非孝踰舜德。勤過堯心。則何以禮一接而幽報隨。彰景未移而明徵遽。至上辛受福。獻歲告豐。天地迴動於精誠。陰陽變化於宸念。始悟竹宮望拜。徒神無用之光。交門作歌。乃爲語怪之事。臣謬膺重任。獲侍嚴祠。嘉候殊祥。愜心在目。受恩旣深。於庶類同休。豈止於恆情。手之足之。罔知攸措。無任感躍屏營之至。

代李尙書賀生擒李錡表

臣某言。臣得某官某乙狀報。伏承今月十三日夜。浙西將士張子良等。相率效順。生擒李錡者。天討有罪。國無稽誅。夷夏同歡。飛沈咸躍。臣某誠歡誠感。頓首頓首。臣聞養氣方蒸。伏陰不能藏其沴。必疑戰發。泄以彰正陽之功。至化方融。大姦無以隱其慝。必凌犯誅夷。以耀聖人之武。沴不盡消。生德不遂。姦不盡發。聖功不成。蓋自然之明徵。而必至之恆理。伏惟皇帝陛下。光膺駿命。恢纂鴻休。仁育羣生。義征不憚。無與讓而誕修文德。不得已而有此武功。日者周歲之間。大刑再舉。朔陲叛將。獻首於九廟之庭。益部兇渠。伏鑽於萬人之目。被髮左衽。且猶知懼。宵形含氣。孰不革心。賊錡身齒人倫。家承宗籍。三朝任遇。五族輝光。而獨藏禍謀。密聚姦黨。梟琳之牙旗。尚在。忽已發狂。戮鬪之血刃。未乾。敢茲拒命。陛下重難戎事。深愍遠

人先示招諭。後加討伐。方伯嚴兵。有司調食。經略纔下。形勢已張。果得義勇。叶心鬼神。假手大旆。迴指長戟。合圍兵火之氣。天運金鼓之聲。海震曾不終夜。遂擒元兇。巷有居人。市無改肆。滔天之逆。踰月而平。去歲西征。則善陣不戰。今茲東伐。則善師不陣。有以見睿略天縱。神武日新。聖道久而投刃皆虛。德澤深而用力彌寡。從此災窮。殄盡俗變。風移百蠻。成冠帶之鄉。五兵爲耒耜之器。溥天同軌。比屋可封。古今一時。堯舜何遠。臣謬膺重寄。特荷殊恩。再逢河海之清。三觀鯨鯢之戮。志深除惡。義切同休。歡抃之誠。倍萬恆品。無任手舞足蹈之至。

代武相公謝賜槍旗器甲鞍馬表

臣某言。今日中使某乙至臣宅。奉宣聖旨。賜臣槍旗器甲。案馬錦繡綵物等。禮殊其數。物備其容。肅以將威。煥以昭寵。雲澤濡體。天光照門。并駭失圖。兢惶罔據。臣中謝臣才無可取。進不因人。陛下憐其小心。知其盡節。特紆宸睞。謬委台司。匡補之益。無聞將明之效。靡著。方俟嚴譴。忽蒙殊恩。寄重西南。任兼中外。封開大郡。秩正黃樞。登壇於六符之階。被袞爲三軍之帥。古今盛典。盡在茲日。人臣寵貴。舉集微躬。豈臣庸庸所克負荷。非臣殞越所能上報。重錦名馬。元甲朱旗。王事靡盬。儼有行色。天顏咫尺。忽當遠離。感戀彷徨。拜受涕咽。折衝分閫。愧非式遏之才。榮耀自天。猥辱專征之賜。無任感恩激切之至。

代武相公謝借飛龍馬表

臣某言。伏蒙聖恩。借飛龍馬若干匹。至京兆府界首者。臣謬處台司。將明無效。自忝方任。恩禮特加。獎諭

綢繆寵賜輝煥寒衣病藥。悉出聖慈。匹馬一人。咸經御選。遠覽圖史。近徵耳目。如臣蒙幸。未見其倫。實有何功。敢當斯遇。盡節竭誠。在臣子之本分。殺身致命。報君親之常道。竟將何力。上答殊私。空保丹誠。以至灰粉。王程靡處。天駟言旋。仰服阜之有期。恨違顏之方始。精魂自越。顧步莫留。權奇之姿。向雲闕以獨去。惘款之戀。與星影而共馳。瞻望天庭。罔知所措。無任感戀彷徨之至。

代張侍郎起居表

臣某言。孟秋尙熱。伏惟聖躬萬福。臣以去月二十一日到薄寒山。見吐蕃相尙綺里徐等。固令盈珍等。却迴奏事。令臣取今月元缺一字發赴衙帳者。伏以聖澤柔遠。皇明燭幽。蕃情大歡。酋帥知感。虔奉聖旨。賓禮使臣。迎勞肅恭。饋餼豐潔。益明嚮化。彌表革心。臣忝備單車。不勝慶抃。嚴程方始。絕域未窮。白日在天。瞻仰如近。青蒲之地。伏奏猶賒。感戀彷徨。罔知攸措。無任犬馬屏營之至。謹因中使第五忠憲附表起居以聞。

代伊僕射謝男宥官表

臣聞言伏見今月某日制書。擢授臣男宥安州刺史。兼侍御史。充武昌軍兵馬留後。仍賜紫金魚袋者。雷驚里巷。日照閨門。寵命自天。戰跼無地。臣某誠懼誠感。頓首頓首。臣聞惟君任臣。固無虛授。知子者父。敢私不材。臣頃者伏以聖政惟新。時清無事。遂絕指蹤之望。求申戀主之誠。陛下以臣所統歲深周旋艱險。長三軍之子弟。積百戰之瘡痍。將有去留。念其情義。理資感勵。事貴便安。爰敕臣男試總戎務。臣雖訓之以義。教之以忠。而朽鈍有涯。策磨靡及。童子代斲。每懷傷手之憂。小兒在邊。曾無折屐之喜。將何以遽膺

寵命。若沐恩光。眞授竹符。就加金組。且祁午之爲軍尉。父已懸車。陸抗之將父兵。子非綵服。豈比臣身居端右。男領方州。鳴玉會朝。朱轡行縣。焜耀中外。冠超古今。名教之樂何加。人臣之事斯極。千載至公之運。獨被殊私。萬物咸遂之辰。先蒙曲澤。灑肝呈膽。莫盡微誠。毀族殺身。寧足上報。無任感恩殞越之至。

道州謝上表

臣溫言。臣去十月十七日。蒙恩授使持節道州諸軍事。守道州刺史。奉命星馳。不敢遑息。以今月七日到州上訖。祇寵自天。抃跼無地。臣溫誠感誠懼。頓首頓首。臣謬以孱庸。早忝朝序。再塵憲府。三踐文昌。竟不能著稱彌綸。贊肅綱紀。誠合汰黜。翻蒙獎任。共至公之理。分子物之憂。自古審官。莫斯爲重。臣才乏吏用。識昧政經。將何以克副聖心。撫甯遐俗。唯當勤宣皇化。虔奉彝章。苦節精心。少酬萬一。無任受恩感激之至。

賀册皇太子表

臣溫言。伏見十月十二日敕。伏承皇太子以四月二十一日册命禮畢。光紹前典。惟懷永圖。神人允諸。動植咸賴。臣溫誠歡誠抃。頓首頓首。臣聞燕翼貽謀。帝王之大孝。立嫡主器。禮易之明訓。伏惟皇帝陛下。克明駿德。恢纂鴻休。武功有成。文理既定。然後宏三王之教諭。建萬國之元良。凡在生靈。孰不慶幸。臣守官荒服。稱賀無階。竊抃嶺隅。倍萬恆品。無任感悅屏營之至。

衡州謝上表

臣溫言。伏奉五月十一日恩制。授臣使持節衡州諸軍事。守衡州刺史。散官勳賜如故。謹以七月五日到本州上訖。恭承寵命。循顧庸虛。感抃失圖。跼蹐無地。臣溫誠感誠懼。頓首頓首。臣聞三載陟明。虞書盛典。六條舉最。漢制宏規。必在上允帝俞。俯諧師錫。臣謬領郡務。素無吏能。虔守國章。布宣皇化。匪甯夙夜。再換炎涼。仰奉陛下憂勤。以卹遠人凋瘵。雖檢身肅下。不敢媿於神明。而阜俗移風。竟未彰於績用。將何以特膺睿獎。簡在宸心。當愷悌之旁求。辱循良之盛選。省躬增惕。殞首知慙。謹當罄竭精誠。策磨朽鈍。庶立日新之效。少酬天覆之恩。實望聖慈。照臣肝膽。無任感懼屏營之至。

代鄭南海謝上表

臣某言。臣伏奉制書。授某官。臣自遠離闕庭。晨夜奔涉。祇承寵命。不敢違甯。謹以某月某日到所部上訖。奉宣聖旨。親諭遠人。酬恩之效。未期。戀主之誠。已積。臣某誠感誠懼。頓首頓首。臣本章句諸生。器用無取。徒以小心畏敬。謬爲先聖所知。趨奉禁闈。漫踰星紀。屬內外危疑之際。是非剖判之初。實以艱貞自持。中立無倚。天高聽近。愚款獲伸。神幽鑒明。昌運斯屬。遂蒙陛下擢於侍從。超冠羣倫。用其憂國之寸心。委以代天之重務。俯僂三命。炎涼五周。登車奉馭。朽之懷。假寐感宵衣之志。徒耗神用。莫能將明。篋盈謗而方賜馱。駢折足而未忘簪履。竟以陳乞。遂其優容。無綺季夏黃之德。而猥當調護。無竇融賈復之勢。而獲奉朝請。以此沒齒。猶爲負恩。豈意曾未踰年。忽蒙抽獎。廟授鐵鉞。廷賜旌旗。俾臣懦夫。當此大任。節制五嶺。幅員萬里。伏波之銅柱猶在。永謝奇功。士燮之鼓吹日聞。彌慙武幹。將何以宣美皇化。振揚國威。洗愆

責於千齡。答生成於再造。唯當舉章循法。苦節清心。撫獷俗以思柔。酌貪泉而無懼。庶幾萬一仰副憂勤。但以白日在天。長安不見。丹涯限地。溟海方深。顧蒲柳之前衰。奉軒墀而尙遠。無任感戀屏營之至。

代鄭監使奏吐蕃事宜狀

右臣前月十四日至清水縣西。吐蕃舍人郭至崇來迎。便謂將書詔等先去。臣以二十一日到薄寒山。西去蕃帥帳幕二十餘里。停止。至二十三日方見尙綺里徐撥闌布論。乞心熱奉宣進士。兼付賜物。莫不祇奉聖恩。感悅過望。部落歡抃。道路謳歌。加以接待殷勤。供擬豐厚。竭誠歸化。形狀可知。臣親覩蕃情。不勝慶躍。綺里徐等固欲令臣與薛伾領蕃使却歸奏事。臣當時苦爭。請赴衙帳。自辰及午。竟不見移。今日再見懇論。盡詞往復。勢旣難拒。恐失事宜。卽以今月五日。令臣與張薦分背便發。彷徨中路。憂懼實深。心魂震驚。進退無據。謹勒某官某乙陳奏以聞。

代伊僕射奏請女正度狀

光祿大夫尙書右僕射南充郡王臣女請度尼某乙

右臣伏以陛下降誕之辰。率土蒙幸。臣於含氣之內。受恩獨深。思所以稱慶南山。獻心北極。遂割骨肉之愛。俾歸空寂之門。結幽願於金仙。奉勝因於寶壽。冒昧上請。精誠匪他。陛下以釐革初行。渙汗無返。憐臣罄至之分。事與恩違。念臣愚魯之忠。貸均法外。特降中使。俯加慰諭。臣忝居端右之地。首干畫一之文。誠雖奉上。義乖率下。合當嚴譴。忽被殊私。震驚失圖。慙跼罔據。荷降鑒之明。原情斯在。蒙曲全之澤。爲感則

深。輕黷宸嚴。伏增殞越。

代鄭相公謝賜戟狀

門戟十二竿

右今日中使某乙至私第奉宣聖旨。賜臣前件戟者。伏以國朝之制。名器尤慎。吏考三十。始秩銀青。戰勳十二。乃號柱國。必資具美。方錫殊榮。於是有命。服以朝加。戟于戶。將勸勞而責實。亦馭貴而崇名。上無謬恩。下不虛受。臣迹非奇致。擢自諸生。先皇以廉謹。賜知密勿。踰於一紀。陛下以憂勤。過聽委遇。首於羣寮。叨據樞衡。亟移星歲。雷霆用武。曾無犬馬之勞。日月垂文。豈有螢燭之助。徒以侍祠清廟。拜壽鴻名。累逢慶賴。驟假勳秩。禮異其數。物盛其容。新其閤闕。賜之棨戟。衡門燕雀。乍相賀於朱楹。武庫龍蛇。忽追飛於陋巷。焜燿當代。寵靈自天。聚族知慙。殺身匪報。無任荷懼屏營之至。謹奉狀陳謝以聞。

代鄭相公請刪定施行六典開元禮狀

右臣聞化人成俗。莫大於禮樂。垂統建中。必資於制度。然而忠敬有弊。質文異數。羣儒之得失。鋒起。歷代之沿革。絲棼。或榮古而陋今。名實交喪。或違經而便事。本末相忘。或煩褻以爲詳。或闕略以爲要。未聞折衷。以叶通方。國家與天惟新。改物視聽。太宗拯焚溺之餘。粗立統紀。元宗承富庶之後。方暇論思。爰敕宰臣。將明睿旨。集儒賢於別殿。考古訓於祕文。以論材審官之法。作大唐六典三十卷。以道德齊禮之方。作開元新禮一百五十卷。網羅遺逸。芟翦奇邪。亘百代以旁通。立一王之定制。草奏三復。祇命宣示中外。星

周六紀。未有明詔施行。遂使喪祭冠婚。家猶異禮。等威名分。官靡成規。不時裁成。貽弊方遠。伏惟睿聖文
武皇帝陛下。恢纂鴻業。升于大猷。雷電奮有截之威。日月廓無私之照。三叛就戮。四夷來賓。馬牛散於農
郊。兵革藏於武庫。嚴禋上帝。祇受鴻名。惟懷永圖。不自滿假。味爽聽政。子夜觀書。處成功而勿休。求至理
若不及。每懷經始。則知貞觀之艱。言念持盈。思復開元之盛。臣謬忝樞務。兼掌圖籍。無能匡補。已負於恩
私。有所發明。豈先以典禮。伏見前件開元禮六典等書。先朝所製。鬱而未用。奉揚遺美。允屬欽明。然或損
益之間。討論未盡。或弛張之際。宜稱不同。將貽永代之規。必俟不刊之妙。臣請於常參官內。選舉藝優深
理識明敏者三五人。就集賢院各盡異同。量加酌定。然後冀紆容覽。特降德音。明下有司。著爲恆式。使公
私共守。貴賤遵行。苟有愆違。必正刑憲。如此則職官有制。將興濟濟之詩。風俗大同。坐致熙熙之詠。見可
而獻。知無不爲。輕黷宸旒。伏增殞越。

唐故銀青光祿大夫守工部尚書致仕上柱國中山郡開國公食邑二千戶贈陝州大都督博陵
崔公行狀

曾祖諱承福。皇朝太中大夫。廣越二府都督。

祖諱先意。皇朝朝議大夫。守鄧州刺史。

父諱嶽。皇朝朝議大夫。鄭州長史。贈左散騎常侍。

狀斧藻天理。立爲人極。敬終端本。彼所以將就誠明。褒歿勸存。此所以砥礪名教。然而以道行己。晦而彌

光大君子之行也。以法考行直而無黨。賢有司之職也。且曰獻狀。則唯所知。公清莊而和博厚而敏。岐嶷而夙茂。羈卅而老成。情約性充。靜專動直。出入孝悌。周旋忠信。始以經明上第。調佐夏陽。次以詞麗甲科。超尉王屋。事迫於官而舉。言迫於事而揚。欲藏智而蒙滯來求。不近名而聲華見逼。故相左僕射張公時尹洛京。首得才實。泊鎮荆蜀。致於幕府。再兼理官。專領記室。健筆良畫。二邦有聞。旋遭內艱。毀瘠僅立。善居得禮。族黨稱之。免喪之歲。天子南狩。太尉西平王大會兵車。將圖匡復。公首膺辟任。潛發義心。琴未成聲。屢及於路。感激而將星芒怒。謀謨而兵禛廓清。翠華既還。優典斯及。拜殿中侍御史。時有寵臣爲京兆者。政以暴聞。吏有冤弊。公表陳枉。直伏閣待旦。言忠主悟。事寢風生。以繩違稱職。轉侍御史。以求瘼慎選。爲華原令。大兵之後。旱歲爲虐。公勞徠不倦。弛張以宜。復流庸於潤屋。闢曠土爲多稼。俄改歙州刺史。地雜歐駱。號爲難理。下車而簡其約束。期月而明其信誓。然後破散谿聚。剪鋤山豪。旣去害羣之姦。遂甯挺險之俗。徵拜長安縣令。威聲先路。不肅而理。鋸刃餘地。所投皆虛。擢同州刺史。圖歉於豐。量賑爲糴。號里倉者三百所。而凶年備矣。戒以暴骸。諭之速朽。成薄葬者九百家。而奢俗懲矣。郡人有豪奪鄉悖。陰持吏失。明構紛獄。累政所患。公斷以尋斧。破其囊橐。人樂其殺。而法制行焉。郡城自禦寇之餘。復隍殆盡。朝貢所經。夷夏何仰。公悅使襁負。大興板築。下不知役。而扃固立焉。其餘則去思有碑。詳在篆述。可覆視也。朝議陟明。遷于陝服。封介晉楚。寄分函洛。而戎備不修。兵庫虛閉。公乃鳩工以利器。閱實以練卒。金革中度。義勇知方。旣而有淮西之役。晨令暮具。凜然而可觀矣。河出城下。造舟爲梁。經始匪工。敗決相繼。公乃沈

石而雙固中泚。省艦而三分巨渠。水與意會。勢若天成。既而有奔濤之沴。智勝功顯。終然而無害矣。其餘則三降璽書。就加爵秩。是明徵也。移疾入覲。貳職冬官。歸載不過圖書。留府盈乎粟帛。豐公約私。於是乎在。既至陳。乞以尚書致政。室不交要路之賓。口不言當代之事。就陰委順。談者多之。公自解巾。至於徹樂。思不踰矩。動不越思。以忠貞爲仕模。以勤儉爲家訓。身居侯邸。清節如初。男降王姬。素風逾厲。羈孤聚室。人各忘其亡。布褐分庭。士不知其貴。體溫柔而事至能斷。性坦易而物莫能窺。當官不務於名聲。所去必遺其功利。毗謠尙在。時論可徵。已踰書葬之期。請舉易名之典。謹狀。

元和三年四月日。故銀青光祿大夫。守工部尚書。致仕上柱國。中山郡開國公。食邑二千戶。贈陝州大都督。博陵崔公。從外生。朝議郎。行尚書司封員外郎。上騎都尉。賜緋魚袋。呂溫。謹上尚書考功。夫立身之道。始於君親。中於人終於身。若府君者。居喪有聞。臨難有功。善其始也。勤於官業。惠於鰥寡。敬其中也。家事以理。年至而退。謹其終也。率是三懿。光于前訓。以咨諡法。無媿至公。謹狀。

呂衡州文集卷第六

三受降城碑銘 井序

夏后氏遏洪水。驅龍蛇。能禦大菑。以活黔首。周文王城朔方。逐獫狁。能捍大患。以安中區。若非高岸峻防。重門擊柝。雖有盛德。曷觀成功。然則持璿璣而弛張萬象。吳穹之妙用。扼勝勢以擒縱八極。王者之雄圖。道雖無外。權則有備。變化消息。存乎其人。三受降城。皇唐之勝勢者也。昔秦不量力。北築長城。右振臨洮。左馳碣石。生人盡去。不足乘障。兩漢之後。頽爲荒邱。退居河澨。歷代莫進。矯亡秦之弊。則可矣。盡中國之利。則不然。唐興。因循未暇。經啓有拂。雲祠者在河之北。地形雄坦。控扼樞會。虜伏其下。以窺域中。禱神觀兵。然後入寇。甲不及擐。突如其來。鯨一躍而吞舟。虎數步而擇肉。塞草落而邊毗懼。河冰堅而羽檄走。爰自受命。至于中興。國無寧歲。景龍二年。默啜強暴。黷鄰構怨。掃境西伐。漠南空虛。朔方大總管韓國公張仁愿。躡機而謀。請築三城。奪據其地。跨大河以北。嚮制胡馬之南牧。中宗詔許。橫議不撓。時唐休璟建議非之。於是留及瓜之戍。斬奸命之卒。六旬雷動。三壘岳立。以拂雲祠爲中城。東西相去各四百里。過朝那而北。關斥候迭望。幾二千所。損費億計。減兵萬人。分形以據。同力而守。東極于海。西窮于天。納陰山于寸眸。拳大漠于一掌。驚塵飛而烽火耀。孤鷹起而刁斗鳴。涉河而南。門用晏閉。韓公猶以爲未也。方將建大旆。提金鼓。馳神算。鞠虎旅。看旄頭。明滅與太白進退。小則責琛賫。受厥角。定保塞。一時之安。大則倒狼居。竭瀚海。空

苦寒萬里之野。大略方運。元勳不集。天其未使我唐無北顧之憂乎。厥後賢愚迭任。工拙異勢。剛則黷武。柔者敗律。城墮警固。寇得凌軼。或驅馬飲河而去。或控弦劇壘而旋。吾知韓公不瞑目於地下矣。今天子誕敷文德。稚育羣生。戢兵和親。七狄右衽。然而軍志有受降如敵。大易有安不忘危。崇墉言言。其可弛柝。亦宜鎮以元老。授之廟勝。俾述舊職。而恢遺功。外勤撫綏。內謹經略。使其來不敢仰視。去不敢反顧。永饗猛氣。無生禍心。聳威馴恩。禽息荒外。安固萬代。術何加焉。敢勒銘城隅。庶復隍而光烈不昧。銘曰。

韓侯受命。平在朔易。北方之強。制以全策。亘漠橫塞。揭茲雄壁。如三鬪龍。躍出大澤。並分襟帶。各閉風雷。俯視陰山。仰看昭回。一夫登陴。萬里洞開。日晏秋盡。纖塵不來。時維韓侯。方運神妙。觀釁則動。乃誅乃弔。廓乎窮荒。盡日所照。天乎未贊。不冊清廟。我聖耀德。罷扃北門。優而柔之。用息元元。曷若完守。推亡固存。于襄于夷。永裕後昆。

故太子少保贈尚書左僕射京兆韋府君神道碑銘

井序

山之大者。匿峯巒。含氣象。積高無倪。而不見其險。孕粹有物。而不知其神。此其所以爲大也。德之全者。毀圭方。點皎厲。靈機密運。而智不驚愚。遐標特立。而迹無變俗。此其所以爲全也。然則大山高而可陟。全德近而難知。我求其倫。見之於少保公矣。公諱某。字某。京兆杜陵人。其先帝堯光宅。讓德儲慶。建國命氏。列于夏商。相胄卿族。繁于漢魏。代濟不殞。煥爲盛門。大王父諱某。皇朝主客郎中。萊濟商三州刺史。王父諱某。倉部郎中。太原少尹。贈祕書監。烈考諱某。檢校都官郎中。嶺南節度行軍司馬。贈同州刺史。或以瑚璉。

之器。纔施郡政。或以巖廊之姿。僅及戎佐。與時俱息。從道而污。屈不試於當年。啓莫京於身後。公生而岐嶷。弱而老成。渾粹不散。清明虛映。朱紘遺音。而宮商自韻。大圭不琢。而符彩溢發。邈是天爵。爛乎人文。鼓鐘之聲。日遠。鄉曲之譽。來逼。釋褐太子正字。與仲弟正卿。以賢良偕徵。策入異等。鴻冥雙舉。當代榮之。授高陵主簿。遷監察御史。改殿中內供奉。東都畱守判官。卽拜東臺侍御史。參畫惟允。持繩不回。河洛之間。風聲尙在。德宗躬決庶政。本于尙書。責成曹郎。綜練材實。薦出方伯。時超貳卿。二十年間。斯爲極選。公由是前後遷刑部吏部員外郎。吏部郎中。奏議推美。彌綸成績。南宮之故事存焉。于時戡復日近。勳勤者衆。都市惰遊。盡垂金組。邦畿豪奪。半賜丹書。輕禽逸於疎網。悍馬駭於柔轡。上思懲抑。必俟良能。公由是前後歷奉天。長安。二縣令。仁護繆惇。智鈴豪右。輿人之遺詠在焉。望由實躋。任以望重。選曹未幾。給事于中。旣居駁正之司。不撓當官之論。屬東南歲歉。俾又惟艱。出爲常州刺史。天寶之後。中原釋未。輦越而衣。漕吳而食。一隅重困。五紀于茲。公臨之清貞。結以忠恕。給存惠寡。務穡勸分。一法以去其侵漁。多方以備其災患。以逸道而使。繕完允濟。以與道而取。賦入先期。聲聞天朝。考績連最。轉蘇州刺史。二境之間。百里而近。靈源自出。殊派共清。膏澤所霑。異壤同潤。下車朞月。報政如初。加秩賜金。借畱累歲。無何。彭沛喪師。兵驕地偏。安危所繫。朝議難之。乃以公檢校祕書監。兼御史中丞。賜紫金魚袋。充徐泗節度行軍司馬。重其威望。將委旄鉞。而未命程伯徐方之軌。旣同不見。賈生宣室之徵。遽至。擢吏部侍郎。倫品甄明。通簡節適。勢有探湯之熱。我以靜濯。衆有鼓簧之喧。我以心聽。馴致其美。闕然日彰。不求無失職之人。人自以爲不

失職矣。輟拜京兆尹。德刑交修。寬猛相濟。匪設鉤距。物無遁情。匪耀鋒鏑。機無滯斷。浩穰之理。不肅而成。不求有不欺之吏。吏自以爲不能欺矣。俄改太子賓客。辭劇就閑。圖南之勢一息。選德求舊。居東之命。惟重。遷檢校工部尙書兼御史大夫。充東都留守。東都畿汝州都防禦使。自盜起幽陵。兵屯諸夏。涉淮而北。軍國異容。分陝以東。古今殊寄。公講信修睦。外張保釐之政。完備訓戎。內寓折衝之令。矛戟不露。德輝藹然。遐邇傾首以承風。強暴革心而知懼。今上嗣統。就加檢校吏部尙書。方入僉諧。屬毗大化。不幸嬰疾。表求退歸。憂詔除太子少保。冀其休復。將有後命。神祇竟昧。藥禱無降。以元和元年二月十二日。薨于東都履信里之私第。享年六十有四。寵贈尙書左僕射。轎車西歸。制使賻弔。太常褒議。諡曰某公。哀榮備矣。夫人河東裴氏。侍中耀卿之孫。給事中皋之女。德門鍾美。淑聞充塞。薜榮早落。著兆叶期。卽以是年五月二十一日。合葬于萬年縣高平鄉少陵原。禮也。公孝悌天至。行有餘力。仁義性得。匪俟伏膺。不飾表以近名。恆縱心而中矩。清虛簡淡。而應物不倦。通曠夷易。而及門無雜。不尙意氣。而然諾篤至。不好臧否。而鑒識超倫。與故相國齊江西映。穆宣州贊。贊弟侍御史員。爲文章道義之友。可以視其所親矣。今吏部郎中扶風竇羣。抗迹毗陵。退身進道。公三挹郡榻之上。一振天墀之下。不數歲閒。蔚爲重器。可以視其所舉矣。分正東郊。開府辟士。則有今右司郎中燉煌段平仲。倉部員外郎安定皇甫鏞。禮部員外郎清河張賈。京兆韋嗣隴。西李景儉。中山衛中行。平陽路隨。皆羣彥之秀出。一時之高選。可以觀其所任矣。加以志尙幽遠。冥搜好古。所居第內。必有松石之致。退公暇日。常以圖籍自娛。一字愜心。金玉不顧。片言同趣。布褐無閒。

聲聲然若見道之所存。陶陶然不知歲之云晏。於戲策名從事四十餘年。朋友罕聞得喪之言。家人莫見喜愠之色。坦懷以處。推分而行。無怨於人。人亦不怨。無猜於物。物亦不猜。履信順以優游。保福祿以終始。其名教之大雅者歟。有九子。長曰元質。前常州義興縣尉。次曰穀。前邠州司倉。次曰璋。鄉貢進士。能修辭立誠。克家致美。茂揚風訓。休有令聞。次某某等。皆殊姿異識。發於童齒。慶善之餘也。以某獲窺牆仞。見託篆述。究賢人之業。信而無媿。申孝子之志。直而不文。其詞曰。

利建于商。介圭作寶。爰立于漢。緇衣改造。克昌厥允。奕世載考。亞尹擅名。郎中懷道。莫躋貴仕。莫享難老。蘊靈儲休。以啓少保。不顯少保。其德懜懜。有倬遐姿。曠哉靈襟。顯仁山立。藏用淵沈。煦如冬陽。藹若春陰。白圭三復。克保明心。黃鍾九變。莫匪和音。靜專動直。謙進柔克。宜踐公輔。以楨王國。促路頓軌。中天墜翼。少陵古原。拱樹寒色。穹壤可弊。唯名不息。金石垂之。以慰罔極。

唐故金紫光祿大夫檢校兵部尚書使持節都督秦州諸軍事兼秦州刺史御史大夫充保義軍節度隴西經略軍等使上柱國彭城郡開國公食邑二千戶贈尚書右僕射中山劉公神道碑銘
并序

武有七德。以先九伐。聖王所以經邦也。戰有六器。以先五兵。賢侯所以述職也。然威德並運。仁勇相宣。功業見乎禮義之門。將相出乎詩書之府。若有覽古成敗。與時行藏。道惟忠貞。權利變化。兵機生於盡性。師律本乎修身。飾怒之鈇鉞。有歸當仁之壇場。不讓考諸名實。何代無人。公諱某。字某。其先帝堯之允。事夏

后者曰累。隨會之子。處咸陽者爲劉。秦滅六雄。遷于豐沛。漢有四海。別封河朔。公卽孝景帝中子。中山靖王勝之後也。遭晉喪亂。流寓幽平。燕趙之朝。不絕如綫。十一代祖後魏尙書左僕射。燕郡公靈助。始有大功。建茲元社。遂爲范陽人焉。厥後逶迤。世有潛德。詳在家牒。略而不書。曾祖特進檢校司衛卿。臨洮軍使。贈宋州刺史。諱宏遠。恢持重之姿。撫甯洮罕。王父特進檢校右金吾衛大將軍。太常卿。大同軍使。贈揚州大都督。諱貢。厲摧堅之氣。震疊氏羌。烈考開府儀同三司。幽州大都督府長史。帶正省兵吏刑戶四尙書。左右僕射。平章事。兼御史大夫。幽州盧龍軍節度使。累贈太師太保。諱怱。以正有功。以寬得衆。書伐盟府。擁旄本邦。於戲。以二特進之志略。用而不貴。以太保之忠勳。貴而不壽。水積而深。縱壑之鱗躍。風積而厲。垂天之翼奮。慶靈久鬱。必有勃興。公卽先太保之次子。今侍中之介弟。伯也。嗣職幽都。仲也。揚威隴坻。虎旂龍節。交萃於一門。開國承家。並登於九命。倬絕天下。輝動人倫。勃焉之興。斯可信矣。公長源濬發。自天鍾美。直尾箕之下。別稟英精。生恆碣之閒。得其全氣。顯仁藏智。勤孝朴忠。大略小心。寡言敏行。虎抱崖窟。莫能象其深沈。鸚聳清冥。未足擬其超遠。幼挺奇節。長有雄姿。森武庫之鋒鏃。錯文昌之光色。閱禮之別。桴詩之和。觀易象之元。得春秋之正。申商之法。撫實而除苛。孫吳之書。取權而去詐。行有餘力。則遣詞比興。多中於雅音。材之旁通。則騎射劍擊。皆窮其妙用。眞所曰。多能博識。允武允文者也。公弱冠之歲。朱滔敗歸幽陵。狼顧未定。先太保時爲行軍司馬。用公之策。與滔定計。戢兵徹警。洗讜歸誠。致父於曲突之勳。拯人於墜塗之難。由是山東侯伯。始聞其名。是歲孟秋。滔卒於鎮。幽人懷德推奉。太保方執謙志。未允誠。

求公以爲幽燕本負氣之鄉。豪傑陷失節之地。自新無路。從亂如歸。安危生於俯仰。逆順決於指顧。權必有濟。不可以假人。貴不爲榮。豈嫌於在己。趨庭諍論。決策指麾。正頽波於衆心。迴白日於王命。重氛載廓。闔境昭蘇。由是漢庭公卿。始重其節。太保旣嬰危疾。侍中時鎮莫州。公總兵中權。嘗藥內寢。弛張在手上。下宅心。而見利不回。臨事能斷。推至公於門內。度德惟鈞。申大義於軍中。以長則順。於是陟崗長望。飛駟潛迎。勸輟哭於創巨之晨。託理命於綱紀之僕。軍府立定。國家又安。然後退就喪廬。雨泣柴毀。三軍感歎。四鄰簞慕。子之道。弟之道。備矣。孝之難。友之難。至矣。旣而侍中泣曰。金革無避。吾豈獲已。手足相衛。爾何自安。遂奏起公爲涿州刺史。未幾。轉領瀛州。東負滄海。西馳諸夏。地驍俗雜。久號難理。公乃簡其約束。峻其隄防。均其有無。一其勞逸。心聽而方斷。身踐而後言。令下於流水之源。化行於草偃之勢。盜奔他境。人復先疇。亦旣富庶。聿觀禮讓。日用吾道。于何不臧。其年。兼御史中丞。充本道節度。瀛州兵馬留後。又兼御史大夫。行軍司馬。丁越國夫人憂。至性繼酷。終天窮感。杖而後起。殆不勝喪。軍士泣留。王人逼諭。起復舊職。敬恭新命。孝在方寸。能盡其哀。政有典刑。不憊于素服。閔加銀青光祿大夫。餘如故。公高視前代。志齊古人。疾沒世不稱之徒。慕其次立功之義。見去病無用家爲。卷常三復。聞耿弇不以賊遺。坐惜分陰。必欲懸旌黑山。飲馬西海。氣定百勝。身先七擒。討冒頓之慢書。復犬戎之侵地。有懷未果。若恥在躬。爰因大閱。乃告于衆曰。吾剖符別統。行已十年。訓齊之士。不下十萬。而靡衣鮮食。銷銳剗鋒。徒藉父兄之資。莫申絲髮之效。永言及此。何以爲容。且東胡之強。吾兄旣雄其式。遏西醜之類。鄙志必期於殄殲。一家勤王。萬里

同力遊於地下。無負先公。誰居誰行。吾計決矣。於是七營四校。一呼三躍。童兒奮臂。女子褰裳。奏書朝下。牙旗夕出。穀騎八百。組甲五千。次舍按部。周旋成列。雲鳥遞引。龍蛇相追。夜度險而不蹶。晨涉川而如貫。加以贏糧自給。假道無煩。歷百城而饋餼。皆辭。居一夕而牆宇必葺。憩林適去。墜果猶存。經田疾趨。滯穗不犯。軍容之整。故老莫傳。自燕抵秦。扶路瞻歎。初公躬率將士。以先啓途。夫人撫其妻孥。別次繼進。爰自建旆。迄于解鞍。行不接塵。止不通問。元帥去裘蓋之逸。小君罷膏沐之容。在樵蘇而必親。歷寒暑而無替。雖古名將。未之能行。德宗備禮勞迎。虛襟相待。一見升殿。目送傑人之姿。三接論邊。心許成吾之事。卽日拜秦州刺史。兼御史大夫。充隴西經略軍使。割扶風之普潤縣以處之。倚爲長城。鎮我近輔。羽儀鼓吹。等西夏之雄藩。屣履資糧。同北軍之寵士。而猶未賜齊履。不拜漢壇。抑爲偏帥。所以觀自致之效。假領僑郡。所以激必取之心。先皇將將。厥有深旨。公由是感悟神動。精誠涕流。荷知臣之明。思求己之報。砥礪壯節。激昂雄圖。而地狹一同。衆纔十旅。偪介塞垣之下。崎嶇山谷之間。因深爲隍。卽險增壘。翦蓬伐木。以立營署。鑿石墾草。以開屯田。俸祿不入於私家。子弟必從於公役。縑紉之尋尺。咸在軍裝。金鐵之錙銖。盡歸兵器。無歌僮舞女之玩。而講訓爲娛。絕良鷹異犬之求。而驍果是務。加以推誠待下。愛士如身。視疾臨喪。輿斲必至。字孤養老。骨肉何先。遂使千夫一心。積感思奮。各捐軀而唯恐後死。未見敵而爭爲前登。公曰。衆知吾深。其可用也。於是馳使闕下。請牧湟中。出自凶門。入于死地。衽席過兵之處。咽喉制敵之衝。威懷啓閉之方。耕戰疾徐之節。莫不封章定計。裂素成圖。德宗覽之。廢食興歎。屬戎渠悔禍。朝議許盟。至誠達而

允孚全策知而未用。失機緩寇。雖負於雄心。違命有功。且非其雅志。爾乃慎固封守。掩抑歲時。獮狩蒐苗。以寓軍政。拔距投石。以據士憤。櫪馬待騁。夜風起而長鳴。匣劍有靈。秋氣來而自動。感物增慨。可勝言哉。然而十五年閒。烽燧無警。數千里內。兵防倚重。志雖不獲。賴則有餘。篆跡圖形。我無愧色。況又敦尚儒學。慕親賢才。妻子食淡而賓膳豐珍。居室安卑而候館華峻。風聲所及。日月繼至。觀夫危冠大帶。雜於介冑之間。春詠夏絃。不改膠庠之樂。光名四達。固有由焉。貞元二十一年。順宗嗣統。中外增級。就加檢校工部尚書。崇陵晏駕之初。太上傳歸之際。公嚴兵近服。警衛王室。擒摘姦黨。黜遏邪謀。人心不搖。國隙遂閉。流功妙簡。祕莫得聞。帝嘉厥誠。手製褒諭。珍裘寶帶。文馬雕弓。以獎殊恩。不可勝算。明年。秩進武部。封啓彭城。建保義之雄名。益良原之重賦。始賜節鉞。許之專征。爰承寵靈。得以入覲。鑾聲戾止。庭燎有輝。縟禮繁錫。率加恆數。然後詣便殿。奉溫顏。訴先朝未展之謀。陳西疆必復之志。膝席虛納。指期決行。旋鎮歲餘。不幸遭疾。猶能籍士馬。封府庫。表請新帥。輦歸京師。天惠寇讎。奪我忠武。以元和二年十二月日。薨于岐山縣之行次。享年四十有九。皇上震悼。廢朝徹樂。未伺子明之疾。遽迎征虜之喪。愍冊極詞。法賻優等。贈尚書右僕射。諡曰某公。以三年十月日。列簫鼓靈儀。賜溫明祕器。卜兆十里。會車千乘。葬我某公于萬年縣之少陵原。備哀榮也。夫人河東柳氏。某官某之孫。某官某之女。清門華冑。媚德馨行。輔佐君子。蔚爲時楨。撫訓諸孤。繼立家道。二南所美。無以尚之。有子五人。長曰銳。朝議郎。太子洗馬。周旋經訓。斧藻身文。確有端操。雅多奇略。有識之士。知其大成。次曰師貞。前右武衛倉曹參軍。次曰師禮。前商州司倉參軍。次曰稅。

前欽王府參軍。次曰兌。門子出身。杞桂殊姿而共芳。珪璋異質而同潤。百祥之慶。其在茲乎。洗馬等相與謀曰。夫步星氣者。無出於馮相之官。考鍾律者。必求於伶倫之族。我先人之業。非志士不知。以某早慕功名。常窺闢奧。辨用心之所至。識行事之會歸。俾垂斯文。以示來哲。銘曰。

至精氤氳。爲勇爲仁。將昭文德。有此武臣。猛而不殘。虛而能馴。情厲秋霜。氣含陽春。源由堯興。派自漢啓。承光祖考。致美兄弟。通刑練政。達樂知禮。行歸有方。用入無體。沖襟湯湯。應變弛張。開則雷電。閉爲金湯。能求敵情。善用己長。威不可犯。惠不可忘。靜言未賓。忠憤慷慨。翻翔燕海。來護秦塞。車無停軌。甲不解帶。勤王萬人。瞻我大旆。左汧右涇。克壯其聲。目盡西極。塵沙不驚。行人如歸。戰士且耕。隴首烽斷。原州草生。方提金鼓。振國威武。建銘赤山。恢復舊宇。促運潛奪。奇功莫覩。歿而不瞑。足感明主。詔葬九原。寵昭幽魂。介士班劍。送于都門。草陳霜來。樹拱煙昏。萬物有盡。唯名獨存。

南嶽大師遠公塔銘記 并序

原夫法起於無色。生於妄求。雖於色者。未得皆空。徇念於無者。斯爲有著。是以至人心無所念。念無所求。初未動而誰安。本不然而何滅。然而利根難植。頓詣罕聞。不有舟梁。孰宏濟度。匪因陞級。莫踐堂塗。必在極力。以持其善心。專念以奪其浮想。不以身率。孰爲教先。誰其宏之。則南嶽大師。其人也。師諱承遠。漢州綿竹縣謝氏之子。積修妙性。宿起冥因。乘報現身。應期宏道。自天鍾美。因地稟靈。七尺全軀。岷峨與瞻。敬之狀。九漏懸解。江漢資清淨之源。殊相夙成。隱照潛發。年甫志學。始遊鄉校。驚禮樂之陷。窅覺詩書之枉。

枯忽忽不樂。未知所逃。俄有信士以尊勝真言。質疑於學。怡然聳聽。宛若前聞。識契心冥。神動意往。遂涕決慈願。行徇幽緣。初事蜀郡康禪師。禪師學於資州詵公。詵公得於東山宏忍。堅林不盡。祕鍵相傳。師乃委質僮役。服勤星歲。旁窺奧旨。密悟真乘。既壯遊方。沿峽東下。開元二十三年。至荊州玉泉寺。謁蘭若真和尚。荆蠻所奉。龍象斯存。歷劫方契。其幽求一言。懸會於虛受。爰從剃毀。始備錫錫。昂然古貌。森映喬松。真公南指衡山。俾分法派。越洞庭。浮沅湘。息于天柱之陽。從通相先師。受聲聞具戒。三乘之經教。四分之紀律。八正之倫要。六度之根源。莫不更贊神機。遞歸心術。聞京師有慈敏三藏。出在廣州。乃不遠重阻。星言覲謁。學如不足。求所未盡。一通心照。兩捨言筌。敏公曰。如來付受吾徒。用宏拯救。超然獨善。豈曰能仁。俾依無量壽經。而修念佛三昧。樹功慈劫。以濟羣生。由是頓息諸緣。專歸一念。天寶初歲。還于舊山。山之西南。別立精舍。號彌陀臺焉。薤草編茅。僅庇經像。居靡僮侍。室無斗儲。一食不遇。則茹草而過。弊衲莫充。而歲終自若。奉持贊歎。苦劇精至。恆於真際。靜見大身。花座踊於意田。寶月懸於眼界。永泰年有高僧法照者。越自東吳。遊於盧阜。尋遠公教迹。結西方道場。入觀積旬。至想傍達。見彌陀座下有老比丘焉。啓問何人。答曰。南嶽承遠。願生吾土。勝緣既結。真影來現。照公退而驚慕。徑涉衡峯。一披雲水之塵。宛契定中之見。因緣昭晰。悲喜流涕。遂執摠衣之敬。願承入室之顧。大師德因感著。道以證光。遠近聆風。歸依載路。於是大建法宇。以從人欲。輪奐雲起。丹刻化成。走檀施於十方。盡莊嚴於五會。香花交散。鐘梵相宣。火宅之煙。燄皆虛。慾海之波。瀾自定。加以寶裝祕笈。建幢於臺前。玉篆真文。揭碑於路左。施隨求之印。以廣銷

業累造轉輪之藏。以大備教典。勸念則徧勝於崖谷。勵學則兼述於縑緗。其欲人如身。慈惠懇至。皆此類也。大師峯栖木下。六十餘年。苦節真修。老而彌篤。夙開戶牖。久啓津途。法界之尊重在焉。人天之瞻仰如是。而常陋處方丈。志行平等。食無重味。寒不兼衣。王公之珍服盈箱。毗庶之金錢布地。莫不迴修佛事。瞻養孤老。眷言施者。以是報之。期頤將及。志力無替。中鐘會食。到必先衆。夕磬虔念。居恆達晨。其克已練心。慎終如始。皆此類也。大歷末。門人法照辭謁五臺。北轅有聲。承詔入覲。壇場內殿。領袖京邑。託法雲之遠蔭。自感初因。分惠日之餘光。寧忘本照。奉陳師德。乞降皇恩。由是道場有般舟之號。貞元歲。某獲分朝寄。廉問湘中。近照德輝。備探衆妙。況靈岳直午。先皇本命。宜有上士。斯焉護特。表求興崇。詔允誠願。臺雖舊號。其命惟新。寺由是有彌陀之額。度僧二七。會供千人。中貴巡香。守臣親饌。瑤圖花捧。寶字煙開。寵降九天。輝映三界。師亦建不壞之塔。以報君親。修無邊之功。以福邦國。梵行之能事畢矣。法門之榮觀備矣。貞元十八年。孟秋既望。顧命弟子。申明教戒。掃室趺坐。恬然化滅。報齡九十有一。僧臘六十有三。先是。忽告門人曰。國土空曠。各宜勉力。數月而炎火焚寺。周歲而吾師解形。此蓋寶去山枯。龍移水涸。空曠之旨。乃明前知。法衆崩慟。若壞梁木。邦人號赴。如失舟航。以其年九月七日。遷神于寺之南崗。卽安靈塔教也。前後受法弟子。千有餘人。而全得戒珠。密傳心印者。蓋亦無幾。比邱惠詮。知明道偵。超然等。皆奧室之秀者。以瞻奉將遠。經行坐蕪。永懷宗極。見託碑紀。移有道於物外。真無愧詞。比遺愛於人間。誠當墮淚。銘曰。浩浩清塵。茫茫逝川。大雄作矣。救物爲先。明非有照。慈亦無緣。不宰功立。忘機智全。誰其宏之。南嶽命代。

習識虛受。應身圓對。理則歸空。教惟不昧。末搖本靜。行苦神泰。雲迹一滅。天星六周。熱惱就濯。童蒙來求。攝以專念。驅之力修。我法有戶。誰能不由。甘露晨晞。香雲夕卷。彼岸方濟。慈舟忽遠。鑪煙如在。塔樹勿翦。爰刊豐碑。永想正眼。

唐故銀青光祿大夫京兆尹兼御史大夫上柱國贈吏部尚書京兆韋公神道碑銘 并序

工之良者。斧斤神運。不離繩墨之內。士之全者。器用無方。必歸忠孝之域。若離繩與墨。而廈屋立構。大匠以爲妖也。失忠與孝。而功烈幸成。君子以爲亂也。除妖討亂。獨立中道。以人倫風俗爲己任者。吾聞其語。而見其人。公姓韋氏。韓武字某。京兆杜陵人也。其先命于商。顯于漢。蟬聯于晉。魏之後。或哲或謀。或肅或艾。大名大德。大節大勳。懸諸日月。倬在圖史。族姓之盛。莫之與京。曾祖皇朝金紫光祿大夫尚書左右僕射。同中書門下三品。諱待價。致君皇極。時憚其正。祖銀青光祿大夫。梁州都督。諱令儀。布化南夏。民懷其惠。父舉進士宏詞。制策皆入殊科。又判入高等。累任畿赤名尉。遷朝議大夫。監察御史。轉殿中御史。侍御史。尚書禮吏員外。中書舍人。給事中。擢元缺禮吏戶三侍郎。亦列名藩。及列卿之清者。時年四十九而薨。然亦由不一其名字。故家傳略而不盡也。贈二部尚書。諱諡。時方大用。士痛其夭。公未免懷而孤。六歲知慕。每問居處。几杖則失聲啼叫。廢絕于地。雲物與之變色。烏鳥與之悲鳴。況夫搢紳之履霜露者。元中書載公之先執。泣撫其首。目爲孝治之瑞。衣無兼綵。食去鮮味。若居喪者數歲。年十一。始以門第補右千牛。歷京兆府參軍。高陵櫟陽萬年三縣尉。長安縣丞。晝則遊刃吏事。夜則服膺經籍。循性爲學。深於禮服。顧

行爲文。長於議論。曾未壯齒。鬱其老成。顏太師真卿。蕭黃門復。以雅道名節自居。罕有及其門者。而皆與公爲忘年之契。由是振動於卿大夫閒。擢爲太常博士。草朝廷之儀。大事不繁。小事不略。諡人之行。褒者不德。貶者不怨。德宗西狩。委室隨難。除殿中侍御史。執簡於亂兵之中。顧指風生。邦憲不撓。皇輿反正。猶踐舊職。崔大夫縱雅相。推重動靜。咨度方表。公爲侍御史。副總臺務。會戶部元侍郎琇。董司漕運。懼不克濟。奏授公倉部員外郎。充水陸轉運判官。得公之謀。而不能。用與道進退。義無淪胥。稱疾杜門。數月。而元果敗。朝野之論。服其賢明。尋轉禮部員外郎。上方以戡復之慶。親告郊廟。大兵僅解。百度各缺。執事憂惑。悉咨於公。公以變迪之識。酌于宜。元缺一字。備物約用。禮成掌中。羣司遵行。罔或愆素。屬邦畿艱食。朝議敦本。選臺閣之通理術者十人。分宰大邑。公與故相國鄭公珣瑜等。同被推擇。遂檢校本官。兼昭應縣令。時東后繼覲。館無虛日。王人急宣。冠蓋相望。縣道之弊。昭應爲劇。公內結信惠。務穡勸芸。而農不釋耒。外運才敏。儲費應卒。而賓不乏餼。傳置如市。田閭不知。改遂州刺史。郡中地狹江隘。屋室駢接。歲有潰決。焚如之害。公順勢疏壅。峻其隄防。而暴潦泄去。中禁嚴備。開其巷陌。而流燄斷滅。二十年閒。水火無懼。民到于今。歌之。召拜戶部郎中。不以望積南宮。而怠弃其職。修版圖以隱覈郡國。天下不敢以墾田籍民之數。欺于有司。除萬年令。問民疾苦。而不問過失。憂民賦輸。而元缺一字。憂盜賊。惠孚誠達。其令自行。端冕而朝。轂下清靜。遷京兆少尹。是歲。荆吳昏墊。宸衷軫駭。親臨軒分命十使。馳傳弔諭。且令察視。非清明簡重。有生民之望者。不在此選。公復奏罄實。固言蠲賦息役之宜。爲聚斂者所嫉。出爲絳州刺史。因其歲歉。導以地利。鑿

汾而灌注者十有三渠。環絳而開闢者三千餘頃。烏鹵之地。京坻勃興。課最屢聞。璽書降勞。遷晉。慈隰等州都防禦。觀察處置等使。晉州刺史。兼御史中丞。賜紫金魚袋。自絳及晉。不三百里。惠澤旁浸。仁聲先路者久矣。至是疲瘵之心。如幽蟄聞春雷而起。柔荑望和風而坼。其感煦馴致之自然歟。居晉郡六年。順宗就加左散騎常侍。銀青光祿大夫。寵循政也。今上徵爲兵部侍郎。崇德元缺一字也。方議毗倚。真于台司。中外翕然。日夕以冀。俄以豐陵復土之重。輟公嚴護。拜京兆尹。兼御史大夫。充山陵橋道等使。公哀敬盡瘁。殆忘寢食。凡七十日。遇暴疾。薨于長安通化里之私第。享年五十有五。皇帝悼惜興歎。詔贈吏部尚書。太常諡曰某公。給鹵簿鼓吹。以某年某月日。葬于京兆府某縣之某原。前夫人博陵崔氏。祔焉。禮也。公所撰家祭儀三卷。文集一十五卷。凡諸著述數萬言。並行於代。崔夫人京兆前御史大夫鄴國公昭之女。柔德懿行。儀形閨壺。貴壽莫偕。先公而歿。有子曰延亮。前某官。孝敬忠厚。英華逸發。胸襟所得。往往有絕雲霓之勢。若不離師友。無倦追琢。吾見韋氏之餘慶。未可量也。二女。長適桂管觀察支使。太常寺協律郎。隴西李允元。次適荆南營田判官。江陵府戶曹參軍。隴西李景儉。有是子以爲後。有是壻以託孤。公其無愛於地下矣。後夫人某郡某氏。某官某之女。繼室以德。罔替前修。帷堂晝哭之後。女有歸。男有立。姻族愈睦。門風益清。詠鵲巢之詩者。孰不歸美。公終鮮兄弟。有姊一人。承順恩敬。貴而彌篤。爲海內所稱。於戲。六歲而孝聞。人子之難也。五十以悌聞。人弟之難也。苟非天性充塞。以身立教者。其孰能踐百行之至難乎。況文章經術。禮樂刑政。磊落光耀之如彼。斯可以言士之全也。前年冬。延亮泣奉家傳。造予衡門。以金石之事見

託會守遠郡。歲月差池。作吏迫屑。文字殆廢。卒不獲命。誠無愧詞。銘曰。
以甘受和。以白受采。洽自閨門。聞于四海。韋公之行。於是乎在。名教以來。未之有改。吁嗟乎韋公。天生蒸
民。非禮弗存。貴爲天子。非禮弗尊。韋公之學。實專其門。秉之以心。立之以言。吁嗟乎韋公。惠訓孜孜。視民
如傷。子產之後。莫如龔黃。韋公之政。允紹其良。民之父母。今也則亡。吁嗟乎韋公。奕奕相庭。在朝之右。人
方矚望。帝亦虛受。韋公之年。曷不悠久。德慶旣鬱。宜其有後。吁嗟乎韋公。

呂衡州文集卷第七

唐故太子舍人李府君夫人滎陽鄭氏墓誌銘

并序

夫人諱字滎陽人。鄭於姬姓最親。爲天下著族。自秦漢至于皇朝。萎蕤軒冕。映曜圖史。如洪河東導。江漢南紀。其源流不待問而可知矣。高祖守元。朝散大夫。襲丹徒公。曾祖嘉會。朝散大夫。雅州司馬。大父暉。正議大夫。金衢二州刺史。嚴考欽英。朝議郎。杭州別駕。皆以天爵。屈於人事。滋慶羨美。實生夫人。夫人始生而仁。辨物而智能。言而信。旣笄而知禮。有行而制義。性與天成。質無表飾。沖靈虛映。和氣交暢。不皦厲而婦道自著。不整峻而母儀有嚴。實柔德之黃中。壺闈之盡善者。中舍府君出自自我。睿宗讓皇帝之孫。漢中王之子。乃於鐘鼎寶玉之閒。傑立雅尙。文學政事。龜龍措紳。而夫人躬蘋藻。服澣濯。去華斲雕。激清守素。輔佐將順。實有力焉。晝哭之後。訓成諸子。長曰景儉。負王佐之材。探聖人之奧。磅礴秀氣。拔乎其倫。次曰景儒。景信。景仁。皆文敏絜修。保家良士。有以見夫人明裕善教。繼成義方。宜其及公侯必復之時。享春秋以貴之慶。聞天子歎息。見公卿升堂。而時命不偕。與善茫昧。景儉有捧檄之役。夫人從養于越州。以貞元十九年。終於官舍。降年五十。有四。景儉等以其年十一月一日。號奉裳帷。耐于京兆富平縣萬壽原之舊塋。從周禮也。以某辱久要之契。俾稽懿實。敬爲銘曰。周受成命。鄭爲戚藩。以國命氏。鬱開德門。緇衣垂芳。滎波發源。爲杞爲梓。爲蘭爲蓀。杞梓惟何。卿材克紹。蘭蓀惟何。女德之妙。抑抑夫人。自他有耀。玉度旁達。

泉心內照。和順積中。高明有融。輔佐君子。與道始終。族姻成化。慈儉爲宗。讓帝之後。門生素風。宜及子貴。以榮教義。如何高堂。奄忽違棄。萬歲原上。松楸永闕。惟命罕言。德音無愧。

大唐故紀國大長公主墓誌銘 并序

公主諱某。字某。睿宗大聖真皇帝之曾孫。元宗明皇帝之孫。肅宗宣皇帝之第二女也。皇唐駿啓成命。再造生人。定四海以爲家。統三靈而傳慶。介圭作瑞。外強磐石之宗。湯沐疏封。內廣關雎之化。蘭芬玉振。垂二百年。公主以婺宿降神。坤元毓粹。荷文武之餘烈。資任嬀之積德。稟靈胎教。麗浦之生夜光。鍾美天姿。綵雲之捧朝日。生知信順。長習詩禮。士女之行。有聞必踐。保姆之訓。不肅而成。乾元二年。年若干。許笄從周。築館于魯。輜帡將其百兩。環珮出乎九重。以降于駙馬都尉滎陽鄭君曰某。官至特進左散騎常侍。博學能文。善交好施。門多長者之轍。室有聖人之書。朝野欽歎。名聲籍甚。公主輔佐君子。周旋禮經。盡志以奉舅姑。降心以諧姻族。夙興夜寐。能服澣濯之衣。殷祭大賓。必躬蘊藻之事。恆自砥礪。未嘗以嘯歌廢日。動循法度。曾不以嘖笑爲容。事叶母儀。言成內則。考諸圖史。罕見其倫。泊乎曳杖晨歌。帷堂晝哭。誓柏舟之志。盡去繁華。洗青蓮之心。坐歸空寂。一男曰某。茂學懿文。夙成時秀。選尙順宗次女普安長公主。拜駙馬都尉。祕書少監。其擇鄰之義篤歟。一女字某。淑質妙工。婉爲邦媛。適將作少監武功蘇某。其結褵之戒。明歟。於戲。以順成之德。柔立之操。茂正家道。宣美國風。歷奉五朝。殆將六紀。賜金之外。無特寵以私求。食租之餘。不與人而爭利。淑慎吾止。聿觀厥終。信戚里之高標。天人之秀出者也。宜其崇享五福。遠逾三壽。

輔時陰教爲國女師。竟昧與善。忽焉遭疾。御醫馳診。陰陽之寇已深。中使相望。藥禱之誠無及。以元和二年九月十二日。薨于長興里之私第。享年若干。少監駙馬痛殷創巨。杖起成喪。以三年某日月。哀奉裳帷。合祔于某縣某原。先常侍之舊塋。禮也。以某學于舊史。見託斯銘。姑用備人代。踐谷之虞。豈敢究王姬閔閱之盛。其文曰。

奕奕紀國。發祥聖源。祖武宗文。父乾母坤。肅宗愛女。元宗貴孫。倪天之妹。大歷加恩。問我諸姑。實惟貞元。迄于我皇。聖敬彌尊。紀國之德。如玉其溫。紀國之慶。如河渾渾。哲夫令望。身歿道存。有子克家。鳴玉晨昏。冢婦之貴。普安在門。人生極休。胡可勝言。禮爲藩兮。儉爲寶。神所勞兮。宜壽考。儼高堂兮。去何早。風白楊兮。露秋草。出青門兮。墓田道。鏤德音於沈礎。傳風樹於遺老。

故河中節度使檢校司空平章事杜公夫人李氏墓誌銘

井序

奧元和三年。歲在戊子八月某朔某日。河中晉絳等州節度使檢校司空平章事。邠國公夫人趙郡李氏。薨于公宮之正寢。享年若干。有子五人。長曰載。河南府功曹參軍。次曰翁歸。前太常寺奉禮郎。次曰寶符。前河南府參軍。次曰德符。前太常寺協律郎。次曰義符。宏文館明經。有女二人。長適監察御史蘇德輿。次適故相國崖州員外司馬韋執誼。公命載等以其年十月某日。奉輅車裳帷。備春秋葬。君夫人之禮。卜窆于某縣之某原。俾門下士刑部郎中兼侍御史。東平呂某爲之誌。李著姓也。其因生啓允之始。若暘谷出日。岷山導江。光流派別。百代可見。趙之東祖。尤貴州鄉。纓組蟬聯。布在家謀。太宗革昏隋室。毓德秦邸。褒

衣侍學。十有八士。夫人之高祖。天策府倉曹參軍。曰守素在焉。與申公士廉。刊定氏族。該明條貫。天下宗之。大王父。稷山令諱延。祖王父。趙城丞諱仲將。考宛邱令諱映。皆以懿文通經。雅度清節。卒負天爵。淪於下寮。泌之洋洋。亦流愷悌。夫人卽宛邱府君之第五女也。積善餘慶。未歸後嗣。自他有耀。女德挺生。常山炳其陰靈。大陸資乎秀氣。在娠而卜。光有貴繇。垂髮之歲。蔚其德容。蘊沈明之識。含柔立之操。生知敬愛。性合圖史。顧復長之。如滋芳蘭之易茂。姆師教之。如琢美玉之易成也。年甫二十。歸我邠公。爰自祿衣。至于陶翟。率履一貫。星紀四周。盡瘁德義之門。輔建公侯之業。祭服非手出不薦。賓饋非躬具不陳。非門內之事不詢。非女工之物不視。言契詩教。動歸禮防。不失信於兒童。無惰容於閨室。撫甯孤賤。膏雨之霑濡。叶比宗姻。陽春之感暢。式是家道。形于國風。蓋母儀之高標。內則之全致者已。宜其豐信順之佑。邁期頤之年。抱孫高堂。視子華髮。而未躋中壽。未極殊休。輟琴瑟於春堂。委繁華於朝露。莫訴之酷。可勝言哉。夫人始封贊皇縣君。進封真定郡君。又爲真定夫人。特加邢國夫人。從夫之貴也。始家蒲城。司空委禽之日。實參汾陽王軍事。數十年外。來爲小君。魚軒晝遊。里閭如舊。希代之榮也。嗚呼。榮與閔水俱逝。貴與朽壤同堙。唯柔芳與懿問。貫終古而不泯。銘曰。

仁爲源。義爲藩。啓華胄。立清門。代濟美兮。娟清明。燿柔嘉。月之出。桃之華。天鍾是兮。容在禮。言顧詩。工務本。德從宜。佐君子兮。富而約。貴而降。宜象服。封大邦。邈未始兮。榮何晚。落何先。鬱遐慶。摧中年。情神理兮。遷于堂。祖于庭。篆幽礎。闕泉扃。永垂軌兮。

唐故湖南團練觀察處置等使通議大夫使持節都督潭州諸軍事守潭州刺史中丞賜紫金魚袋贈陝州大都督東平呂府君夫人河東郡君柳氏墓誌銘 并序

柳氏系起黃帝世家河東晉永嘉末濟南太守卓隨軍南遷吾先太夫人其後也高祖善才皇朝荆王侍讀曾祖尚素潤州江寧縣令大父慶休渤海縣丞以第二子兵部侍郎渾平章政事追贈蔡州刺史工部尚書考識屯田郎中集賢殿學士或戶牖儒奧或繩墨吏道或龜龍文章率有純行皆有餘力渤海府君以道之不行儲慶於相國屯田府君以賢而無後寓美於夫人夫人年十四歸我先公從秩封安邑縣君進爲河東郡君貞元十六年六月庚寅前先公七日棄養于潭州官舍享年四十二有男四人長曰恭舉進士未第幼曰讓年小未學恭之中弟字翼天於襁褓長女適淮南節度掌書記試太常寺奉禮郎立盧策次女適前進士柳淳二幼曰貢娘小貢僅廿髮所母先公之子三人女一人長曰溫前集賢殿校書郎次曰儉前僕寺進馬季字秦生能言而夭女適故太常寺協律郎杜正孤子溫恭以某年十二月八日號奉帷裳從先公歸奉祔于洛陽邙山清風原之大塋禮也嗚呼痛哉夫人事先公二十七年事不思不行言不踐不發循守法度輝光輔佐苟有虧先公而獲已所安未之或從苟有宜先公而於己未適無所不就先公或未于中必廢食感悟得請乃復先公之允歸于美則聳美將順以成爲繼王母在堂峻婦姑之禮夫人柔色肅氣奉威承顏虔盥潔饋之勤寒燠匪懈和灰紉絨之事顧指而具備修婦順動以誠格旁感母道益無閒言王氏姑尚禮而毅嘗言吾媿敬我使我加重杜氏姑好仁而廉嘗言吾媿知我便我

加感。劉氏姑與先公異出。嘗言吾嬖信我。使我加親。其餘則循分制義。親疎各得其所。有初克終。中外咸歸于穆。夫人以恭既有譽處。每戒曰。文學政事。汝有父師。非吾所急。吾唯厚爾孝悌之望。豆盧氏柳氏女亦既有行。每戒曰。組紉環珮。汝有姆傅。非吾所勤。吾唯宜爾室家之望。恭由是先行後藝。二妹皆自他有聞。鍾愛於某。常稱其克荷。勸先公命以爲嗣。而使恭下之。惟疾之憂。則恭無加也。賢杜氏姊。憐其早孀。勸先公取以歸宗。而躬撫之。衣服禮秩。則二妹莫倫也。推是以往。而配德肥家之道備矣。外祖母喪。夫人侍王母在洛。訃自江左。不勺飲者三日。禮不敢過。而哀有餘。外祖前亦寓殯於丹陽。外叔祖至宰相而未克歸葬。至是。夫人訴於先公。而假力焉。且刺指書血。寄誓家老。俾偕啓兼護。歸伊川舊塋。卜祥無收子之名。報德於移天之後。言孝者以爲難。夫人出自崔。韋氏長姨出自蕭。先公貴爲方伯。韋府君黃綬。早世。夫人於異同之間。榮悴之際。愛敬必盡。顏色無違。言友者以爲難。從祖舅。山南節度推官曰從。學於外祖。能業文行。夫人以終鮮兄弟。憐比同氣。見其立也。喜亦如之。崔氏舅。益州府參軍曰涇。幼依外祖母。矢志邱園。夫人以如存之思。奉比諸父。聞其喪也。哀亦如之。推是以往。而反本睦親之禮盡矣。皆可以仁蹈中庸。義合古訓。慈感土木。孝通神明。宜乎從先公極貴。見諸子垂白。而始食郡封。未開國號。某未達。恭未官。幼弟甫。卅季妹方孩。曾不浹辰。怙恃繼失。投血相視。裂肝窮號。舉世獨冤。終天莫訴。嗚呼。酷哉。孤子某。永負極思。靡所眞痛。稽銘懿實。不敢失墜。其詞曰。

景雲發祥古天子。聖人之清柳爲氏。氛氳萎蕤積繁祉。南遷鼎玉爛江沚。吾先夫人懿厥後。感神慈孝因

心友。輔佐盛德。譽無咎。福宜高明。壽悠久。湖之南。湘之陰。天乎匪忱。摧棘心。洛有瀕。邛有巔。邈萬斯年。咽寒泉。

廣陵陳先生墓表

有唐貞晦先生廣陵郡棠邑鄉陳君曰融。無字。享年七十有三。遊不出鄉。考終厥命。嗚呼至哉。良玉雖白。不受采。醴泉自甘。非有和。貞色緝密。丹青無自入也。靈味天成。麴蘖無所資也。故先生長而不學。大樸不。適乎輪轅。至音不諧乎宮商。曲直渾成。巧匠莫能材也。清濁一致。伶倫莫能器也。故先生老而不仕。地虛而踐。則有迹。器疎而扣。則成聲。我踐唯實。迹不可得而見也。我扣唯密。聲不可得而聞也。故先生沒而不稱。若夫爲養克孝。居喪致毀。事亡如存。朋友孜孜。兄弟怡怡。於鄉恂恂。與物熙熙。天性人道。其盡于茲。何必讀書。然後爲學。知命是達。怡神爲樂。樂天忘憂。自寵不驚。貴我以道。此非爵乎。富我以德。此非祿乎。何必入官。然後爲仕。我有信順。自天佑之。我有正直。神之聽之。謂天盖高。亦既知矣。謂神蓋幽。亦既聞矣。何必俗聲。然後爲名。大哉先生。行不學之道。據不仕之貴。負不稱之名。達人觀焉。斯亦極矣。予貞元初。寓居是邑。言歸京國。道出其鄉。始見一鄉之人。父義子孝。長惠幼敬。見乎詞氣。發乎顏色。不聞忿爭之聲。不見傲惰之容。雍雍穆穆。甚足異也。因揣之而歎曰。芳蘭所生。其草皆香。美玉所積。其山有光。此鄉之人。豈必盡仁。其必有賢者。生於是矣。遂停車累日。周訪故老。果曰。吾里嘗有陳融。孝慈仁信。不學不仕。鄉人見之。皆自欲遷善遠罪。亦不知其所以然。今也則亡。清風猶在。予於是慨然痛先生以純德至行。沈落光耀。官

闕式問之禮。士無表墓之文。知而不書。我執其咎。乃披典校德。諡曰貞晦先生。窮徵其實。建石於路。用告將來之有識者云爾。貞元五年秋八月東平呂某述。

唐故福建觀察巡官前候官縣尉東平呂府君權殯記

府君諱沉。字君夢。河東人。祖崇嗣。高尙邱園。不應徵辟。考從之。皇朝左贊善大夫。府君性重厚寡言。志於文學。而不炫耀。尤好神仙景化之事。雖迫親故。時或從人。而焚香練氣。常澹如也。與從子某少同遊處。有疎阮之契。泊某出守湘中。府君以山水之樂。遠來依憩。不幸遇暴疾。元和五年七月二十二日。終于衡州官舍。嗚戲。知命之年。未娶無嗣。家童護奠。旅櫬單歸。追懷平昔。何可勝痛。以其年十月某日。權厝江陵城北某原。以須通歲歸。祔松檟。姑具時日記于此石云。

呂衡州文集卷第八

傅巖銘 并序

昔殷高宗恭默思道。至誠動天。天將報之。以說爲瑞。王在于寢。降神夢中。審形旁求。實得於此。曾不待敷。奏以言明。試以功脫。刑人之衣。被公衮。授受之際。君不疑。臣不慚。大哉。邈乎。殷之所以興也。若非武丁之心。周乎天地。傳說之德。通乎神明。何感動訢合如此其易。厥後唯文王以兆用。太公自漁父而登國師。白旄一麾。光定天下。抑其鄰歟。由茲而還。莫不先顯後幽。右資左德。勒以漢秩。束于周行。使特達自致之士。無聞焉。吁。可歎也。夫以天驥之材。而造父御之。則必翼輕軒。凌高衢。風翔電邁。一日千里。若制非其人。服非其車。忘權奇。務牽束。劉盛氣。頓逸足。使遵乎尋常之躅。則終歲疾驅。望駑駘而不及矣。遇與不遇。又何疑哉。嗚呼。見賢非難。知之難。知之非難。用之難。用之非難。特達難。君人者。苟以特達爲心。假無殷宗之夢。必自得說。不然。則雖使咎夔稷契。盡入其庭。亦葉公之見龍。反疑懼矣。況氤氳之中乎。恍惚之際乎。貞元九年。予自鎬徂洛。息駕於虞虢之間。升墟瞰原。髣髴其地。遠迹雖昧。清風若存。想說命三篇。幾墜秦火。百代之後。德音如何。乃作銘曰。

赫赫湯德。如火不滅。滔滔商祚。如海不竭。發祥播氣。世作聖哲。國誕武丁。野生傅說。說始肯靡。武丁卽阼。德通神交。忽夢如悟。若帝導我。期於顯素。有無之間。邂逅相遇。宵衣而起。爰得其人。貌符心冥。如舊君臣。

飛龍在天。山川出雲。感激自致。其閒無因。捨築傅巖。脫鱗鵬程。作霖時和。奮楫川澄。金在吾礪。木從吾繩。君何言哉。殷道中興。元凱攀堯。微舜曷階。阿衡干湯。抱鼎徘徊。會合之際。厥惟艱哉。何如夢中。天授神開。惟賢是登。道貴特達。匪次勿用。才其壅遏。高宗得說。乃在恍惚。揭銘擿光。萬古不沒。

望思臺銘 并序

望思臺者。漢武帝思戾太子之所建也。事具漢書。夫立人之道。本乎情性。生而知曰性。感而動曰情。性雖生。情或滅。性是以聖人患其然而爲之節。誠而明之。中而庸之。建以大倫。統以至順。倫莫極於父子。順莫先於慈孝。然而全之者正也。慈不得其正。則失子。孝不得其正。則失親。救失之術。存乎善教。昔者三王之教世子也。如周公乃爲太傅。如召公乃爲太保。如太公乃爲太師。左右前後。罔非端士。禮以專其口。樂以一其耳。仁以制其氣。義以凝其情。故非僻之心。無自入也。讒慝之口。莫能開也。父子君臣之道。所以全也。漢則不然。世子非三代之賢。保傅無二南之老。左右前後。惟刑餘罪人。目流於靡慢。耳溺於憇懣。氣溢於寵渥。情蕩於驕奢。於是非僻之心。得以入矣。讒慝之口。得以閒矣。父子君臣之道。所以離矣。向使太子師友尊嚴。左右端肅。雖江充之詐。豈敢以不義而加之耶。向使太子孝德彰聞。仁聲茂著。雖武帝之感。豈遽以大逆而疑之耶。向使太子早服師訓。少知教義。豈忍以一朝之忿。弃其親而忘其身耶。由是言之。其所以陷於此者。漸矣。殆哉。當時之勢也。國亡冢嗣。武老昭弱。京師喋血。天下疑動。若無霍光受負圖之寄。秉不奪之節。斥昏建明。鎮翊洪業。則必庶孽尋戈。起參商之禍。姦臣乘釁。行羿浞之事。漢家之厄。豈及三

七哉。此有社稷者之所宜深戒也。乙亥歲。予經于湖。登茲荒臺。望古太息。以爲遇夫一物。有可以整訓于世者。乘筆之士。未嘗闕焉。乃作銘曰。

人倫大統。天性是寶。雖曰自然。亦資斧藻。漢皇父子。一失其道。四海爲家。不能相保。荒臺歸而千古之悲。悔目空斷。冤魂不歸。疑生於微。禍積於基。苟有明義。誰其間之。嗣維邦本。本動邦危。於呼後王。鑒茲在茲。

古東周城銘 并序

魯昭公三十二年。周萇叔合諸侯之大夫。城成周。衛彪僂曰。天之所壞。不可支也。萇宏違天。必受其咎。異歲。周人殺萇宏。左氏明徵以爲世規。俾持顛之臣。沮其勝氣。非所以勵尊王。垂大訓也。予經其地。而作是銘。

文王受命。肇興西土。周公作洛。始會風雨。居中正本。拓統開祚。盛則駿奔。衰則夾輔。平王東遷。九鼎已輕。二伯之後。時無義聲。大夫萇宏。言抗其傾。坐召諸侯。廓崇王城。雖微遠猷。實被令名。宜福而禍。何傷於明。立臣之本。委質定分。爲仁不卜。臨義不問。無天無神。唯道是信。國危必扶。國威必振。求而不獲。乃以死徇。興亡理亂。在德非運。罪之遠天。不可以訓。升墟覽古。慨焉遐憤。勒銘頽隅。以勸大順。

成皋銘

茫茫大野。萬邦錯峙。惟王守國。設險於此。呀谷成壑。崇巔若壘。勢軼赤霄。氣吞千里。洪河在下。太室旁倚。崗巒嶺蹙。虎伏龍起。鑠天中區。控地四鄙。出必由戶。入皆同軌。拒昏納明。閉亂開理。昔在秦亡。雷雨晦冥。

劉項分險。扼喉而爭。漢飛鎬京。羽斬東城。德有厚薄。此山無情。維唐初興。時未大同。王于東征。烈火順風。乘高建瓴。擒建係充。奄有天下。斯焉定功。二百年間。大朴既還。周道如砥。成皋不關。順至則平。逆者惟艱。敢迹成敗。勒銘嶮巖。

謁舜廟文

唐貞元十一年歲在乙亥十一月一日。東平呂某敢盟沐齋。潔敬謁于帝舜之神。恭惟至仁無方。大孝不匱。德馨升聞。允釐百揆。以聖授聖。猶言歷試。擇人之君。良不可易。聖功無全。相待而宜。雷驅四凶。雲起八元。火冶陶世。璿璣轉天。垂衣巖廊。萬物浩然。是稱至理。是曰帝者。混成雍熙。永錫大嘏。乃眷南顧。蒼梧之野。歸堯鴻名。付禹天下。茫茫推遷。邈萬斯年。三代之後。誰爲聖賢。政如頽波。俗若壞山。韶樂猶在。薰風不還。於戲。道有通變。事有同異。官帝家王。隨時之義。揖讓而禪。故非力致。所以識者存而不議。若輔相之宜。財成之規。煥乎文章。百代可知。九官惟舊。七政有彝。宏道在人。太平無時。如何後王。曾莫是思。甚易甚簡。捨而弗爲。歷山歸然。河水東注。唐虞日遠。楊墨誰拒。瞻彼清廟。薄言往訴。庶幾精誠。必我依據。俾躍清源。俾飛曾雲。行神之道。以致吾君。不然歸來。鳥獸爲羣。敢竭微志。託于神明。

華山下酌王景略墓文

年月日。呂某敬酌于苻秦丞相王公景略之墓。昔馬氏暴興。世不及三。拔根河洛。遺枿東南。鋸牙霆聲。爭逐焚焚。天下爲血。晉猶清談。帝命景略。被茲文武。秉心無親。用則爲主。惟秦悼世。求我草莽。振衣投畚。起

作雷雨。雨莫不潤。雷莫不震。吸涼吞燕。嚼魏含晉。海蕩風掃。天臨嶽鎮。功存生人。是曰大順。武功成矣。文治定矣。晏開太平。垂及三紀。子也無壽。秦其不祀。日沈天昏。水竭龍死。時更運往。道歷消長。屹彼壯骨。沈爲朽壤。烈氣猶在。英風可想。雲開華山。若見精爽。樂毅佐燕。功負其名。漢猶求後。寵號華成。曷如夫子。翊運而行。廓定八州。澤流羣生。歷代王者。迨我聖明。盛德未問。荒墳欲平。我來于東。稅駕釃酒。才何敢望。數亦未偶。終其自致。窺子戶牖。靈魂若存。死爲冥友。

代齊常侍祭樊襄陽文

維年月日。某官某。以清酌之奠。敬祭于故襄陽節度使。右僕射。贈司空。南陽樊公之靈。惟公直方忠厚。沈敏肅給。通如川流。守若山立。積風方運。垂天難戢。建中旁求。策允帝聰。昌言右掖。高步南宮。爰膺使選。將命序戎。信在言前。知行誠中。消息其用。車書以同。寇逼漢南。乃佐戎律。偏師靖難。全功受鉞。兵荒之後。政克畫一。直繩威姦。柔轡惠物。一臨荆門。再撫峴陽。積德逾紀。闡然彌彰。天不愆遺人之云亡。朝野震悼。豈惟一方。清水之役。獲同王事。相府之舉。謬廁公議。重以中外。綢繆親懿。旋觀全才。備隨精義。交以氣合。情由道至。循躬雖虛。望古無愧。嘗言有德。必錫永年。元聖是毗。大猷于宣。擊壤鼓腹。吾將老焉。今則已矣。誰其問天。日月將葬。哀榮式備。禮有執紼。官無離次。寢闕流慟。哀何可旣。遙申薄奠。歆此精意。嗚呼哀哉。尙饗。

代宰相祭故齊相公文

維年月日某官某等謹以清酌庶羞之奠敬祭于中書侍郎平章事太子賓客贈戶部尚書齊公之靈古人所難有道有時惟公挺生克叶昌期雲引喬幹雷起幽姿禮義誠衡文章元龜學觀儒奧政爲吏師金鏘遐音玉立清儀始踐南宮泊參左掖麾幢符竹禮樂圖籍萎蕤焜耀出入揚歷晦而逾明虛乃受益爰登大任光贊庶績棟材斯全鼎味以適道始交泰志惟匪躬方盡嘉猷以奉時雍疾罷私室寵賓儲宮日冀勿藥再諧至公如何忽焉降命不融竟孤宸睭誰問蒼穹佑早辱見知深契風義耽獲同樞近備得純懿珣瑜三河交代郢則兩掖聯事氣以正合情由道至視孤有懷慟寢無愧龜兆叶吉素車東轅喉舌追命股肱殊恩魂畱魏闕形返周原凡我寮舊舉觴以言神聽不昧知余所敦尙饗

祭陸給事文

維貞元元年歲次乙酉十月景申朔十日乙巳將仕郎守尚書戶部員外郎賜緋魚袋呂某絜罇寘誠敬祭于故給事中吳郡陸公之靈嗚呼噫噓道之難行古人所悲有時無人有人無時時可人可則命奪之公初負道年志俱壯已任致君指掌太平德宗旁求始登明庭拔乎其倫聿駿有聲實欲以至公大當之心沃明主之心簡能易知之道大明主之道難得易失怡然退保或僂俛從事或棲遲却掃二十年閒爲郎而老嘗言吾雖已矣道不可已永懷其人見而後死某以弱齡獲謁于公曠代之見一言而同且曰子非入吾之域入堯舜之域子非覩吾之奧覩宣尼之奧良時未來吾老子少異日河圖出鳳鳥至天子咸臨泰階清問理本其能以生人爲重社稷次之之義發吾君聰明躋盛唐於雍熙者子若不死吾有望焉

某也不佞。謬納大賢。其何以充塞所知。克當斯言。姑用紳而書牘。而藏傳于子孫。爲門戶光。旣而各淪風波。秦吳索居。某非出非處。迫屑無餘。公高翔海郡。與道虛徐。猶念垂訓。研覃若初。作君臣得失之圖。成春秋不刊之書。今年太皇繼天。元聖在震。徵公夕拜。侍講古訓。皇上祕寶。造膝而進。以石投水。至誠無昧。討論未竟。公則旣病。重光昇矣。公病不起。河海晏而航楫自墮。禮樂作而龜玉先毀。與其時而奪其壽。吾未知夫所以嗚呼惜哉。某奉使無狀。閉畱昆夷。再換炎涼。言歸未期。公方沈瘵。忘已之危。念我否隔。發言漣漣。悉所著書。付予稚兒。曰。道之將興。而父其歸。懼不果待。寓心於斯。似有明神。感公所敦。窮荒生還。僅及公存。綿頓在牀。深堂晝昏。舉燭開目。握手無言。自此及終。曾未浹辰。凡曰識者。孰堪酸辛。況予之情。豈云他人。涕盡一哀。痛纏百身。禮不忘本。卜歸江濱。躬執薄醑。心摧氣墮。儻見期之言。可徵平生之志。獲申呂氏陸氏。戚休惟均。魂而有知。敬之聽之。嗚呼哀哉。尙饗。

道州祭百姓鄧助費念文

維元和五年歲次庚寅五月庚子朔七日景午刺史呂某遣衙前虞候蔣沼以酒醑之奠告鄧助費念之靈使君受命牧汝不能庇護使賊孟鸞等敢作不道酷加殺害是用疚心疾首萬計討擒廉使仁明不貸凶惡窮泉冤痛今日方申慙念無及潛然泣下故令於汝沒處陳賊之屍魂而有知敬此告醑嗚呼哀哉

祭候官十七房叔父

維元和五年歲次庚寅九月戊戌朔七日庚子堂姪男朝議郎使持節衡州諸軍事守衡州刺史上騎都

尉、賜緋魚袋。某鄉貢進士讓，致祭于十七房叔侯官府君之靈。私門薄佑，終鮮諸父。堂從之內，唯叔一人。叔少小相依，筆硯同學。永言素契，情實兼常。早奉誠言，見託身事。宦孤力薄，卒用無成。慙負幽明，興言痛咽。叔無允嗣，後效何申。河中大瑩，禮合歸祔。十五房尚寓淮甸，時力未并。且於江陵，謹議權厝。終期通歲，異壤同歸。皦日在天，誓無二事。嗚呼哀哉！五湖三湘，前歲共入。孤舟單旆，今日何之。慟訣江津，倍增摧慕。式具祖奠，伏惟尚饗。

衡州祭柘里渡溺死百姓文

維元和五年歲次庚寅十月戊辰朔十七日甲申，刺史呂某遣故衙前虞候何防，以豚酒之奠，致祭蘇昇、陳璜、李寬、秦陳甫、魯餘之靈。爾等五人感余誠信，力輸公稅，爭赴先期。溪水阻深，淫潦暴至，不忍欺我，忘其險艱。州令未明，津渡不謹，致此淪逝。咎由使君，興言流涕，痛念何及。聊申薄醑，兼致微贈，代納殘稅，皆余俸錢。魂而有知，諒此深意，尚饗。

呂衡州文集卷第九

凌煙閣勳臣頌 并序

我二后受成命。撫輿運。軋坤軸。撼乾樞。鼓元氣。而雷域中。騰百川。而雨天下。雷收雨霽。如再開闢。蕩焉與太極同功。貞觀十七年。太宗以功成理定。秉爲而不有之道。讓德于祖考。推勞于羣臣。念匡濟于艱難。感風雲於疇昔。思所以摠之無窮。乃詔有司。擬其形容。圖畫於凌煙閣者。二十有四人。蓋象乎二十四氣之佐天。詔勳德也。昔者舜以九官致理。周以十亂返正。高皇以三傑作漢。光武以二十八將中興。若夫錯綜勳賢。牢籠今古。雄四代而高視者。其唯聖唐乎。至若唐荳公。劉渝公之倫。探元符。建帝圖。首戴神堯。舉晉陽而活天下。此則大禹之拯溺也。魏鄭公以致君爲己任。諫若不及。審審左右。秉心宜猷。此則咎繇之屬言也。虞永興糾合羣儒。旁求百代。明備王禮。克諸帝樂。使我大國煥乎。其有文章。此則夷夔之制作也。長孫趙公舉大義。除二凶。安宗廟。定社稷。以振我不赫無疆之休。此則周公之匡救也。英衛受天勇智。雄武佐聖。鼓行海內。塵定四方。此則太公之鷹揚也。房杜元機朗識。並運帷幄。神發響效。誓成天功。此則蕭何之指蹤。子房之決勝也。尉遲秦程。剛毅木訥。氣鎮三軍。力崩大敵。匹馬孤劍。爲王前驅。此則吳漢之樸忠。賈復之雄勇也。其餘皆棟棟殊材。黼黻異制。儔諸古烈。罔有慙德。皇王之際。於斯爲盛。其始也。文爲經。武爲緯。智斯作。忠斯述。其末也。大不逼。小不遏。退者全。來者達。控而縱之。使自用之。推而引之。使自盡之。不

設籠檻以觀遼廓之致。不頓韞鏢以極權奇之變。執一德而衆力展。懸大信而羣情竭。高祖聚之以義。太宗用之以道。高宗終之以仁。傳聖萬代。享其功利。此非盛歟。此非盛歟。昔陸機、袁宏爲晉人。而歌功於漢。魏作者猶或稱之。況乎遊聖代。觀國光。目睨凌煙。而頌聲不作。某不揣賤劣。有輿然之志。輒盡所蓄。各爲讚一章。上以見王業之艱難。中以明聖賢之相須。次以朗前哲之光韻。末以聳後人之誠節。侯君集、張亮、負勳跋扈。自陷大逆。敢沒其名。用彰天刑。使伐勞懷貳者。懼春秋之義。異姓爲後。故以河閒元王爲讚首云。

河閒王孝恭

太極構天。本由一氣。大人創業。資我族類。堂堂河閒。仁勇是經。通駿有聲。爲唐宗英。暴隋天亡。羣盜猖狂。我伐用張。時惟哲王。武有烈光。爲爪牙肺腸。經綸八方。自南徂東。晏海澄江。平蕭銑輔公祐使父兄帝天下。化家爲邦。用竭爾力。寵臻其極。言不伐色。不德以遜。以默柔嘉。惟則佐高祖。建大勳。如周旦奭。與太宗守大成。如漢閒平。宜君宜王。槃石無疆。

房梁公元齡

梁公先覺。龍臥待君。長彗流光。掃天布新。義師雷興。公躍其鱗。杖策千里。來排帝閭。婉婉梁公。實懿實聰。實光實融。羽義翼忠。若鸞若鴻。大風動地。儒服從容。靜連胸中。弛張折衝。左右太宗。夷屯廓蒙。定高祖功。功告武成。翊開太平。我雖忘勞。時靡有爭。網羅遺賢。推轂羣英。玉不韜輝。蘭無沈馨。飛鴻出冥。振鷺在庭。

濟濟多士。太宗以寧。太宗寧矣。公無事矣。闕袞有補。惟仲山甫。經營四方。方叔邵虎。大邦鈞軸。至則委汝。閑居台輔。攜默自處。亦莫敢余侮。高朗令終。嗚呼梁公。

杜萊公如晦

穆穆萊公。奇姿粹靈。蘊元和氣。爲大國楨。乘時恢能。唐室天開。故人相攜。少與房梁公同匡濟之志也。直上秦階。更爲陰陽。迭作日月。佐明四海。贊育萬物。二人同心。王度是欽。如玉如金。德音悱悱。萬有千古。永稱房杜。如周申甫。

魏鄭公徵

堂堂魏公。崇節大志。喬幹直聳。摩天自致。遭風雲時。得霸王器。一言委質。有死無二。撫我則后。各盡其志。警事李密隱太子。沈浮變通。吾道不窮。龍戰既息。皇建其極。俾補袞職。其繩則直。諤諤疑疑。危言正色。保太宗德。弼違替否。日月不蝕。黜漢霸雜。行周王道。人或言秉德不撓。與封德彝廷諍。禮興樂崇。德洽道豐。保合太和。昭明有融。起四年中。復三代風。言出化成。神哉厥功。尹躬佐商。有恥于湯。公以其心。匡飭聖唐。爲唐宗臣。致唐無疆。致唐無疆。永式萬邦。

長孫趙公無忌

趙國之先。發祥朔土。乃祖乃父。受天之祜。有女而聖。文德皇后。爲天下母。有子而賢。爲唐室輔。聖賢同契。千載一覩。丕顯趙公。允文允武。克忠克仁。實有大勳。高祖受命。太宗歸尊。翼翼乾乾。恪居于藩。羣孽亂嗣。爭窺

神器鴻業將墜。公揭大義。一匡天地。人到于今。家受其賜。帝將傳聖。爰有顧命。汝忠汝誠。莫與汝京。與我聖子。守唐太平。公相高宗。有太宗遺風。刑措財豐。八荒來同。和氣大融。妖星襲月。禍起中宮。公將正之。以玉帝躬。武氏謀位。公以力爭。力屈羣邪。誠阻天聰。黜非其尤。令問無窮。

唐莒公儉

歲寒陰凝。冰雪皚皚。有鳥擇木。先陽春來。猗與莒公。王佐之材。閒運未開。登潛龍臺。代萬姓請命。與天爲勳。媒扶龍而興。振起雲雷。權輿帝圖。經始唐基。始覆一簣。勃焉巍巍。易失日時。難知惟幾。知幾其神。莒公元

劉渝公政會

河出崑崙。來潤中夏。連山合沓。橫擁其派。巨靈勃然。手坼太華。決流東注。功並造化。粵我聖唐。將舉晉陽。帝命是將。往拯溺于四方。亦旣載旆。亦旣秉鉞。強凶當路。王威高。君雅。拒不得發。渝公慷慨。感義激節。用奇制變。大事立決。雷奮電越。天衢八達。則莫我敢遏。如巨靈破山河。勢始豁。赫矣渝公。與神齊烈。迹如仙掌。爛爛不滅。

李衛公靖

有隋之末。羣盜熾蕪。帝怒震發。五星從太白。煥照參野。將有聖人。兵定天下。金精下射。猛毅感激。李公矯矯。從此奮迹。躍于中原。王者自獲。壯士不死。初。公不利於我。帝欲戮之。壯其言而免。壯士。公自稱。唐威載赫。帝曰。汝傑。致天之罰。手

付金鉞。俾往式遏。不庭則殺。如鼙發發。如火烈烈。摧枯燦雪。應鼓如截。遠若荆巫。險若江湖。強若匈奴。莫不率從。莫不震恭。車書混同。氛祲蕩空。衛侯之功。功則維何。威明惠和。策勇駕智。長驅仁義。仁義曠蕩。帝王之將。萬古曷瞻。鐵山巉巖。詔築墳闕象鐵山積石山

李英公勳

橫流莫極。大亂無象。英公傑出。應運爲將。與楚楚霸。與漢漢王。天時人事。隨我所向。長蛇縱蠱。王充東據河洛。焚焚封豕。建德來濟同惡。號吼連聲。如雷如霆。萬里震驚。時維英公。諒我太宗。斬豕以鉞。取蛇于穴。羣穢殄滅。乃定九鼎。乃開明堂。奄有大邦。金甲同光。告成于皇。太宗獻捷于高祖與勳俱撰金甲爲上下將皇業用昌。帝命英公。北伐獫狁。雷鼓殷殷。上聲旄頭幾殞。掃雪黑山。布唐陽春。五原草綠。不見南牧。島夷未庭。天子親征。其鋒維英。莫拒莫抗。是震是蕩。破東海浪。天下旣和。解鞍投戈。袞服委蛇。華髮皤皤。終始三朝。無玷可磨。

劉夔公宏基

夔公崢嶸。金虎之精。應時而生。與運俱行。總帝元戎。震唐天聲。瞑目張膽。前無金城。別建龍節。中分虎旅。啓行萬里。乘氣一鼓。劍揮雷霆。旆卷風雨。先馳咸陽。鎮定天府。天府旣定。唐集大命。入揚王庭。出握兵柄。薄伐獫狁。朔風不競。徂征島夷。東海如鏡。義始忠卒。元勳之盛。

長孫邳公順德

泰山未明。雲鬱幽崖。日觀赫開。舒爲丹霞。昔我太原。賢傑潛屯。帝出于震。爛其盈門。邳公炳焉。實耀其間。

功參造物。謀協先天。執爻前驅。捧轂南轅。以勞以舊。佐命之元。

虞永興公世南

英英永興。華德素行。以文富國。以道佐命。天下既定。爲唐儒宗。東觀石渠。始出古風。乘精繹思。假道書圃。馳騁百代。出入三古。問義皇心。聽堯舜語。歸來帝側。獻可替否。帝告永興。與鴻碩之倫。闡六籍三墳。建築禮文。先師是宗。先聖是崇。於廓辟雍。辟雍沈沈。天子所臨。或絃或歌。講古述今。其徒八千。纓弁森森。緘緘。顏光鬚。咸詠德音。羽林孤兒。亦垂青襟。洋洋聲教。無遠不泊。日月所照。皆成文字。鬱開古始。掃蕩澆季。實我羣儒。成太宗之志。英英永興。宜曰文懿。公謚

尉遲鄂公敬德

洸洸鄂公。百鍊龍鋒。沈翳未宣。氣衝斗閒。佩非其人。初事宋金剛躍入大川。神武獲焉。提之上天。天地之內。指麾無前。熊威虎力。隱若敵國。剛毅木訥。安劉必勃。武德之屯。手拔禍根。掃除氛昏。捧出白日。耀于天門。功成名遂。高謝戎事。烈烈猛志。化爲和氣。深地高堂。頤性保常。屑瓊飲露。靜奏清商。商爲臣。勵事君。鄂公之志之仁。貞觀後公不交人事。常鍊氣服食。奏清商樂以自奉。

蕭宋公瑀

隋氏不君。忠賢莫用。桐生朝陽。有集惟鳳。捨彼頽廈。鬱爲新棟。輅車元袞。開國有宋。武德之暮。羣孽內蠹。巍巍宋公。聳節高步。不吐不茹。不來不去。屹岌中立。爲天一柱。從容而言。社稷遂安。持誠秉忠。光輔二君。

激濁揚清。欲人如身。道至廣。莫我敢羣。境至大。不容纖塵。雪山倚空。冰壑照人。耿介絕鄰。爲唐貞臣。

張郟公公謹

有倬郟公。伉伉而貞。洸洸而仁。實太宗信臣。太宗守藩。內難未夷。圖之則安。捨之則危。帝臨安危。機以懼以疑。以著爲有知。是筮是咨。郟公嶷然。排闥折著。抗憤正詞。用人事。定天意。身爲元龜。不知不識。順義之則。以定社稷。郟公之力。公之云亡。帝念其勤。若痛在身。天懷發中。哭不避辰。君臣之間。亘古未聞。

屈突蔣公通

五運相推。土火革期。隋化爲唐。忠臣不知。猶驅義徒。奮拒王師。指心誓天。摩頸待時。人歸有德。四海皆叛。春日滿川。孤冰未泮。亡家徇國。方寸不亂。力屈勢窮。排空落翰。東南慟哭。血盡魂斷。杖忠就禽。萬國瞻歎。帝曰爾通。古之烈士。孝于其親。誰不欲子。俾侯于蔣。授以師紀。感恩不死。宣力如彼。佐唐扶隋。名教之美。

高申公士廉

維嶽降神。佐唐生申。忠貞自天。孝友如春。德爲邦基。行厚人倫。肅肅雍雍。眞王者臣。慶因歸妹。光延天配。文德皇后公之同出也。婚媾之中。雲龍潛會。建公南海。廓我無外。諒武撥亂。弼文開泰。邇彼庸蜀。薦鍾澆季。文翁之化。若掃于地。申公攸徂。有教無類。父子兄弟。望風相媿。勃興儒雅。大復禮義。西南頌聲。到今不墜。名登元勳。理冠羣吏。全材大器。於鑠厥懿。

殷郟公開山

溫溫殷公。初若懦夫。銅印試吏。褻衣爲儒。大風驅雲。忽與之俱。遭逢真宰。參造化誓。天地既闢。厥功有赫。從王龔行。佐帝光宅。遠展驥足。高揮鳳翮。以永終譽。垂于竹帛。

秦胡公叔寶

洛汭之役。龍戰未決。我師與王充陣于九曲。秦公應變。臨陣電拔。銳氣盡來。我盈彼竭。成敗反掌。存亡奄忽。虎來風壯。鼉轉山沒。遂作心膂。爰從討伐。崩圍陷陣。火迸水裂。翁如鸚鵡。縱若鯨突。功成國定。萬古壯骨。

程盧公知節

盧公倬然。動軼幾先。轉禍爲福。與秦胡公降于九曲。攀龍上天。繽翻鵬翼。積風乃聳。桓桓將軍。大敵則勇。雷崩山谷。貔虎頓伏。鱷倒溟波。鯨鯢蹉跎。見危而進。當死不讓。干城三朝。身老氣壯。

段襄公志元

襄公虎臣。先運而臻。謁帝太原。許唐與身。擁劍駕氣。騰風躍雲。積忠累仁。光有厥勳。建旆北伐。細柳宵屯。風謐霜凝。嚴扃達晨。天子之使。駐車軍門。軍屯蕭章門外。壁門以夜不納制使。安衆乘威。此真將軍。泚泚桓桓。克壯有聞。

許譙公紹

羣動相食。血流中原。譙公夷陵。豺虎與鄰。列境連城。火炎煙昏。皎其一邦。如玉不焚。三光忽開。萬象皆新。誰有天下。平生故人。公與高祖有舊。引忠歸誠。豹變螭伸。金石之契。移爲君臣。奕奕煌煌。爲龍爲光。元戎啓行。大旆央央。式遏大江。奄征南方。恩斯勤斯。兩不可忘。

皇帝親庶政頌 井序

臣聞光宅大寶。茂育羣生。神而明之。必在上聖。然則所同者道。所異者時。或以垂拱仰成。或以勵精自致。及乎俗躋仁壽。理治時雍。弛張之政不殊。勞逸之功則倍。我皇帝體至化。含元精。包乾剛。履坤順。誕膺駿命。恢纂鴻休。宣八聖之重光。集百靈之奧祉。如天之燾。如地之容。鼓義爲雷霆。奮仁爲風雨。幹璿衡而轉七曜。懸金鏡而納九圍。廓氛沴而川澄。沓禎祥而山委。昔軒轅氏斬蚩尤。滅火帝。功至大矣。若非仗風后之助。受元女之符。未能剋也。陶唐氏誅四罪。定水災。德至厚矣。若非大舜之登庸。伯禹之盡力。未能成也。湯以伊尹爲相。始定殷功。武以太公爲師。乃康周道。高宗紹復。資傅說啓沃之言。宣王中興。賴山甫將明之政。今陛下大康四海。雄軼二紀。百姓不知其日用。羣臣無望於清光。而乃業邁乎前王。功高乎古烈。聖作物覩。孰知其源。竊以管窺天倪。蠡挹溟量。庶乎大略。可得而言焉。陛下自代天統物之初。則以屈己濟人爲意。度臨庶政。躬總萬樞。四冊賢良。六禋郊祀。勤恤於理本。盡瘁於生靈。詳曠代之所未詳。慮列辟之所未慮。夏景異而方食。寒星在而求衣。寸陰不捨於論思。子夜猶觀乎啓事。除一物之患。而品類獲安。伸匹夫之冤。而庶獄自息。棄瑕而錄善。含垢而宥過。小善可紀。必拔於宸衷。片言有孚。不忘於睿聽。至若天時之豐約。地利之夷險。邦賦之盈虛。師律之貞暴。閭閻之疾苦。稼穡之艱難。人風之情僞。吏理之得失。莫不密歸神算。潛納皇明。雖陰陽不能以氣欺。雖鬼神不能以形遁。何細而不及。何大而不苞。何祕而不彰。何難而不就。猶復登臺念在陰之慘。聞樂思向隅之情。御裘感短褐之寒。臨膳憂箪食之餒。日慎一日。旣

泰而不自泰。旣安而不自安。兢兢乎業業乎。此其所以廣運而有成。全功之克舉者也。然而感覆燾之恩者。欲天之彌高。荷容載之德者。欲地之彌厚。仰照臨之明者。欲日月之彌光。微臣被淳風。飲元澤。親挹行事。目覩升平。憂勞誠難。願陛下勉之而已。美善誠盡。願陛下保之而已。若夫雖休勿休。元默憂柔。君上之體也。遙觀厥成。蹈舞頌聲。臣下之職也。爲而不有。德莫至焉。知而不稱。罪莫大焉。臣某敢昧死再拜稽首。獻皇帝親庶政頌一首。其詞曰。

士師邁德。元元儲慶。幽而復曜。高祖受命。貞觀致理。開元殷盛。艱而復康。皇帝親政。受命維何。邈萬斯年。親政維何。夕惕乾乾。天道福謙。我則奉天。人生在勤。我則率先。憂堯之心。勞禹之形。求人之瘼。思國之經。年亦豐止。御膳不馨。夜如何其。皇寢未甯。偃武修文。太和氤氳。海不揚波。天無纖氛。鳥章之長。椎髻之君。會朝明廷。其從如雲。巍巍崇崇。於穆昭融。宜播大樂。以宣皇風。鏗鏘盛德。蹈舞神功。下臣作頌。永示無窮。

狄梁公立廬陵王傳讚

并序

梁公以武氏篡盜。國命如綴。翊安宗社。非我而誰。是用蒙大恥。履大險。聳節振義。以持世心。閉高祖天下於方寸之地。盜力雖盛。莫之敢窺。唐復爲唐。鑿公是賴。後代昧者。頗歸功於五臣。殊不知五臣之功。公所授也。客有以李北海所傳示予者。述廬陵廢立之際。見公如生。貽諸將來。可以不惑。敢據憤而讚之。詞曰。於休梁公。社稷之臣。濡迹應變。與唐屈伸。妖虹橫天。鳴牝專晨。獨立大道。指南生人。闔闢有期。命先我時。乃建國本。代天張機。取日虞泉。洗光咸池。潛授五龍。夾之以飛。臨終指麾。皇業再基。運起身後。功成不知。

穆若清風。巖然宏規。凡爲臣者。可不度思。

張荊州畫讚 并序

中書令始興文獻公。有唐之鯁亮臣也。開元二十二年後。元宗春秋高矣。以太平自致。頗易天下。綜覈稍怠。推納寢廣。君子小人。摩肩于朝。直聲遂寢。邪氣始勝。中興之業衰焉。公於是以生人爲身。社稷自任。抗危言而無所避。秉大節而不可奪。小必諫。大必諍。攀帝檻。歷天階。犯雷霆之威。不霽不止。日月之蝕。爲公却明。虎而冠者。不敢猛視。羣賢倚賴。天下仰息。凜凜乎千載之望矣。不虞天將啓幽薊之禍。俾姦臣乘釁。以速致戎。詐成讒勝。聖不能保。褫我公袞。寘于侯服。身雖遠而諫愈切。道旣塞而誠彌堅。憂而不怨。終老南國。於戲。功業見乎變。而其變有二。在否則通。在泰則窮。開元初。天子新出艱難。久憤荒政。樂與羣下勵精致理。於是乎有否極之變。姚宋坐而乘之。舉爲時要。動中上意。天光照身。宇宙在手。勢若舟楫。相得當洪流而鼓迅風。崇朝萬里。不足怪也。開元末。天子倦于勤而安其安。高視穆清。霈然大滿。於是乎有泰極之變。荊州起而扶之。舉爲時害。動拂上欲。日與讒黨抗衡于交戟之中。勢若微陽。戰陰衝密雲。而吐丹氣。歛耀而滅。又何歎乎。所痛者。逢一時。事一聖。踐其迹。執其柄。而有可有不可。有成有不成。況乎差池草茅。沈落光耀者。復何言哉。復何言哉。曹溪沙門靈澈。雖脫離世務。而猶好正直。得其圖像。因以示予。觀而感之。乃作銘曰。

唐有棟臣。往矣其邈。世傳遺像。以覺後覺。德容恢異。天骨峻擢。波澄東溟。日照太岳。具瞻崇崇。起敬起忠。

貌與神會。凜然生風。氣蘊逆鱗。色形匪躬。當時曲直。如在胸中。鯤鱗初脫。激海以化。羊角中頽。摩天而下。無喜無慍。亦如此畫。嗚呼爲臣。儼爾夙夜。

續羊叔子傳讚

天厭鼎峙。蜀滅魏改。錫晉羊公。以同四海。儒衣登壇。嶽鎮荆蠻。十萬之衆。從公而閑。逍遙峴陽。傲視勍敵。用仁爲閒。出入無迹。吳國雖守。吳心已降。吞于胸中。不見大江。勤物忘己。樂天知命。畱功遣人。國愈身病。江漢舊域。德膏潛蒸。化行兵中。兵息化興。策雖平吳。道不相晉。永嘉南遷。豈曰泯泯。

藥師如來繡像讚 并序

藥師如來像者。余妻蘭陵蕭氏之所繡也。貞元二十年。余奉德宗皇帝之命。西使吐蕃。辭高堂而出。萬死介單車而馳。不測國故。遽至戎情。猜閉坎險。一遇星霜。再周夫人盟饋之餘。膏鉛不御。日亂蓬首。坐銷薜華。異域無期。良時自晚。始怨冬缸之久而紅。芳已闌。方苦夏景之長。而碧樹將落。書委塵篋。迹淪苔階。漸昧音容。孰知存沒。黷龜不告。因夢難徵。觸慮成端。沿情多緒。黃昏望絕。見偶語而生疑。清旭意新。聞疾行而誤喜。循環何極。刻舟匪尋。浩隔理求。窅非計得。如聞東方有金界極樂。大雄散琉璃之寶光。照恆沙之國土。能度衆生。出諸幽厄。一念必應。萬感皆通。是用瀆發慧根。妙求真像。斷鳴機躬織之素。染懿筐手績之絲。盡瘁莊嚴。彰施綵繡。纏苦心於香縷。注精意於針鋒。指下而露染青蓮。思盡而雲開白月。然後練時潔室。華設珍供。夕炬傳照。晨爐續煙。齋獻至誠。泣敷懇願。遂得慈舟密濟。覺路潛引。當道場發念之日。是

荒裔來歸之辰。幽贊冥符。一何昭焯。乃知織迴文之錦。無補離憂。登望歸之臺。空爲廢日。與夫心諧妙理。手結勝因。進則有濟度之功。退不離清淨爲本。從長擇善。豈同日而言哉。余感其志效。爰用敍贊。雖在妻子。亦無愧詞。藏諸閨門。永以傳信。讚曰。

地萬里兮天一極。往無由兮來不得。解脫願兮慈悲力。五色繡兮黃金飾。澄氛昏兮圓相開。湛水月兮蓮花臺。慈眼睞兮獷心迴。死離別兮生歸來。海爲田兮劫爲灰。身身念念兮無窮哉。

呂衡州文集卷第十

功臣恕死議

昔衛蒯聵以竊國之詐。盟其陪臣。服冕乘軒。三死無與。近代惑者。因爲口實。於是乎有功臣恕死之典。考諸古訓。其異端歟。稽諸時事。其亂本歟。何者。有國之柄。莫大乎刑賞。人生有欲。不可以不制。天討有罪。不可以不刑。蓋刑者。聖王所以佐道德而齊天下者也。功濟乎物。不可以不賞。賞勸乎功。不可以不信。蓋信者。聖王所以一號令而惇天下者也。然則恕死之典。弃信而廢刑。何以言之。夫立功者。自八元十亂之後。非盡能賢。或有起屠販。龔畝行陣之間。乘帝王應天順人之勢。用力無幾。遂貪天功。超騰風雲。各得變化。率於勞怙寵。屈強自負。僭冒無厭。見利忘義。是宜崇威峻法。大爲之防。而反丹書鐵券。許以不死。其功大者。可以五作亂而十犯上。孰不以暴爲無傷乎。且人君之言。如渙汗不反。旣與之要天地。誓河山。卒倉忽反。一旦失馭。有黥韓之罪。神怒人怨。不得已而誅。是弃信也。若恣行兇險。隳突憲網。或姦鋒將發。釁逼宗社。乃念斯言之玷。忍而不誅。是廢刑也。向者纔得其塵涓之效。螢爝之助。而信弃刑廢。將焉用之。使賢而有功。驚寵懼滿。自居無過之地。何恕死爲。使愚而有功。已小人之幸。又告以無死。是增驕而啓姦。適所謂賞之以禍也。雖恕之死。其能免乎。夫其賢如太公。忠如伊尹。唯君知臣。可以勿貳。而遽宥以死罪。是疑其不終。非所以待之以誠。而盡君子之心也。若乃猶如狗盜。庸如鯨徒。未有罪而先恕之死。是不許其慕生廉。

恥自固名節。非所以導之以德。而勸小人之善也。以爲明君之處勞臣也。安之以爵祿。護之以紀律。明之以好惡。聳之以禍福。使得遷善遠罪。保勳全名。剖符傳慶。與國終始。恩斯勤斯。是亦極矣。奈何撓權亂法。以罪寵人。墜信賞。必罰之典。虧昭德塞違之道。恐非哲王經邦軌物之制也。

復漢以粟爲賞罰議

議曰。先王賞以飾喜。罰以飾怒。喜必待功。而賞不僭行。怒苟得罪。而罰無輕赦。其來尙矣。漢氏雜霸道而墜王制。味宏規而狃小利。俾人納粟除罪。拜爵以罰。則廢法。以賞。則廢功。以儲蓄。則廢本。是沮勞惠。姦而怠。弃南畝也。何以言之。惟名與器。不可假人。而班爵於并兼之家。析圭於滯積之室。使屠沽賤隸。凌駕英豪。苟有懷廉恥之心。豈復致患難之死。雖月要天地。日誓山河。而賞不足以勸矣。天討有罪。刑茲無赦。而撓權於殘賊之徒。屈法於姦宄之黨。使凶人酷吏。言暴無傷。苟開必免之門。孰懲罔極之惡。雖臨以斧鉞。驅於鼎鑊。而刑不足以威矣。且朝糜好爵。以粟授受。國有常刑。以粟出入。貪利愛生之徒。孰不願空壠畝。而貨圭組。竭倉廩。而救死亡。拜爵者坐等封君。遂忘其本業。免罪者室如懸磬。曷保其生聚。雖使三公九卿。躬執耒耜。而嗇不可以務矣。於戲。賞罰者長人之大柄。農嗇者有邦之永圖。忽而弃焉。曾不是念。而利乎國儲之匱實。兵食之僅濟。其何補歟。然而漢承秦弊。中國耗弱。高惠務厥完緝。孝文守以恭儉。德未浹于海外。威未行于四夷。邊候猶聞擊柝。戎士不得解甲。晁錯是以有權宜對之。救弊之術。偷利于當代。倖成于一時。雖曰有因而爲。終貽識者之誚。國家體元立極。繼天而作。騰軼殷周。紹休唐虞。率我蒸人。登于

壽域。王一變至于帝。帝一變至于皇。非大道之蕃不聽。非聖德之事不問。焉有習近古之失策。採庸臣之詭論者哉。必患國廩猶虛。邊餽未繼。莫若興李悝之平糶。務充國之屯田。練將簡兵。以省軍費。輕徭薄賦。以悅人心。東作一興。西成再秩。則太倉之蓄如京矣。塞下之稼如雲矣。亦何必虧昭德塞違之道。墜信賞必罰之典。恐非聖唐經邦軌物之制也。謹議。

人文化成論

易曰。觀乎人文。以化成天下。能諷其言。蓋有之矣。未有明其義者也。嘗試論之。夫一二相生。大鈞造物。百化交錯。六氣節宣。或陰闔而陽開。或天經而地紀。有聖作則實爲人文。若乃夫以剛克。妻以柔立。父慈而教。子孝而箴。此室家之文也。君以仁使臣。臣以義事君。予違汝弼。獻可替否。此則朝廷之文也。三公論道。六卿分職。九流異趣。百揆同歸。此則官司之文也。寬則人慢。糾之以猛。猛則人殘。施之以寬。寬以濟猛。猛以濟寬。此刑政之文也。樂勝則流。遏之以禮。禮勝則離。和之以樂。與時消息。因俗變通。此教化之文也。文者蓋言錯綜庶績。藻繪人情。如成文焉。以致其理。然則人文化成之義。其在茲乎。而近代諂諛之臣。特以時君不能。則象乾坤。祖述堯舜。作化成天下之文。乃以旂裳冕服。章句翰墨爲人文也。遂使君人者。浩然忘本。沛然自得。盛威儀以求至理。坐吟詠而待太平。流蕩因循。敗而未悟。不其痛歟。必以旂裳冕服爲人文。則秦漢魏晉。聲明文物。禮縟五帝。儀繁三王。可曰煥乎其有文章矣。何衰亂之多也。必以章句翰墨爲人文。則陳後主。隋煬帝。雍容綺靡。洋溢編簡。可曰文思安安矣。何滅亡之速也。覈之以名義。研之以情實。

既如彼。校之以今古。質之以成敗。又如此。傳不云乎。經緯天地曰文。禮不云乎。文王以文理。則文之時義。其大矣哉。焉可以名數末流。雕蟲小技。廁雜其間也。

三不欺先後論

昔宓子賤爲單父也。人不忍欺之。國僑爲鄭也。人不能欺之。西門豹爲鄴也。人不敢欺之。此皆爲政不同。同歸于理。作幹事之稱首。貽牧人之經範。汪洋古今。輝焯圖史。窮理而語。固有優劣。擇善而行。豈無先後。請試論之。子賤仕衰亂之魯。而邑偪強齊。杖義爲城池。倚仁爲干櫓。當鯨吞之大敵。鳩狼顧之遺黎。渙離形檢。妙用心術。惠訓不倦。乃無得而稱。視民如傷。而不有其愛。感而動之。陰陽運於無言。誠而明之。日月懸於方寸。是則不求不欺於人。而人不忍欺矣。子產攝晉楚之間。而靖恭爾次。役智利物。飾躬勵俗。守之以信。行之以禮。告之以慈。惠臨之以明察。如鏡洞照。如衡誠懸。是則求人不欺。而人亦不能欺矣。西門豹常戰國之初。而克修茂績。身有紀律。言有典章。剛包其柔。威克厥愛。權之以法制。董之以刑罰。火烈人望。霜清物心。是則責人不欺。而人固不敢欺矣。夫不忍欺者。至誠潛感。是曰上德。堯舜之吏也。不能欺者。明智旁達。是曰有政。三王之吏也。不敢欺者。嚴威允濟。是曰能刑。五伯之吏也。誠不足。至於智。智不足。至於威。大小之閒。朗然可見。然而事在折衷。理資漸致。德宜全舉。道貴兼通。必也修誠而弃智。誠未至而政理或虧。任智而廢威。智未周而暴亂將起。不若總而行之。迭收其效。一之日。二之日。刑明威立。使人畏而不敢欺。三之日。四之日。智達政成。使人敬而不能欺。五之日。六之日。志孚誠格。使人感而不忍欺。以寬濟猛。

同二氣而和平。自邇陟遐。比三才而具美。苟非全德大器。其孰能至於此乎。若不暇會其源流。統其宗極。而姑定優劣。直論先後。則堯舜之吏。與王霸不同年而語矣。

號州三堂記

應龍乘風雲。作雷雨。退必蟠蟄。以全其力。君子役智能。統機劇。退必宴息。以全其性。力全則神化無窮。性全則精用不竭。深山大澤。其所以蟠蟄乎。高齋清池。其所以宴息乎。號州三堂者。君子宴息之境也。開元初。天子思二南之風。並選宗英。共持理柄。號大而近。匪親不居。時惟五王出入相授。承平易理。逸政多暇。考卜佳勝。作爲三堂。三者。明臣子在三之節。堂者。勵宗室克構之義。豈徒造適。實亦垂訓。居德樂善。何其盛哉。然當時漢同家人。魯用王禮。棟宇制度。非諸侯居。後刺史馬君錫。因其頽墜。始革基構。豐而不侈。約而不陋。以琴筑詩書之幽素。易綺紈鐘鼓之繁喧。唯林池煙景。不讓他日。觀其廣踰百畝。深入重扃。迴塘屈槃。杳島交映。溟渤轉於環堵。蓬壺起於中庭。浩然天成。孰曰智及。春之日。衆木花坼。岸鋪島織。沈浮照耀。其水五色。於是乎襲馨。插奇。方舟逶迤。樂魚時翻。飄葉雪飛。泝沿環迴。隱映差池。咫尺迷路。不知所歸。此則武陵仙源。未足以極幽絕也。夏之日。石寒水清。松密竹深。大柳起風。甘棠垂陰。於是乎濯纓漣漪。解帶升堂。畏景火雲。隔林無光。虛藁沈沈。皓壁如霜。羽扇不搖。南軒清涼。此則楚襄蘭臺。未足以滌炎鬱也。秋之日。金飈掃林。蒼鬱洞開。太華爽氣。出關而來。於是乎絃琴端居。景物廓如。月委皓素。水涵空虛。鳥驚寒沙。露滴高梧。境隨夜深。疑與世殊。此則庾公西樓。未足以澹神慮也。冬之日。同雲千里。大雪盈尺。四眺

無路。三堂虛白。於是乎置酒褰帷。憑軒倚楹。瑤階如眞。玉樹羅生。日暮天霽。雲開月明。冰泉潺潺。終夜有聲。此則子猷山陰。未足以暢吟嘯也。於戲。不離軒冕。而踐夷曠之域。不出戶庭。而獲江湖之心。趣近懸解。迹同大隱。序閱四時之勝。節宣六氣之和。貴而居之。可曰厚矣。若知其身既安。而思所以安人。知其性既適。而思所以適物。不以自樂。而忽鰥寡之苦。不以自逸。而忘稼穡之勤。能推是心。以惠境內。則良二千石也。方今人亦勞止。上思父息。州郡之選。重如庭臣。由是南陽張公。輟揮翰之任。受剖符之寄。遊刃而理。此焉坐嘯。靜政令若水木。閑人民如魚鳥。馴致其道。闐然日彰。小子以通家之愛。獲拜牀下。且齒諸子侍坐。于三堂。見知唯文。不敢無述。捧筆避席。請書堂陰。俾後之人。知此堂非止燕遊。亦可以觀清靜爲政之道。

諸葛武侯廟記

天厭漢德。俾絕其紐。羣生墜塗。四海飛水。武侯命世。實念大極。魏姦吳輕。去聲未獲心膂。胥宇南陽。堅臥待主。三顧稍晚。羣雄粗定。必也彗掃。是資鼎立。變化消息。謀成掌中。戰龍元黃。再得雲雨。于是右揭如天之府。左提用武之國。因山分力。與水合勢。蟠亘萬里。張爲龍形。亦欲首吞咸鎬。尾束河洛。翼出中夏。飛于天衢。然後魚驅句吳。東入晏海。大勳未集。天奪其魄。至誠無忘。炳在日月。烈氣不散。長爲風雷。英雄痛心。六百年矣。於戲。以武侯之才。知己付託。土雖狹。國以勤儉富。民雖寡。兵以節制強。魏武既沒。晉宣非敵。而戎車薦駕。不復中原。或曰奇謀非長。則斬將覆軍。無虛舉矣。或曰餽糧不繼。則築室反耕。有成算矣。嘗試念之。頗蹟其原。夫民無歸德。以爲歸。撫則思。虐則忘。其思也不可使忘。其忘也不可使思。當漢道方休。哀平

無罪。王莽乃欲憑威寵造符命。脅之以威。動之以神。使人忘漢。終不可得也。及高光舊德。與世衰遠。桓靈流毒。在人骨髓。武侯乃欲開張季世。興振絕緒。諭之以本。臨之以忠。使人思漢。亦不可得也。向使武侯奉先主之命。告天下曰。我之舉也。匪私劉宗。唯活元元。曹氏利汝乎。吾事之。曹氏害汝乎。吾除之。俾虐魏偏從之民。聳誠感動。然後經武觀釁。長驅義聲。咸洛不足定矣。奈何當至公之運。而強人以私。此猶力爭。彼未心服。勤而靡獲。不亦宜乎。乃知務開濟之業者。未能審時定勢。大順人心。而克觀厥成。吾不信也。惜其才有餘。而見未至。述于遺廟。以俟通識。唐貞元十四年七月二十五日。東平呂溫記。

道州刺史廳壁記

刺史河南元結字次山撰

天下太平。方千里之內。生植齒類。刺史能存亡休戚之。天下兵興。方千里之內。能保黎庶。能攘患難。在刺史耳。凡刺史若無文武才略。若不清廉肅下。若不明惠公直。則一州生類。皆受災害於戲。自至此州。見井邑邱墟。生民幾盡。試問其故。不覺涕下。前輩刺史。或有貪猥懦弱。不分是非。但以衣服飲食爲事。數年之間。蒼生蒙以私欲侵奪。兼之公家驅迫。非姦惡強富。殆無存者。聞之耆老。前後刺史。能恤養貧弱。專守法令。有徐公履道。李公翼而已。徧問諸公。善或不及。徐李二公。惡有不堪說者。故爲此記。與刺史作戒。自置州已來。諸公改授遷黜年月。則舊記存焉。某年月日記。

道州刺史廳後記

壁記。非古也。若冠綬命秩之差。則有格令在。山川風物之辨。則有圖牒在。所以爲之記者。豈不欲述理道。

列賢不肖以訓于後。庶中人以上。得化其心焉。代之作者。率異于是。或誇學名數。或務工爲文。居其官而自記者。則媚己。不居其官而代人記者。則媚人。春秋之旨。蓋委地矣。賢二千石。河南元結。字次山。自作道州廳事記。彰善而不黨。指惡而不誣。直舉胸臆。用爲鑒戒。昭昭吏師。長在屋壁。後之貪虐放肆。以生人爲戲者。獨不愧於心乎。予自幼時。讀循吏傳。慕其爲人。以爲士大夫立名於代。無以高此。前年冬。由尙書刑部郎中。出爲此州。雖苦劇自課。而未能逮其意也。往刺史有許子良者。輒移元次山記于北牖下。而以其文代之。後亦有時號君子之清者。洎此熟視焉。而莫之改。豈是非之際。如是其難乎。予也魯。安知其他。卽命巧而書之。俾復其舊。且爲後記。以廣次山之志云。

湖南都團練副使廳壁記

湘中七郡。羅壓上游。右振梓蠻。左馳甌越。控交廣之戶牖。扼吳蜀之咽喉。翼張四隅。襟束萬里。天下之安危繫焉。聖唐理雖偃草。制不去備。消息變化。必惟其時。由是剖分荆衡。復古南鎮。輕其兵徒。而重其統帥。易其將校。而難其參佐。所以顯仁藏用。明道晦權。成師于禮樂之中。講武于文章之內。雍容易簡。四十餘年。名迹風流。冠于當代。始則裴諫議虬。以逸材奇略。傲視而靜荒寇。次則趙相公璟。以高標雅望。鬱起而爲國楨。其餘馮郎中嶷。碩重房容州。孺復之英達。鄭評事冽。張著作季文之美秀。洎張和州。惟儉。盧侍御澥。佐我先大夫。宣慈明允。實有成績。是皆焯于朝論。清在人謠者矣。元和三年冬。天子命御史中丞隴西李公以永嘉之循政。京兆之懿則。廷賜大旆。俾綏衡湘。威如秋霜。無私凋。惠如冬陽。無私煦。用人如止。

水無私鑿。始下車。表前副使殿中侍御史扶風竇君常。字中行。以本官復職。於是監察御史河南穆君寂、河內司馬君紆、范陽盧君璠、太常寺協律郎河東范君存慶、前咸陽縣尉吳郡顧君師閔、前太子正字隴西李君礎、前太常寺奉禮郎京兆杜君周士、前延陵縣尉同郡杜君寶、羣材響附。各以類至。文雅器用。歲餘大備。錯金碧於晴壑。粹孔翠於春林。遐邇翕然。稱爲盛府。中行感會。知己竭其誠能。黃鍾音韻。調於嶰谷之竹。太阿鋒鏑。拭以華山之土。其吟鸞鳳。斷犀兕。不足怪也。竇氏伯季。同時七人。一居方伯。二列華省。四在諸侯之館。名教之樂。搢紳慕焉。以某近守支郡。且知故實。得請連帥。俾書公堂。愧於不文。安敢堅讓。元和五年七月五日東平呂某記。

呂衡州集考證

卷第一

由鹿賦予南出穰樊之間。○按穰縣屬山南東道鄧州。舊新兩唐書地理志同。或校改穰爲襄者非。

樂理心賦。侯其禕而。○按吳岫馮舒兩本皆誤。侯作俟。文苑英華七十五所載亦然。今改正。此全用張平子東京賦句也。

鑒止水賦。委質員來。○按此依吳本文苑英華三十二員作由。考周益公校英華有云。其閒賦多用員來。非讀秦誓正義。安知今之云字。乃員之省文。是益公所見正作員。其作由。但今本之失也。或校改員爲爰。馮本從之者非。

道州夏日。槿援朝花帶露繁。○按此依吳本文選謝靈運田南樹園激流植援詩云。激澗代汲井。插槿當列壙。卽此槿援二字之所本。援于眷切。字又作援。故集韻二十三線類篇木部皆云。援。一曰籬也。與謝詩之援音義俱同。或校改援爲院。馮本從之者非。

奉陪郎中段宏古。○吳本古語吉。今依馮本。按柳子厚河東先生集。有祭段宏古文。外集有處士段宏古墓誌。皆其證也。

卷第二

題石勒城。夷甫自能疑倚嘯。○按吳、馮兩本皆誤嘯作笑。今改正。倚嘯上東門。見晉書石勒載記。

卷第三

裴氏海昏集序。正平節公裴氏諱某。字某。○按此裴倩也。字容卿。曾祖憲公行儉。贈太尉。祖忠獻公光庭。拜侍中。封正平縣男。父稹子均。累封郇國公。皆見新唐書行儉傳。稹及倩襲。見宰相世系表。吳本正誤。升闕二某字。今依馮本。又文苑英華七百十三所載。與馮本同。

又考地毓德。○按此依馮本。考地謂考擇海昏之地。文苑英華同。吳本考地作孝悌者非。

又遂與我外王父故屯田郎中集賢殿學士河東柳公諱某。外叔祖故相國宣城伯諱渾。○按外王父。柳識也。本集第七卷河東郡君墓誌銘云。考識。屯田郎中集賢殿學士者是也。外叔祖渾。識弟也。河東郡君墓誌銘云。外叔祖至宰相。新書識附渾傳。又見宰相世系表。吳本闕諱某外三字。馮本闕外字。今依文苑英華補。

卷第四

代李侍郎論伐劍南更發兵表。自春徂夏。○文苑英華六百十五夏字下注云。集作冬。非。按此事考兩唐書及通鑑。命高崇文討劉闢。在元和元年正月。其年九月。卽克成都。則更發兵。必在夏也。注云冬非者是矣。吳本作夏。蓋集本亦不盡誤。馮本作冬。轉因英華之注而改之耳。李侍郎者。李巽也。時代杜祐以兵部侍郎爲度支鹽鐵轉運使。

代齊賈二相賀遷獻懿二祖表。虔附獻祖。懿祖於德明興聖廟室。正太祖景皇帝東向之尊者。○按獻祖。宣皇帝熙也。懿祖。光皇帝天賜也。德明皇帝。咎繇也。興聖皇帝。涼武昭王暠也。附廟室。謂祧也。太祖。景皇帝。虎。獻祖之孫。懿祖之子。太祖。生世祖。元皇帝。昞。世祖。生高祖也。正東向之尊。謂不祧也。此附遷。舊書。德宗紀。在貞元十九年四月戊戌。又見舊禮儀志。新禮樂志。文繁不具出。吳。馮。兩本皆題脫獻懿二字。表誤倒作懿祖。獻祖。景誤元。今依文苑英華五百七十一所載補。并改正齊。賈。二相者。齊抗。賈耽。詳新書宰相表。

蕃中賀順宗登極表。臣溫言。○按馮本題上有代孔侍郎四字。無臣溫言三字。考和叔副張薦入蕃。見兩書本傳。在貞元二十年。本集下卷有代張侍郎起居表。卽是年秋途中作。至冬而薦卒。見兩書薦傳。明年正月二十三日癸巳。德宗崩。二十六日丙申。順宗卽位。六月。告哀使至吐蕃。時薦卒已久。和叔自以副使表賀。而曰臣溫言。非如起居表之代張侍郎也。今依吳本。唯文苑英華五百五十三所載。有代孔侍郎四字。溫作某。蓋不考張薦之卒。在順宗登極前。而張又誤孔。遂不可通耳。馮本沿之。而又刪三字者非。

進農書表。凡七十二篇。○文苑英華六百十一所載。作凡二十篇。按此集與英華異本。而英華失注集作也。今依吳本。兆人本業三卷。舊經籍。新藝文。兩志同。皆不書篇數。未知孰是。馮本作二十。從英華改集者非。

卷第五

賀生擒李錡表。伏承今月十三日夜。浙西將士張子良等相率效順。生擒李錡者。○文苑英華五百六十八所載。三作二。注。集作三。按元氏長慶集。南陽郡王張子良碑云。十月十二日錡就擒。又云。以是月十一日命南陽王率銳衆以圖池。明日迴討錡。城守不敢出。是夕遂就擒。蓋英華作二爲是。集作三爲非也。又考此事舊新憲宗紀。元和二年。皆云十月癸酉。而通鑿繫於丁卯之下。據目錄長歷。是月乙卯朔。其丁卯正十三日。與集爲合。疑溫公卽本此耳。其癸酉乃十九日。故通鑿云。癸酉本軍以聞。則指兩紀所書之日也。今存集舊。以俟再詳。

代鄭監使奏吐蕃事宜狀。○按鄭當作薛。薛監使者。內官薛盈珍也。本集本卷代張侍郎起居表云。固令盈珍等却迴奏事。與此狀云。固欲令臣却歸奏事。又云。令臣與張薦分背便發。張薦卽張侍郎也。二文相應。又高品薛盈珍。有上卷謝章服表可證。吳馮兩本雖皆作鄭。疑其未是也。

代伊僕射奏請女正度狀。南充郡王。○按此依馮本。伊僕射者。伊慎也。舊新兩書慎傳。皆云封南充郡王。南充郡卽山南西道之果州。見新地理志。又文苑英華六百四十三所載。與馮本同。吳本充作竟者。非博陵崔公行狀。狀斧藻天理。○按行狀之首。依例當云某州某縣某鄉某里。崔某字某。年若干行狀。疑其所兩本及文苑英華七百七十七所載。皆脫去。而僅存狀字。無可補也。唯英華子目云。崔淙行狀。疑其所見。初尙未脫矣。淙字君濟。出博陵第二房。自曾祖承福以下。皆見新書宰相世系表。

卷第六

三受降城碑銘。右振臨洮。左馳碣石。○按此依舊鈔本。本集第十卷湖南都團練副史廳壁記云。右振特蠻。左馳甌越。正與此碑右振左馳同。彼記又載文苑英華八百二。是其證也。馮本振作扼。因文粹五十九。此碑作扼。改而從之者非。

京兆韋府君神道碑銘。京兆韋嗣。○文苑英華九百一所載。嗣作詞。注云。集作嗣。按韋詞考兩唐書無傳。唯湖南祁陽有修浯溪記。題元和十三年十二月六日江州員外司馬韋詞記。石本尙存。蓋作詞爲是。而舊鈔及馮本皆作嗣。與英華注同。或別有韋嗣。今存集舊。

卷第七

廣陵陳先生墓表。享年七十有三。○按此依舊鈔本。文粹七十所載。三作二。馮本從之者非。

卷第八

祭樊襄陽文。備隳精義。○舊鈔本隳作頤。按本集第十卷諸葛武侯廟記云。頤隳其原。用字蓋同。隳。深也。今改正。馮本此誤歸彼。又譌頤者。皆非也。

卷第九

凌煙閣勳臣頌。高申公士廉。諒武撥亂。弼文開泰。○文苑英華七百七十六所載如此。今依之改正。舊鈔及馮本。武作我。文粹二十三亦然。涉李英公勳頌。諒我太宗而誤也。

張荊州畫讚。開元二十二年後。○按舊唐書九齡本傳。二十一年起復拜中書侍郎。同中書門下平章事。明年遷中書令。新書傳及宰相表同。故以開元二十二年後言之也。文苑英華七百八十三脫下二字。文粹二十三脫後字者皆非。

藥師如來繡像讚。如聞東方有金界極樂大雄。○按此依馮本文苑英華七百八十二東作西。注云。集作東。以作東爲是。英華又載穆員讚序云。東方藥師琉璃光佛事具本經。又載皎然讚序云。東方如來。皆其證也。舊鈔本及英華作西者非。

卷第十

湖南都團練副使廳壁記。聖唐理雖偃草。制不去備。○文苑英華八百二草作革。注云。集作草。按理卽避諱治字。詳下句文意。此蓋如管子定三革。偃五刃之義。不得用草尙之風。必偃。恐形近而譌也。今存集舊而書其說於此。

右就顧君彙本。刪存爲一卷。并刊之。昔宋淳熙中嘉興沈揆校定顏氏家訓。別列考證二十三條。附於左。識者目爲精當。今者所明。略倣斯意。自餘異文。擇善而依。但在無疑。則不盡著也。秦恩復識。

呂衡州文集跋

右敦甫太史所校刻呂衡州文集也。六七兩卷出正嘉時舊鈔，獨爲完善。如卷六之章武碑，卷七之河東郡君誌，舉世莫傳者也。誠足本矣。此外如文苑英華三百十六卷和李使君三郎早秋城北亭宴崔司士因寄關中張評事詩三百十七卷，題從叔園林詩，集所未見。今恐失真，皆不取入。緣英華撰人姓名，每有轉寫舛錯，故六百十三卷爲信安王進寫聖容真圖表，載曲江集第八卷中，當開元末年作。遠在和叔未生之前，題下必本云張九齡，而今英華乃云呂溫，難於盡信可知也。其六百三十八卷代李中丞薦道州刺史呂溫狀，題下云溫自作，蓋又采諸他書，亦不以取入。此集云覽者宜詳焉。至字句是非，別具考證，不復贅。時道光丁亥六月之望，元和顧千里跋於揚州新城雙橋巷□寓齋。

右呂衡州集十卷。唐呂溫撰。按溫字和叔。一字化光。河中人。呂渭子。事蹟具新舊唐書本傳。是書王漁洋香祖筆記作詩二卷。雜文八卷。共十卷。與此冊同。新唐書稱和叔翰藻精富。一時流輩推尙。則指劉賓客、柳柳州等。舊唐書至稱其文體富豔。有邱明、班固之風。所著凌烟閣功臣銘。張始興畫贊。移博士書。頗爲文士所賞。香祖筆記則稱詩非所長。贊頌等時有奇逸之氣。如史所稱某某篇。及三受降城、古東周城、望思臺、成皋諸銘。皆有可傳。惟武侯廟記持論頗謬。又稱和叔伾文之黨。其父渭亦附裴延齡。皆非長者。蓋其門風如此。然唐人原集。流傳日少。是集舊唐書亦作十卷。則原書歸然獨存。其亦有所以不朽者在乎。此亦澹生太史校刊。特重梓之。其詩雖不甚工。亦足以資考證。如上官昭容書樓歌。自注。友人於東都買得研神記一卷。有昭容列名書縫處。研神記不知何書。偶閱金樓子有研神記一卷。自爲序。付劉毀纂次。則研神記殆梁元帝撰也。附識於此。咸豐甲寅穀日南海伍崇曜跋。